






成集書叢

錄初

叢書

商務印書館



志 申 動  
(一)



上海圖書館

A 649710

本館據海山仙館  
叢書本排印初編  
各叢書僅有此本

# 自序

疊臣若愚。死罪死罪。叩首叩首。洪惟我太祖老爺。奮興淮甸。混一華夏。聖德神功。超軼萬古。創交結近侍。官員之律。禁扶同奏啓之條。立法垂統。亦嚴且密矣。迨宣廟老爺。建內書堂。則內官不許識字之禁。不得不開。然而疊臣今日敢曰立言也乎。顧名節所關。又寧容以無言也。謹以見聞最真。庶可傳信。匡郭已粗。備愈於求諸野。如阻孫宗伯爰立者。的是東光護法。恐宗伯來。重宣君父大義。波及靈露。飲耳許大題目。其誰知之。先帝在天。能無恫乎。言之可爲痛哭。知之安忍不言。愧黔技止此。未敢侈爲完書。而知我罪我。後世自有公論。總之臣子大義在。若愚不忍終默者也。按皇城中舊制。凡內臣奏事。稱呼列聖。則某年號。老爺。今上。則萬歲爺。若愚既已失身中涓。焉敢沒其口吻。文章家必笑其俚。在史家自存其質也。假我數年。當有可觀。茲略具二十三篇。以備遺忘。其疊臣本末。詳自敘篇中。伏惟神廟老爺。慎重冊立東宮之典。加以靜攝多年。地天不交。上下睽隔。門名滋堯母之疑。臣下擇苑枯之集。幸祖宗培養者厚。國有人焉。清議愈重。或寄之講學。或托之纂言。無非以杞人之憂。明綱常之義。關心性淑世道。蓋總從國本民生起見。非有所希覬後福念也。乃傾危者。藉此以害正人。幸主讞者。擔當而引大患。不意葛藤之萌。已先滋蔓。遂令元黃之戰於廟堂者。劍斲元氣。憂未艾焉。謹序憂危。竝議前紀第一。後紀第二。淑媛之選。廣嗣胤也。誕而始封。部議未妥。神廟御簡而後定。此益見神廟事事之必法祖。烹廟臨御七載。今上入紹丕基。大聖人

世不間出。真非偶然。有君無臣之嘆。中外如一口焉。恭紀熹廟誕生第三。今上瑞徵第四。彙臣若愚。內小臣耳。外之輔弼承疑。既不敢知。內之印廠微猷。芳躅具在。登記垂範。豈異人任。謹序三朝典禮之臣第五。上帝好生。聖人惡殺。刑獄之設。實懲一以警百。創艾以求生。求之不得。斯死者與生者。兩無憾也。非一觸法網。便終可盡殺者焉。敘大審平反第六。先臣陳太監矩。助業著於朝端。口碑徧于區宇。若愚不才。實侍左右。所生之忝。萬死猶慚。憶其懿懃嘉猷。安忍湮沒而不彰也。謹紀先監遺事第七。洪水之患。懷山襄陵。猛火之威。燎原焦野。逆賢客氏。毒機久於醞釀。首禍中於椒闈。又何有於宦寺。又何有於士紳哉。撫卷傷心。揮毫泣下。謹紀兩朝椒難第八。鏡明必爲醜婦所羞。繩直必來曲木之忌。唐五王之禍。今乃見於貂璫。謹敘正監蒙難第九。五侯之禍。張禹佞也。梁冀之橫。胡廣媚也。鄙夫哉。王體乾。誰握印權。而養亂庇奸。既脅肩諂笑。固位八年。又黃白買命。苟存牖下。追想甲乙丙丁。縉紳之禍。誰助之耶。縱至老死。不知有何顏面。對越先帝之靈。於在天。敘逆賢擅政第十。非表裏何以具衣。非燠篋何以成樂。向無沈滯。魏廣微種毒於前。崔呈秀等肆虐于後。逆賢蚩蚩。總掌東廠。而外廷曲折。亦不能盡知。卽不過欲報己一二私讐。然實自三案之先發。有人以教猱假手者也。序外來線索第十一。衙門雖有內外之殊。官吏各具尊卑之體。彼時宮壺之中。不止一家貴顯。而一家之中。又不止一耳一目。今外則網漏吞舟。內則桃僵李代。且殷良弼。丁紹。呂侍高公矣。苗全侍宋公矣。張國寧侍金公。陳應祥。吳有兆。賈如皋侍王公矣。活口公論。可盡掩耶。敘各家經管第十二。文書房猶外之通政司也。又如六科也。掌印秉筆。各家經手。內官。卽內閣六卿之親。

近掾吏而已。外來密帖。下人焉能盡知。主人推敲在旁。誰敢輕重。身不敢出宮門。何由而知外事。且耳目多弊。不能獨作也。活口在。敢甘心面質也。序本章經手次第第十三。禎祥之發。必有先之妖孽之來。必有基之。江京王聖。非偶然也。序客魏始末第十四。鈞黨之禍。十常侍也。劉瑾八黨六賊附焉。吁嗟乎張永。吁嗟乎蕭敬。亦曾不幸墮落其間。今在逆賢羽翼尤繁。文則永貞元雅。文輔鼎峙樞權。武則應坤九思。良輔分鎮南北。親近則良臣明佐。永明秉恭等。日侍御前。內臣使覽。刊列昭然。廢升弟姪。部案存焉。序逆賢羽翼第十五。不盡職曰曠官也。出其位曰侵官也。觚哉之嘆頗多。存羊之心堪涕。序內臣職掌第十六。千門萬戶。漢唐麗也。茅茨土階。唐虞質也。若夫不侈不陋。允協厥中。惟我祖宗制度光明。序大內規制第十七。重農功者。修耒耜。操爐鑪者。惜鉗錘。小技猶然。况在聖學。不有所式。後何賴耶。序內府板經書第十八。左氏譏子臧之冠。漢人珍仲尼之履。衣佩之間。吉凶攸兆。盛德之容。非無涉也。序內臣佩服第十九。鄉黨著飲食之詳。左傳垂汎祭之誚。饑渴之於人亦大矣。然在內臣習染素異。序飲食好尚第二十。河套失而全陝之形勝畢虛。遼陽棄而東西之聲援頓隔。恢復之舉。端在後人。惜哉曾公銑懲羹吹壘。世俗恆情。馴至於今。更堪搢擗。序遼左棄地第二十一。一言之善。子張書紳。一事之長。古人不泯。序見聞瑣事第二十二。逆案所載之外。臣無論已。自逆賢以下。共三十有六人。貴賤貧富。各有公評。遠近親疎。耳目難掩。在體乾欲泯其附黨之迹。而楊維垣霍維華脫卸之疏入矣。高印公利令智昏。聽讒蔑理。而焚焚若愚。拔之前列矣。上下其手。成心故入。在彙臣一介性命。豈足干天地之和。當聖明解網泣罪之朝。豈宜有飛霜致旱之

在百世而下。寧不令弔古者笑秉鈞司禮之非其人哉。有兔爰爰。雉懼于羅。若愚之謂也。附彙臣自序第  
二十三。

彙臣劉若愚私識



# 目錄

- 卷之一 憂危竑議前紀
- 卷之二 憂危竑議後紀
- 卷之三 恭紀先帝誕生
- 卷之四 恭紀今上瑞徵
- 卷之五 三朝典禮之臣紀略
- 卷之六 大審平反紀略
- 卷之七 先監遺事紀略
- 卷之八 兩朝椒難紀略
- 卷之九 正監蒙難紀略
- 卷之十 逆賢擅政紀略
- 卷之十一 外來線索紀略
- 卷之十二 合家經營紀略
- 卷之十三 本章經手次第紀略

|       |         |
|-------|---------|
| 卷之十四  | 客魏始末紀略  |
| 卷之十五  | 逆賢羽翼紀略  |
| 卷之十六  | 內臣職掌紀略  |
| 卷之十七  | 大內規制紀略  |
| 卷之十八  | 內板經書紀略  |
| 卷之十九  | 內臣佩服紀略  |
| 卷之二十  | 飲食好尚紀略  |
| 卷之二十一 | 遼左棄地    |
| 卷之二十二 | 見聞瑣事雜記  |
| 卷之二十三 | 繫臣自敘略節  |
| 卷之二十四 | 黑頭爰立紀略附 |

# 酌中志卷之一

## 憂危竑議前紀第一

明宦官劉若愚撰

神廟天性至孝。上事聖母。勵精勤政。萬幾之暇。博覽載籍。每諭司禮監臣及乾清宮管事牌子。各於坊間尋買新書進覽。凡竺典丹經醫卜小說畫像曲本。靡不購及。先臣陳太監矩。凡所進之書。必冊冊過眼。如人鏡陽秋。閨範圖說。仙佛奇蹤等類。每歲之中。何止進數次。所進何止數十部哉。因先年神廟曾將閨範圖說一部。賜鄭貴妃。於萬曆乙未秋。貴妃捐貲重刊。蓋此書乃呂少司寇坤編纂。呂中州人。與歸德沈相公鯉。有師生之雅。最契厚者。至戊戌秋。科臣戴士衡撰閨鑑圖說跋一篇。標曰憂危竑議。以呂曾具憂危之疏。故拈爲發端。乃於參呂疏內。明稱呂某假托此書。以包藏禍心云云。幸荷神廟聖度如天。將士衡薄懲結局。至癸卯冬。復有妖書。國本攸關。標名曰續憂危竑議。暗行傳布。激動聖怒。朝野震驚。夫此續竑議也。或史館亦不曾具有全文。士紳僅傳其名。實不能睹原書爲何等語也。前竑議也。曾經戚臣鄭承恩刊布。頗有見者。然後人只知續議爲臣下分水火之端。竟不曉戊戌年間。已公然顯露矣。至今讀之者。無不魂驚髮豎。愈見神廟聖度。真如海嶽之藏垢納污。靡不包容者也。惟閨範圖說。實係先臣矩。自坊間購進。與呂無與。繫臣侍先臣之側。每見追論此事。卽愀然嘆曰。外廷疑揣者多。大家說夢。志在求勝。朋擠異己。雖誣及宮闈。所不惜也云云。則是將一清平世界。化爲戈矛角鬪之場。誰作厲階。至今爲梗。懷遠識遠國。

體者。心竊憂之。非一日也。夫宗社大計。莫重於冊立東宮。史乘所需。惟貴於明白確實。壘臣世受國恩。留心探聽。密爲纂輯。不覺盈帙。謹將鄭戚畹之辨冤續言。並繳生光之續憂危。竝議冠之篇首。以備主持國是。留心史乘者採焉。

鄭戚畹辨冤續言序略。聖主建極明倫。敦仁洽愛。日召皇長子皇三子皇五子。朝夕膝下。課業程學。耳提面命。父子熙熙。兄弟怡怡。天倫至愛。超越千古。握管諸臣。方且贊揚之不暇矣。胡樊戴二公。乃敢構此離間之謀。造刻飛書。謀危社稷。暗投中外。二公豈病狂喪心者耶。夫利令智昏。理爲勢奪。既有所受。必有所恃。以故公議不恤。法典可藐。翌日奇助。誰復出其右。此所以甘心隱忍。而樂爲之黨也。皇長子天性仁孝。昔因閣部大臣之請。聖主乃出御札云。安有父子無親之理。又安有越序亂分之理。大哉皇言。斯札一出。羣疑遂解。名分已定。今跋中乃敢云。易儲謀逆。其蔑視明旨。媒孽宮闈。抑何慘哉。佛胥何君。南子何行。卽中主里婦。尙且羞稱。今跋中詞意所指。直比皇上貴妃。是敢於無君。何一至此哉。貴妃重刻閩範。實由皇上所賜。承流宣化。靡敢僭越。今跋中乃云。置太后中宮於何地。此其意不離間三宮。構成奇禍不止也。呂坤刻閩範。在於萬曆十八年十月戊子日。貴妃重刻在於二十三年七月十五日。大內之災在於二十四年三月初九日。先後不同。歲月亦異。今跋中乃云。事機值會中宮減膳。卽此一事。則明出誣罔可知矣。且爾汝之稱。朋友弗屑。今乃云冊立之請。一曰歸此。一曰歸彼。彼此之言。予不知所指爲誰。弁髦其王。扇搖國是。莫此爲大。若夫金龍命書。尤爲不道之甚。呂雖至愚昧。諒不敢輕爲品題。今跋中乃直云呂坤所進。

又曰內廷咸覩。見者縮舌。由此言之。則必曾經御覽。明傳中外者。則坤之罪固不容誅。不然。則其書必出士衡之手。陽爲陷坤。陰害貴妃。君父之前。敢爲說謊。何傾險之若是也。子糾建成。當爭國之時。管仲魏徵。有事仇之恥。皆值不幸之甚。遭人倫之變者也。今上有聖慈之父。下有仁孝之子。長幼分明。兄弟無故。此何等時也。今跋中妄自引喻。出此悖逆不祥之語。以悚動人心。眩惑主聽。是誠何心哉。且主上乾綱獨斷。鼎命時隆。爲人臣子者。祝頌宜何如。今跋中乃敢云。唐闞執命。宋奸弄權。以促國短祚之事。直說君父。是。不知視皇上爲何如主。期皇上以何等壽也。毀謗詛咒。幸禍樂災。天理人倫。剗滅盡矣。國家何負於士衡。乃忍至於此耶。予意以見疏不見跋。則冤不能白。謹將原序原跋原疏。類爲一冊。名曰辨冤續言。高明君子。一加參閱。則是非不辨。自洞然矣。萬曆戊戌年仲夏吉日。順天府大興縣民。鄭承恩謹序。

大明皇貴妃鄭重刊閨範序。嘗聞閨門者。萬化之原。自古聖帝明王。咸慎重之。予賦性不敏。幼承母師之訓。時誦詩書之言。及其十有五年。躬逢聖母廣嗣之恩。遂備九嬪之選。恪執巾櫛。荷蒙帝眷。誕育三王。暨諸公主。漸叨皇號。愧無圖報微功。前因儲位久懸。脫簪待罪。幸賴乾綱獨斷。出閣講學。天人共悅。疑議盡解。益自勤勵。侍御少暇。則敬捧我慈聖皇太后女鑒。莊肅效法。夙夜兢兢。且時聆我皇上諄諄誨以帝鑑。圖說與凡勸戒諸書。庶幾勉修厥德。以肅宮闈。尤思正己宜正人。治家宜治國。欲推廣是心。公諸天下。求其明白簡易。足爲民法者。近得呂氏坤闈範一書。是書也。前列四書五經。旁及諸子百家。上溯唐虞三代。下迄漢宋。我朝賢后哲妃貞婦烈女。不一而足。嘉言善行。照耀簡編。清風高節。爭光日月。真所謂扶持綱

常砥礪名節。羽翼王化者是也。然且一人繪一圖。一圖序一事。一事附一贊。事核言直。理明辭約。真閨壺之箴鑑也。然雖不敢上擬仁孝之女訓。章聖之女訓。藉令繼是編而並傳。亦庶乎繼述之一事也。獨惜傳播未廣。激勸有遺。願出宮資。命官重梓。頒布中外。永作法程。嗟嗟。予昔觀河南饑民圖。則捐金賑濟。今觀閨範圖。則用廣教言。無非欲民不失其教與養耳。斯世斯民。有能觀感興起。毅然以往者自勵。則是圖之刻。不爲徒矣。因敘厥指。以冠篇端。

閨鑑圖說跋。標名憂危歎議東吉得閨鑑圖說讀之。嘆曰。呂先生爲此書也。雖無易儲之謀。不幸有其迹矣。一念之差。情固可原。或曰。呂素講正學。稱曲謹。胡忍輒與逆謀。曰。君知其一。未知其二。昔呂欲得銓部以行道。誠恐繡水捷足。勢迫無奈。遂諾鯁生之計。邀內禁之援。出門有功。詩書發塚。未嘗不出於正也。或曰。呂意廣風化。胡不將此書明進朝廷。頒行內外。乃奴顏戚畹。豈不失體。曰。孔子聖人也。佛胥應召。南子請見。志在行道。豈得爲屈。或曰。呂序中直擬繼述先朝母后。置太后中宮何地。且稱脫簪勸講。毋乃巧爲媚乎。曰。公言誤矣。曾見從古以來。有宮闈與見任大臣刻書者乎。破格之恩。良厚矣。恩厚則報斯隆。身爲大臣。胡忍自處以薄。或曰。序中又引先朝女誠女訓。彼乃母后臨子。儒臣纂編。茲相比擬。得毋不倫。曰。尊稱不極。恐取信不篤。但求內教宏宣。又何計較及此。或曰。古今賢貴妃多矣。胡圖說獨取漢明德一后。明德賢行多矣。胡圖說首載由貴人進位中宮。曰。呂先生自辨精矣。明德無子。故以取之。若進中宮。偶然相類。彼誠何心哉。且彼時大內被災。中宮減膳。以妃進后。事機將成。呂乘此時進。亦值其會耳。或曰。五十寶鑑。四四

彩幣十目所視。胡爲而來。曰。此賢妃敬賢之禮。卻之不恭。是當諒其心矣。或曰。人謂呂因敗露難容。乃上憂危一疏。號泣朝門。無乃欲蓋彌彰。曰。憂危一疏。人稱忠肝義膽。況此一副急淚。何可遽得。安得而少謙。或曰。國本安危。寧踰太子。竊見憂危疏中。列天下事備矣。胡獨缺此。曰。公何見之晚耶。夫人意有所專。則語有所忌。倘明奏册立。將屬之誰。若歸此。則前功盡棄。歸彼。則後患自招。何若不言之愈也。或曰。固矣。聞呂所進金龍命書。稱在長之命。不過清淡藩王。稱在三之命。異日太平天子。今內廷咸視縮舌。是亦不可以已乎。曰。管仲魏徵。天下才也。子糾建成。均號國裔。人各有見。子何責備太苛。或曰。呂之爲此。本謀銓部行道。今銓部不可得。司寇不能安。不終付浩嘆乎。曰。有是哉。子之迂也。夫有非常之人。斯有非常之事。古今成則王。敗則盜者。何限。豈宜以成敗論英雄哉。流芳遺臭。非凡庸卑鄙者能爲。況事尙未定。策國元勳。終有召起之日矣。或曰。呂之爲此。人皆薄之。子獨與之何也。曰。子真井蛙見矣。當世名人。若張公養蒙。劉公道亨。魏公允貞。鄭公承恩。鄧公光祚。洪公其道。程公紹。白公所知。薛公亨。皆稱呂所見極高。所舉極當。咸舉春秋大義。子以母貴之說。共建社稷奇勛。夫唐闔執命。天子門生。宋奸弄權。神器宵易。今盟約既定。羽翼已成。子韋布之士。豈知國家大計。宜從此三緘。無自取禍可也。余故曰。呂先生爲此書。特其一念之差。情固可原也。或人不能難。唯唯而退。因援筆記之。燕山朱東吉頓首跋。

錦衣衛帶俸都指揮使鄭國泰親伯臣鄭承恩。係順天府大興縣民。謹奏。爲懇乞聖慈。亟舉東宮冠婚大典。以消羣疑。以隆萬世治安事。臣本一介草茅。仰蒙聖恩。忝居戚末。曩因儲位久懸。遂不自揣。乃敢冒死。

瀆奏荷蒙皇上天恩。不卽加臣誅戮。姑奪衣巾爲民。臣自今以往之年。皆皇上再造之恩。臣之一念愚忠。雖剖心碎首。惟願我皇上亟行令典。上慰祖宗在天之靈。下遂四海臣民之望。天下萬世。孰不仰頌我皇上爲人倫之至哉。臣今戴罪六年於茲。日夜望此舉久矣。今皇長子年已十有七齡。睿智天成。仁孝恭敬。以其時考之。則青宮宜毓冠婚宜舉。卽此亟行。尙以爲晚矣。臣近聞閣部大臣。暨九卿科道。合疏上請。猶未蒙皇上俞允。以故人心疑惑。外論沸騰。如科臣戴士衡參論呂坤本內則曰。假托閩範圖說。包藏禍心。臣一見斯言。幾致驚死。夫閩範圖說。乃皇貴妃願自內府。仰承聖母徽音之懿。上體皇上刑于之化。重加再序。以彰風教。其年月日時。自不相同。士衡豈目不知書。安得直指爲呂坤者哉。第機雖微露。語尙含糊。無已。則士衡知奸謀未遂。乃結交權奸。又造刻愛危竑議一書。內云。閩範圖說。暗投士大夫傳播中外。言雖譏坤。語實非聖。其詞深。其言激。無非欲離間我皇上父子夫婦兄弟之天倫。煽惑人心。謀危社稷。種成後日之隱禍。以收一己之奇功耳。其奸謀詭計。臣不能盡闡。姑指其現在可證一二事言之。今聖主當陽宮禁嚴肅。誰敢私交耶。士衡跋中乃云。五十寶鏹。四匹彩幣。此賢妃敬賢之禮。且曰。十目所視。夫十目則非一人所視。必有真見。士衡旣云如此。皇上試一詰之。餽者爲誰。受者爲誰。果有其人。則士衡之言爲是。不然。則是宮禁可誣。是而可忍。孰不可忍。士衡跋中又說臣與張養蒙。劉道亨。魏允貞。鄧光祚。洪其道。程紹白。所知。薛亨。呂坤。承恩共十人。咸舉春秋大義子以母貴之說。共建社稷奇勛。盟約旣定。羽翼已成。臣請詳言之。夫此十人。鄉貫不同。科第不一。官守不齊。臣又一人未曾識面。胡能歆盟定約。相聚一時。期



會一處。以掩人之耳目哉。今九人現在。皇上可召問之。則其事之有無。自難掩飾。此不過其大略耳。其間穢語詈詞。不一而足。至於金龍命書。非特臣子之所不敢言。抑亦臣子之所不忍言者。仰乞聖鑒電察。則士衡之罪。自有不容於死者矣。今其書幸存。謹隨本附進御覽。又如全椒知縣樊玉衡疏內。直指皇上爲不慈。皇長子爲不孝。皇貴妃爲不智。嗟嗟。是何漫無忌憚。輒敢出此誹謗之言。一至於此。夫玉衡特遠臣耳。胡爲構此大逆之言。意必爲士衡之黨。有大奸大權。以指使于其間者。此事滿朝盡知。但畏投鼠忌器之嫌。不敢爲皇上言之耳。然事關宗社。禍及臣家。安得不披瀝血誠。以哀鳴於君父之前哉。及此不舉。臣恐震位久懸。桃夭失候。誠爲聖朝闕典。甚非四海臣民仰望之心。臣又恐奸謀乘釁。訛言益興。肆謀貽禍。莫知所終。雖臣家革命滅族。可甘如宗廟社稷。何伏乞皇上帝奮乾斷。俯從羣諫。早建皇長子東宮。速舉冠昏之典。仍望皇上追問戴士衡、樊玉衡造書主意。與主使黨惡之人。其處分一惟聖裁。則宗社行無疆之慶。子孫隆萬億之休。讒言可息。禍萌可杜。國朝幸甚。臣家幸甚。萬不得已。方敢冒死。上干天聽。臣不勝戰栗悚懼待罪之至。

萬曆二十六年五月十五日具奏。奉聖旨。閨範圖說是朕付與皇貴妃所看。朕因見其書中大略。與女鑑一書詞旨彷彿。以備朝夕覽閱。戴士衡等這廝。每以私恨之仇。結黨造書。妄指宮禁。干撓大典。惑世誣人。好生可惡。此事朕已洞知。不必深辨。欽此。

繫臣若愚曰。萬曆辛丑秋。繫臣初入皇城。在先臣陳太監矩直房。供筆硯之役。見室中封一箱甚密。其後

因御前查收甚事。啟箱視之。則收此辨冤續言一冊。并姚思仁所進開採圖說。雖于仁酒色財氣四箴抄疏。貴州開礦抽稅內臣張慶勅書一道。太倉考功臣封爵考等書。及詭名刑部觀政進士胡道行建言抄疏。以至先監秉筆掌東廠未行事件。及後掌司禮監印。累年陸續諫止未行密稿等件。俱於丁未年十二月內先監卒時。經管官馬鑑師明苗全。及疊臣若愚。眼同簡點。俱繳進神廟御前。此續言既刊布。京中多有見者。謹照原刊擡頭。弁之編首。按髮危竑議。偶將範字刊作鑑字。今仍其舊。以識真耳。惜呂公坤爲中州大儒。具經世實用之學。未竟厥施。豈天靳正人之設施哉。何兩衡嘗議至此也。萬曆二十九年已後。凡欽降官員揭帖兩衡姓名。實在前列。至熹廟天啟元年閏二月。贈坤刑部尙書。廕一子。入監讀書。

## 酌中志卷之二

### 憂危竑議後紀第二

萬曆三十一年十一月十二日。提督東廠太監臣陳矩奏稱。辦事蔣臣等。訪得國本攸關。刊書一本。封進御覽。國本攸關。續憂危竑議。或有問於鄭福成曰。今天下太平。國本已固。無復可憂。無復可慮矣。而先生常不豫何也。鄭福成曰。是何言哉。今之事勢。正賈生所謂厝火積薪之時也。或曰。亦太甚矣。先生之言也。得無謂儲宮有未安乎。曰。然。夫東宮有東宮之官。一官不備。何以稱乎。皇上迫於沈相公之請。不得已立之。而從官不備。正所以寓他日改易之意也。曰。改立誰其當之。曰。福王矣。大率母愛者子貴。鄭貴妃之專擅。回天轉日何難哉。曰。何以知之。曰。以用朱相知之。夫在朝在野。固不乏人。而必相朱者。蓋朱名廣。廣者更也。所以寓他日更易之意也。曰。是固然已。朱公一人。安能盡得衆心。而必無變亂乎。曰。陋哉。子之言矣。夫蟻集羶。蠅逐臭。今之仕宦者皆是。豈有相公倡之。而衆不附者乎。且均是子也。長可立。而次未必不可立也。侯之門仁義存。誰肯捨富貴而趨死亡乎。或曰。衆附姓名可得數否。曰。余數之熟矣。文則有王公世揚、孫公瑋、李公汝、張公養志、武則有王公之楨、陳公汝忠、王公名世、王公承恩、鄭公國賢。而又有鄭貴妃主之於內。此之謂十亂。魯論所謂有婦人焉。九人而已。正合文王舍伯邑考而立武王之意也。曰。然則何以知此數人之所爲乎。曰。數公皆人傑。無不望分茅胙土如姚廣孝。豈止富貴終其身而已乎。故有王

世揚、陳汝忠，則靖難之兵，取諸京營而自足矣。有李汶，則三邊險要，有人控之矣。有孫瑋於保定，則扼天下之咽喉。四方勤王之兵，無由至矣。有王之楨，則宿衛禁城，有誰人能斬關而入乎？曰：是固然矣。若張養志、王承恩，王名世者何歟？曰：養志，朱公私人也。而二王者，則朱公之鄉人也。無不願借相公之餘光者。況有以招徠之乎？曰：然則事可濟乎？曰：必濟。庸人倡義，人尙景從。而此數公皆人傑也。且復有鄭妃與陳矩朝夕比周於帝前，以爲之主，共舉大事，何謂無成？或曰：蛟門公獨無言乎？曰：蛟門爲人陰賊，常用人而不用於人，故有福己自承之禍，則規避而不染，何以見其然也。夫錦衣衛西司房類奏有名，祖宗來未有不陞者。而皇親王道化本內有名，竟不陞，豈其才力出諸菜傭下哉？蓋沈相公欲右鄭而左王，故核實之時，令親家史起，欽抑其功而不錄，亦王之楨有以默授之也。曰：然則子何以處此？曰：天之所與，不可廢也。天之所廢，不可興也。余止聽天耳。安能反天乎？或人唯唯而退。萬曆三十一年，吏科都給事中項應祥撰《四川道御史喬應甲書》。

御札奏帖後本內有名王公名世、王公承恩，不知何人。今現做何官，可開奏來。欽此。一件。辦事蔣臣等密訪得王公名世，係錦衣衛正千戶，現任鑾駕庫掌庫。王公承恩，係錦衣衛副千戶，現任本衛街道房掌房。御批：我想憂危竝議後，有名無名，張位怎麼打發了，作速查寫來看。欽此。矩回奏云：謹遵聖旨，恍惚記得憂危竝議後，有朱東吉一箇名字，彼時也曾密訪，係是詭名，張位爲東事打發去，未知是否，待查明具奏。至十一月十五日，欽差提督東廠官較辦事，司禮監太監臣陳矩，謹題爲奸人妄捏印書，搖動國本等事。

內稱本月十二日據辦事蔣臣等訪得國本攸關書一本內續憂危竝議立意叵測不惟陷害忠良抑且誣累君德其捏陷內外臣工聖明自有洞燭臣不敢煩聒瀆擾除本廠分布旗校在於京城內外訪拏去後仍乞勅下在京巡緝在外撫按等官密切訪拏等因奉聖旨這奸徒捏造妖書離間朕宮闈天性以至朝廷內外臣僚悉被傾陷蓄意大逆深可痛恨爾宜各布旗校用心密切訪拏還著在京各該緝事衙門又在外各直省撫按通行嚴捕務在必獲以慰朕心不許怠緩縱息法司即便立賞格與他欽此本日司禮監太監臣陳矩復具疏告辭奉聖旨奸書恣爲誹謗離間朕宮闈骨肉之情大逆不道朕尙被其誣枉何況於爾爾掌管廠事正宜竭忠秉誠奮力殫計必得真正罪人爲主雪寃方是報國大義豈可輕執小節先求休致反使奸計得肆成何政體宜卽照舊安心辦事不准辭有能告捕真正奸逆之人破格敘賞爾可鼓舞衆心必獲無懈該衙門知道欽此斯時也神廟震怒憤懣四明沈相公一貫山陰朱相公廣咸爲書上有名各註籍具疏只有歸德沈相公鯉入閣擬此二旨者歸德沈相公筆也至十六日又奉御批聖旨我觀爾奏已知道了但恐此事本犯難訪緝拏爾還嚴責官校差役用心密切訪拏務得真正逆犯方絕禍源以雪我屈恨纔得消爾宜知悉又賞格我問的是今日著法司立的賞格又二輔鯉見此本怎廢說爾可訪來外邊府部院各有何事情又今日著回話的二官無聽見說甚麼欽此當用黃套裝盛先監矩面奏進繳訖本犯周嘉慶也二官者東廠貼理刑閔萬民萬代增也又御批聖旨爾可看此二本二帖是某做的可見其心本是一次帖是後一次帖爾看了還著紅本夾進來不必使封套自家拏來勿

托官兒們。欽此。亦用黃套裝盛。先監矩面奏進繳訖。同上一宗。俱語祕不得聞。遂不曉是何人之本帖。上何等語也。是時訛言沸興。街坊酒肆。無敢偶爾夜會者。惟妖書內有名之人。各思報復。猜忖此書。必是素有嫌怨者所作。自歸德沈相公以下。凡在朝望重。妖書無名之人。卽有人耳而目之。歸德沈相公又曾於內閣供設天啟聖聰牌位。入則禮之。今妖書又獨無姓名。是以神廟聖意。亦頗爲蜚語惑。幸先監矩中立主持。苦心調劑。不數日而錦衣衛百戶崔德。緝得皦生光矣。又一日而東廠辦事王一鵬。緝得皦生采矣。按皦生光原順天府學生員也。先年曾詐包繼志。以害鄭皇親。其捏名印造妖書。詩云。五色龍文照碧天。識書特地湧祥煙。定知鄭主乘黃屋。願獻金錢壽御前。其下曰。松風狂客題。又跋云。偶從郊外貴家莊。舍得前詩讀畢。忽痛哭失聲。左右驚覺奪去。臣歸嘆曰。渠家陰謀羽翼成矣。獨訪所謂松風狂客者爲誰。則豪商包繼志也。包氏握鏹資金寶。明以金錢行間。語曰。巨防容蟻。而漂邑殺人。突洩一煙。而焚廬燒積。則皇長子危乎哉。凡我臣子。誰不疾首。故直書之。或散其黨云。右俱生光自撰自跋如此。刊板印貼鄭皇親門下及各巷口。以恣詐害。時常光廟尙未膺册立。所以稱皇長子也。事發。革衣巾擬戍。大同崔德又於生光室內。搜得羅文箋。內十大說。其詞曰。皦揚爾忘之耶。爾有大志不獲。而乃規規於小願乎。爾有大名見污。而乃規規於小聞乎。爾有大冤不白。而乃規規於小侮乎。爾有大讐不報。而乃規規於小忿乎。爾有大恩未償。而乃規規於小惠乎。爾有大寶受誑。而乃規規於小失乎。爾有大遊不暢。而乃規規於小方乎。爾有大忠可傷。而乃規規於小謹乎。爾有大貧能甘。而乃規規於小乏乎。爾有大才不鬻。而乃規規於小遇

乎。此十大者信大，而小者信小矣。皦揚爾忘之耶。癸卯八月二十六日有感，援筆漫書，洩蔣無功錄一通。張之軒側蚤暮臥起視之，後用圖書鈐識，是時生光已從成所赦回，改名皦揚，字寃之。又刻有怪石軒集。岸遊稿，此皆皦犯蹤跡可據者也。又此時錦衣衛直房忽貼匿名帖云：妖書有了人，協理掾張魁受銀三兩，求他主的。又告人鄭福成。先監據事件奏曰：按祖宗律文，凡匿名文書，見卽燒毀。今念事關大獄，不敢隱匿云云。神廟可其奏，特置不問。時王公世揚正任協理，遂只據東廠移文於私寓設香案行禮，具本謝恩。極其感服。皇上至聖至明，至寬至仁云。大金吾王之楨與北鎮撫司掌刑周嘉慶有隙，欲乘機害之。遂擒嘉慶家人袁鯤，單詞鍛煉，滿堂人皆可信爲實也。先監矩奉旨到廠一訊，必不肯詭隨結局。之楨疏奏要著到廠聽記。先監曰：本監例有聽記，密以上奏。今衛裏欲增添聽記，將奏誰耶。奉旨不允。之楨又密懇四明沈相公，差家人李管家密見先監，說某是正犯，其僕可證。又欲波及歸德江夏諸君。先監曰：多拜上爾老爺，我內相是一輩的人，獨不記荷花兒之獄。倘久後另有正犯，恐大家子孫種禍不淺。爾老爺如要堅執如此結局，可具揭奏知萬歲爺。我好遵旨行事。本廠纔不落不是一切干係。勞爾老爺擔擔罷。李語乃塞之。楨心方已。蓋之楨欲借皦生光牽扯多人主使，爲一網打盡之計也。又御史康丕揚時有外轉消息，有與丕揚相厚近侍賈忠貞，時在文書房捧硯，該班遂密透信於康，著速尋件聳動聖心的事入告。庶幾可免。康計無所出，遂藉妖書參僧人達觀，將觀書札中拈有可罪句字，捏砌入告，疑妖書出其手也。然觀實不知，逮錦衣衛頻遭笞拷。於十二月初五日，參送刑部獄。作聞柝偈書獄壁云：匿王問法忽齊年，自

謂觀河見不遷。我有眼根聽夜柝。卻沉豐蔀更冷然。又云。柝聲未斷鈴聲續。誰是聲兮誰是聞。卻憶法堂鐘鼓候。古來魂夢更紛紜。至十七日。索薑湯漱口。端坐而逝。時曹侍御學程久先繫獄。爲經理其身後事。詳載紫柏語錄序。實無辜瘐死人。至今悲之。又禮部李公廷機。斷生光十二款曰。一造意報讐。妖書意思與妖詩岸遊稿意思相同。其筆力相類。一先年妖書內。有侯之門仁義存句。今妖書內亦有此句。去冬會審。令本犯念妖書一二句。本犯便念此句。一刻字匠徐承惠供。本犯與刻字工銀。每字一百。時價四分。因本犯要承惠僻靜處刻。勿令人見。每百字加銀五釐。約工銀三錢四分。今算妖書八百餘字。與工銀數相同。一徐承惠供稱書板無邊欄。後有年月。妖書果無邊欄。有年月。一繳其篇供稱布散妖書。見面上票簽。有國本攸關四字。誤認攸爲收。又徐承惠供稱書面票簽有關字。問是何關字。云關老爺關字。一妖書內有文王舍伯邑考而立武王一句。此一句出禮記檀弓。本犯做生員時習禮記。又本犯詩集有讀檀弓有感詩題。一本犯妾供。本犯托病不出。臥房若干日。又後一日。向妾取刀劈本燒炕。及妾入房。滿房煙火。一刻字匠工銀。不過三錢四分。本犯與過徐承惠錢一百三十文。作兩次與之。竟欠承惠銀一錢四分。顯係窮賊所爲。一本犯妻妾子女無不招承。及會問次日。將聖旨宣讀與本犯并家屬聽著。諭旨以招出同謀。饒了家屬。若仍不招。家屬一箇也不饒。本犯妻妾子女環跪而泣。求他招出。本犯竟無所招。一會審次日。本犯招云。情真罪當。萬死無辭。又次日本犯招出自作之孽。本無同謀。親筆在卷。一會問日東廠問本犯云。爾爲何寫我名。答云。老爺是廠裏。又問別官。答云。是要緊衙門。又問餘各官。答云。小的只將縉紳一覽。



隨意寫上。先監矩亦將此封奏焉。蓋皦犯之惡。惟天可除。是以文字之間。不覺暗合。如出一手。鬼神弄人。真妙極矣。當時疊臣若愚。晝夜侍先監左右。職抄謄。隨馬鑑師明等。經理一應章奏。眼見妖書。果無邊欄。但後有年無月日。而鄭福成、項應祥、喬應甲。皆詭名也。刻字人徐承惠。又不識字之拙工也。怪石軒集。曾係承惠所刻。生光妻趙氏、妾劉氏、子皦。其篇與弟皦生采。已瘕死東廠獄中。按九我先生所斷十二款。既鑿鑿可據。雖經奏過神廟。先監因本犯到底不會念出妖書別句。又因親筆所供。前罪萬死無辭。後罪實爲至寃。先監是以終懷一線之疑。如再遲緩不結。又恐蔓延中外。縉紳不便。人心何時定乎。寃僧達觀。已瘕死矣。琴士鍾澄、醫人沈令譽、百戶劉柏等。皆註誤繫獄。而武弁楊於楷也。此時讐隙互訐。疑鬼盈車。上下驚猜。遼東去。亦被稅監高淮自山海關拏奏。幾累及其兄勳。爵楊於楷也。此時讐隙互訐。疑鬼盈車。上下驚猜。甚非政體。先監不得已。遂於三十二年四月內具奏曰。微臣陳矩。遵奉特旨。會問妖書逆情。曾記得三法司九卿官。會說逆犯皦生光前詩。供認情真。罪該萬死。後書未寫未念。似有一線之疑。他妻妾子女并刻字匠對證。又已情真。就該正法。臣每參詳。還當奏請皇上。擬定罪名。昭示朝廷大法。以安天下臣民之心。其皦生光暫且監候。待後沒有發覺。真正同謀之人。方可秋後應時處決。使天下萬世傳頌。皇上至公至明。又免先年荷花兒屈死法司得罪事例。據此。謹先據實密奏。又數日刑部等衙門少保兼太子太保尙書具官蕭大亨等。謹題爲欽奉聖旨事云云。臣等會看得皦生光。巧圖詐陷之私。敢爲誣訕之語。罔上惑衆。逆理悖常。因而震激宸衷。溷淆國是。此神人之所共憤。法紀之所不容者。臣等切齒此囚。恨不窮治。以

謝天下。忍言輕縱。但本犯之獄。止據妖書。而妖書之律。止應論斬。今奉明旨。從重另擬。臣等竊議。斬與律合。原非輕典。此外求加等。查律條。惟有謀叛一款較重。參酌本犯情罪。似不相當。臣等爲皇上守成憲。欲求於法外議輕。既所不敢。而爲皇上伸天討。不能於法中加重。尤所不安。總之本犯險惡。原出律文之外。臣愚昧。拘於三尺。反覆思維。參詳數四。未敢擅擬等因。萬曆三十二年四月十八日具題。二十日夜奉聖旨。這逆險惡異常。原出律文之外。以謀危社稷例處他。卿等便奏來。欽此。本月二十一日。具官蕭大亨等謹題。爲奉旨覆奏事云云。臣等看得。曠生光妖書之逆情甚確。卽重擬原不爲過。但律文止於論斬。臣等未敢別擬。今奉明旨。處以謀危社稷之律。查得謀危社稷。係謀反律內原註。若依此律。合凌遲處死。參詳所犯情似有間。蓋臣等所據者法也。皇上所誅者心也。明允執於法官。國有成憲。未敢擅爲輕重。而威靈出於主上。君有嚴命。難復容其擬議等因。二十七日奉聖旨。曠生光捏造妖書。離間天性。謀危社稷。無上無君。反形顯然。妖書律未盡其辜。著加等凌遲處死。便會官處決。仍梟示於人煙湊處。所有奏援的。卽作主使論。其緝捕有功人役。著該衛卽查寫來。該衙門知道。欽此。

曠臣若愚曰。續憂危竊議。起於癸卯之十一月十二日。以至次年春夏。中府會審者數次。而京畿道一次者。沈令譽。俞孺等也。外東廠二次者。周嘉慶也。內東廠二次者。曠生光之妻弟內官趙昇也。昇謫南久。潛逃來京。絕不與姊夫往來。生光詐包繼志時。曾供有內官手持黃紙封條。因疑是昇。然實無干涉。刑夾昇踝。甫用力而夾棍折如斧斷。先監察其辭色。亦憐其冤而釋之。當此之時。神廟何等震怒。四明相公。蒲州

金吾何等氣焰。中外臣民何等驚慌。先監受知聖主。一拳拏定。矢以公正。明允爲心。仍將大學衍義補之。慎刑憲數卷。不時進覽。而繳犯前罪。況復鑿鑿可據。其妖詩筆跡。刻字匠及本犯之妻妾子女。衆證各已明確。然先監矩尙兢兢引荷花兒事爲殷鑒。至再至三。不得已始於甲辰之四月二十七日。將生光正法。結局。妻子戍邊。陞崔德爲指揮。王一鵬。蔣臣等爲百戶。有差。先是法司所擬賞格五千兩。神廟如數頒予。東廠錦衣衛五城巡捕四處。共一千二百二十五兩。按勞之輕重賞散各有差。先監等亦各予廕敘。東廠底簿并朝報可考。當時神廟面召光廟。慰安天語。或實錄等書。自有紀載。惟國本攸關。全書全語。世不多見。繫臣目擊最真。竊念憂危竑議。固鄭戚畹旣已刊行散布。則此續憂危竑議。亦宜存此一段實跡。俾天下後世曉然。上可彰神廟之乾斷聖明。下可著先監之持平鎮定。庶外廷之未盡曉者。心自釋然。訛傳可息。於是抄記成冊。萬曆年間全未敢令人見。且又遭墩鎖十載。命若懸絲。而暗藏枕中者將二十年。心良苦已。更有別聞。亦間附於後。俾持論者有所考焉。四明沈相公與歸德相公。及江夏郭太史正域。素有隙。長安道路之口。或云。四明藉此挑激聖怒。瓜連蔓引。是以擯李太宰。逮周嘉慶者。實所以開羅織之端。江夏之隙。實是議謚。及楚邸假王之事。基之。華亭唐文恪公。文獻公。極力於四明處。爲江夏解冤。又賴先監力主持之。不然。郭君殆矣。其荷花兒事。都人多有知者。先監矩面奏神廟時。卽於書坊中購得耳談書一部。進覽。遂定妖書之獄。不復苛求主使之。人。恐日久禍及無辜也。聞神廟實錄亦載之。刑部翁某等降處有差。荷花兒之冤死。朱腦瓜之直承。皆不泯也。按耳談云。周皇親有喪。盜乘穴入。殺皇親。取財去。其夜邏

卒入。獨見婢荷花兒伏泣。據狀以聞於法司。荷花兒不勝虐刑。誣服與某某通奸。殺主取財。捕某某不得。竟坐法凌遲。時大司寇翁公自南都遷至。時南都已盛傳其事。無不切齒荷花兒者。故翁益不疑。臨刑時。觀者雲集。忽一人獨呼曰。冤哉荷花兒。殺人者我也。兵卒逮至法場。輸服無異辭。時荷花兒已刑畢。故翁與曹郎徐買源而下。皆坐誤罷歸。如刑時。荷花兒語劊子手曰。兒是冤死。幸相念。先死我而後爾。爾可也。不然。我必爲厲鬼殺爾。不聽。竟爾割盡始死之。越三日。是人坐順成門外麪鋪。忽大呼云。荷花兒殺我。七孔流血死。獨呼者。市中賣瓜子炒豆細民朱腦瓜也。耳談所載冤獄如此。吁可懼哉。又會審妖書之時。有沈御史裕者在坐。餽犯既類。經夾拶不能動。擡至裕公案前。裕厲聲曰。妖書是你作。如何不招。餽犯舉首乞憐曰。實不是小的作。沈聲色愈厲。餽犯怒目切齒。恨而過之。又有余御史懋衡者。事佛素謹。於中府會審。向衆官云。昨得一夢。見觀世音菩薩說妖書是餽生光作的。先監等唯唯竊哂。後神廟聞之。亦大笑焉。餽犯正法後。沈御史出差。行至半途。得病沉重。向僕從曰。我生平作事。自揣無愧。惟審妖書時。略涉孟浪。原不該硬坐定。餽生光。今昏惑中。每見生光向我索命。吾病其不起矣。已而果卒。又數年經都中。皆曰妖書非餽生光作也。是東嘉趙士楨所作也。士楨倜儻有大志。歷任文華殿中書舍人。每留心邊務。交遊頗廣。妖書獄興。卽托病不出。及餽犯正法之後。始敢出門。然忽忽倦怠。興味闌珊。絕無平昔造鳥銃議車陣議屯田。一往豪氣。及得病頻死。亦屢見生光現形索命。卒至不起。可見鬼神報應。真有不爽者。夫荷花兒之獄。尙柔肌脆膚。不耐酷刑。不得已而屈打成招者耳。曩臣之冤。倍甚於此。悲哉。古有訴之上帝者。亦有

得請於帝者。魏其灌夫之於武安。不尤彰明較著者哉。此心此理。古今同符。總之。曩臣幻視軀殼。平視冤親。了無些應驗。是在知道者。或不屑與狡邪一樣心腸。不事報復。固應如此。彼執讞司生死者。豈可量定必無鬼神報應也耶。



# 酌中志卷之二

## 恭紀先帝誕生第三

神廟萬曆二十九年春。始移皇長子於迎禧宮。九月十八日二更。傳諭內閣皇長子及諸皇子册立冠婚。敬奉聖母命蒙嘉許卿等。傳禮部擇日具儀行禮。至十月十五日。册立光廟爲東宮。封皇三子爲福王。皇五子爲瑞王。皇六子爲惠王。皇七子爲桂王。實允首輔沈相公一貫之揭。請始施行也。光廟大婚禮成之後。自孝元郭皇后外。未有舉生者。至三十一年十一月。偶有國本攸關之事。神廟震怒。親降特諭。以釋中外之疑。繼將敵生光正法。以杜讒惑之口。仍特命光廟。多選淑媛以待左右。實從先監陳矩之密請也。三十三年十一月十四日。人定後。先帝誕生。是時宮門扃矣。光廟差年老宮人柴德女。赴仁德門外報喜。光廟於星月之下。獨步殿陛。徬徨不安。先監矩立奏神廟。卽轉奏慈聖皇太后。闔宮慄慄。柴德女還報。光廟乃喜。此時先帝生母孝和皇后。未有名封該正者。問曰。發外旨意。作何稱。謂先監曰。前曾有旨。多選淑媛。不好稱別樣名色。今可稱曰。欽命選侍某氏出。不亦宜乎。故曰。欽命選侍王氏出者。卽孝和皇后也。禮部先擬封夫人。神廟不允。特稽考皇明典禮。更之曰。才人。實神廟之聖學博洽也。明年春。加上慈聖宣文明肅貞壽端獻皇太后。曰。慈聖宣文明肅貞壽端獻恭熹皇太后。光廟生母恭妃王娘娘。進封爲皇貴妃。卽孝靖皇后也。光廟誕先帝。至今上共五位。公主八位。今存三位。懿妃傅娘娘生皇五妹。封寧德公主。駙馬

劉有福所尙者也。皇六妹封遂平公主。駙馬齊贊元所尙者也。康妃李娘娘生皇八妹。封樂安公主。駙馬鞏永固所尙者也。先帝生性。雖不好靜坐讀書。然能留心大體。每一言一字。迥出臣子意表。天啓六年正月。□□初犯寧遠。卽日夜焦思。未遑自安。見樞臣王永光題疏。要將寧遠城中紅夷大砲。撤歸山海守關。先帝曰。此砲如撤。人心必搖。及七年五月內。再犯錦州寧遠。值聖體違和。更憤激深慮。凡客氏逆賢數年以來。或間有違忤。卽怒罵咒恨。形於顏色。來宗道在禮部時。諛崔呈秀封父疏。有在天之靈四字。奏文書時讀至此。先帝艷然作色。親用硃筆圈此四字。卽逆賢亦不能爲之地也。先是禮臣林堯俞題覆皇妹選婚。要將光廟選侍傅氏先擬封。其選侍李氏。候皇八妹年長選婚時再封。先帝曰。一時封罷了。何故另作一起。此三疏俱存可證也。如此之類。不能徧舉。其尋常宸翰詳謹。然不好草書。或未暇學也。天啓二年十月某日。有龍見於北花房臨河。卽宋太監晉辦膳處。長可數寸。鱗爪畢具。碧光耀日。時晉加綿絮裝入盒中。奏知先帝。送付黑龍潭訖。至天啓六年五月初六辰時。王恭廠之變。皇極殿最高危之處。一木先隕。乾清宮大殿。皇駕所居之東暖閣。將窗格扇震落二處。打傷內官二人。皇貴妃任娘娘所居之室。器物隕落。任娘娘於天啓五年十月初一日。所生皇第三子。於是日受驚後遂薨逝。逆賢直房。及王體乾李永貞等直房。各有傷損。六月初五之夜三更。又地震。幾如四年二月時。而雲中之靈邱縣震更甚。地裂湧出水甚多。其色黑。先帝左額生白毛。有一年少暖殿孟兆祥者。誤拔去。先帝甚恚。欲重責處。賴逆賢竭力救解。始免。先帝自七年五月初六日以後。聖體便覺不豫。至六七八月之間。總未離御榻。逆賢將庫中所貯金壽



字大紅紗。搜括出許多。自王體乾等至暖殿。請小轎。御茶房。御藥房近侍。每給四匹或二匹。做貼裏。御前穿以禳祝之。又移住懋勤殿旬日。而不時喧傳。云聖駕萬安矣。樞臣霍維華聞之。遂贊逆賢盡固位攘功之策。進獻仙方。靈露飲。并蒸法器具。逆賢遂著管家王朝用。照維華原樣。用金造鍋。餽付御藥房提督王守安等。照方蒸進。是時太醫院使吳翼儒等。唯唯聽從。莫敢攔阻。先帝初進服。數日亦覺甘美。凡有剩者。卽頒賜王體乾等分飲之。雖疊臣之賤。亦得於永貞直房。屢沾餘瀝。幾半月焉。按維華原獻蒸法。大略用銀鍋一口。口徑尺。內安木甌如桶。高底尺餘。圓徑稱之。甌安篋。篋中央安長頸大口空銀瓶一箇。周圍用淘淨粳米。或糯米老米小米。旋添入甌。候熱氣透一層。再添一層。約離瓶口七分。不可十分滿。恐米漲入瓶不便。上蓋一尖底銀鍋。底尖下垂。正對銀瓶之口。離二三分許外。上添冷水。周圍封固完密。下用桑柴。或好炭火蒸之。候上內水熱。卽換冷水。不數換而瓶中之露可滿。取出溫服。乃米穀之精華也。如不信。可將熟飯與嘗。一些滋味俱無。其器忌銅鐵錫。其火忌煤。先帝因進服日久。嫌水汪汪的。遂傳御藥房。不必蒸進。自此之後。聖恙日增無減。日漸浮腫。諸藥進益罔效。逆賢遂恚維華。維華心不自安。卽於乾清宮門。問安之際。舒徐容與。故與逆賢相左。而力讓寧錦之蔭。與袁崇煥。隨轉身求去。另盤算一條。捲土重來。報復之計。凡從來阻害正監中旨。起官速化。宮保倡修三案。自認爲有膽有識。不知瞞得誰過。作何遮掩也。先是皇極等殿工完。夜中間有一鳥大如鵝。其聲如梟。頻來殿上鳴呼。形不甚具。聲咯咯然。亦不甚遠。聞之者爲之魂飛毛豎。慄慄懼焉。蓋先帝上賓而逆賢伏法之禳祥也。



# 酌中志卷之四

## 恭紀今上瑞徵第四

今上萬歲爺誕生後。嬰年失恃。奉神廟聖旨。托付西李老娘娘。卽光廟彌留之際。傳封皇貴妃未行。後封康妃者看視。至泰昌元年九月內。移宮之後。奉先帝聖旨。改托光廟選侍東李老娘娘。卽曾封莊妃者看視。同居於慈慶宮後之勗勤宮。今上每日晨興拜天後。卽行朝母妃定省禮。進退周旋。寒暑罔間。天啓二年九月內。冊封信王。進封聖母劉老娘娘爲光廟賢妃。時皇八妹位下。有一近侍。當西李老娘娘看視先帝。今上時。曾並得侍奉。天啓中年。今上偶問曰。西山有位申懿王墳乎。跪啓曰。有生母劉老娘娘葬此墳附近之處。爾曉得否。跪啓曰。知之。今上遂密付銀若干兩。命此近侍。置辦香燭祭品。潛往祭奠。仍諄諭再四曰。爾可祝告明白。著就如我親去恭祭一般。及祭回覆命時。容顏戚戚。孺慕肺篤。淚痕盈聖目也。是時朱邸不乏位下諸臣。乃不肯顯然差往。而暗托此近侍者。慮左右侍從。半是逆賢之黨。倘被逆賢所知。或致猜防忌畏。殊未便耳。當莊妃老娘娘薨逝。今上哀痛如禮。未忍視慈母異生母也。聖孝之根於天性者。如此。及天啓七年八月內。入繼大統。卽首傳聖母劉老娘娘徽號。遷祔之諭。改葬於光廟慶陵。先是天啓七年。修建元宮時。計安安梓宮寶座。合容安光廟老爺孝元郭老娘娘孝和王老娘娘三位梓宮也。彼時內宮監管理王敬翟應奎。創議於合造尺寸之外。仍暗將寶座增闊若干尺。至七年十二月內。聖母孝純。

劉老娘娘遷入。共安安梓宮四位。尺寸恰好。時護送聖靈內外諸臣。劉鎮郭志義李志錡等。親入恭閱。無不贊嘆。不然。時日所限。天寒暑短。既不敢停候增修。又不敢崇卑殊厝。將奈之何。夫此豈人力也哉。我聖主聖孝格天。故莫之爲而爲。能預相默感有如此也。聖心樂讀書。十餘齡卽好靜坐。願養玉體。一夕夢烏龍蟠殿柱。曾向莊妃李老娘娘言。甚殊異焉。一日偶遊於本宮花園。園有兩井。相離頗遠。今上親用汲器。偶於初井得金魚一尾。頗悅。卽詣次井亦汲之。曰。看這裏如何。器甫下。卽引出。亦得金魚一尾。活潑光耀。左右皆驚。祕不敢言。命將魚俱放西苑河內。及移居外府第。大婚禮成之後。有獻生鯉二大尾。暫畜缸中。一尾躍出跌傷。一尾兩目皆動。如求生狀。左右皆驚異。以爲魚眨眼。亦罕事也。今上竟不忍烹而放焉。登極數日後。王體乾逆賢等侍側。問及立枷之事。體乾奏曰。大奸大惡。法所不能治者。方用之。聖顏蹙然不悅。曰。雖如此說。其實也太慘了。逆賢默然。衆叩頭呼萬歲以退。聖心仁慈。根於天性者如此。先是課內小臣讀書有慚者。今上厲聲呵責曰。讀書是好事。倒害羞。若唱曲兒。倒不害羞耶。今上寫做進字時。凡紙有餘而影本或小者。必挪移而填滿之。不忍將空紙裁去。覽漢末書史。見十常侍董卓曹操等擅權。未嘗不撫卷切齒。凡經書有疑難字義典故。卽洪武正韻。海篇直音。及韻小補等書。自搜查之。聖性天縱英斷。節省發於自然者如此。承奉徐應元。每倚逆焰。屢恣肆不謹。今上久優容之。或改顏假借之。纖毫圭角不露也。聖度之用晦。委蛇如此。天啓七年八月二十四日登極。自文華殿移居乾清宮。將暖閣內舊設玩好器具。盡行屏撤。中外臣庶無不仰頌堯舜。咸拭目以觀太平也。十月二十六日退逆賢。十二月初二日發應

元湖廣顯陵安置。崇禎元年二月降。應元淨軍。調發鳳陽。應元實逆賢所靠爲親信。接手後勁人也。近聞殞於鳳陽。人咸快之。逆賢篤好花木。夏則茉莉梔子花。簪戴滿頭。冬春則牡丹等花。羅列滿堂。今上在藩邸。逆賢每以非時花木果蔬之類爲獻。其所差官人皆逆賢心腹名下。或見任先帝御前貴近者也。雖以厚賞酬其來。然聖心儉素不尙此。勉以霽色俯納耳。凡賢下用事不用事之姓名面孔。總難逃洞鑒也。



# 酌中志卷之五

## 三朝典禮之臣紀略

神廟登極十齡矣。時馮太監保掌司禮監印兼掌東廠。其僕徐爵號小野。頗通文理。達事情。馮與江陵張相公居正內外同心。翌戴冲聖。自新鄭高相公拱退後。凡江陵在外之相業。聖母聖廟之眷注。皆馮納約自歸之驗也。神廟左右內臣。如孫海。客用之流。日以狗馬拳棍。導神廟以武。馮則凡事導引以文。蒙養之績。在馮爲多。司禮監所刻啓蒙集、四書、書經、通鑑直解、帝鑑圖說等書。至今見之者。每爲咨嗟嘆息焉。馮號雙林。篤好琴書。雅歌投壺。有儒者風。神廟曾賜牙章。曰光明正大。曰爾惟鹽梅。汝作舟楫。曰魚水相逢。日風雲際會時。凡馮寫大字扁聯之類。卽以前章或雙林及景仰前哲諸圖書印識之。所造琴頗多。世人咸寶愛之。萬曆四年五月內勅同法司大熱審。平反甚多。一日神廟偶醉。佩劍夜遊。將一內官頭髮斫下。又杖二內官幾斃。慈聖老娘娘知之。翌晨易青布袍。屏簪珥。聲言欲特召閣部大臣。謁告太廟。將廢神廟。立潞王。且先令喧傳於宮中。神廟恐懼滋甚。跪泣久之始解。遂將客用孫海斥逐。孫得秀、溫祥、周海皆私家閑住。此萬曆八年十一月事也。自江陵不奔父喪之後。中外多忌馮者。秉筆張鯨。係張宏名下。又侍神廟於潛邸久。遂乘便密爲神廟畫計害馮。宏於鯨爲本官。偵知之。密解勸曰。司禮馮公前輩。有骨力人。留著他好多哩。鯨拒不聽。遂乘間從史神廟傳旨。著馮保私宅閒住云云。神廟猶豫。尙不忍曰。若大伴上殿。

來我不管。鯨曰：既有旨，馮某必不敢違。遂先給以閑住，已而謫南京孝陵。復以言官江東之等疏，遂籍沒馮保、張大受、楊舟、徐爵等產。是時先監矩已任司禮監典簿，經理其事。復逮保弟馮佑姪馮邦寧等於獄。此萬曆十一年正月事也。後佑與邦寧皆瘐死。徐爵擬戍，馮竟謫死於江南。葬於留都皇廠。林木森鬱，巍峩佳城。實天所以報忠臣也。先帝卽位之初，秉筆王太監安，馮名下也。擬奏請卹典改遷，未果。而遇害焉。張太監宏，號容齋，廣東人。所南張公者是也。遂繼馮掌印，而張鯨掌東廠。宏蒙神廟優禮，雖亞於馮。然推心則過之。十二年三月，欽遣閱視京營。不二三年，因神廟日益英聖，而左右間有以貨蠱聖心者，遂絕食數日而卒。神廟頗悼惜之。宏墓在阜城門外迎祥寺側。眷注之隆，居官之美，具在墓碑。宏恆曰：我形雖廢，自有不廢者存。是以脩然長逝。蓋於學問有所得云。張鯨，北直新城縣人。嘉靖二十六年選入，爲宏名下。剛介寡學，馳心聲勢。神廟倚毗之。後掌東廠，兼內府供用庫印，頗爲時相所憚。其用事之司房邢尙智，招權納賄，耽於聲色。致言官李沂等交章劾鯨。萬曆庚寅元旦，召輔臣申相國時行等入毓德宮，神廟出大理寺評雜於仁，酒色財氣四箴疏示之。賴輔臣救於仁，得削籍。仍出李沂疏，諭鯨跪聽。輔臣戒諭之。是日也，輔臣已出。復召入。時皇長子九齡矣。皇三子五齡矣。咸宣來令輔臣拜見之。自此鯨寵眷漸衰。後退廢林下，尙智擬戍。鯨與先監矩極契厚，而調不同。丁未冬，先監坐化。鯨聞之痛而無淚。至戊申五月，病卒。葬於香山永安寺側。鯨弟書紳，廢金吾，至都督同知。其掌家劉鈺，性儉素，務稼穡。掌班鄭守成，通文理，多蓄古書。先監之掌家常雲者，鯨名下也。宏卒而掌司禮監印者，張誠也。張鯨旣退，誠遂兼掌東廠及內官監。



印爲人鯁直不阿。好看書。每據古事規諫。或暗地譏罵無所忌。神廟頗憚之。十五年三月。欽遣閱視京營。其後營中夫人郝金鳳女之死。誠曾與謀。自此內執事多有譖誠者。誠率意不防。又其弟張五老名勳者。私與戚臣武清侯李家結姻。又名下蕭玉。王忠頗恃寵恣肆不謹。二十四年正月。神廟震怒。立斥退誠。著田義掌司禮監印。孫暹總督東廠。該孫暹等題爲欽奉聖旨。事奏。聖旨是逆犯張誠、張楨及各弟姪張勳等。張紹寧等、霍文炳等及弟姪霍文燦等各犯。并王玉、錢恩、李承德、李輔、耿進、馬義、王用、馬彰、蕭玉、王忠、段秉忠、張懋忠、霍朝、王詔、喬進、馬欽、金忠本犯。原有莊房田地。俱著該撫按官。即便查明。都籍沒入官。不許隱漏。還立限與他都察院知道。欽此。於是將誠降發南海子淨軍。看守牆鋪。逮家人張勳、霍文炳等。內官張楨、錢恩等十餘人。皆下法司獄論死。其原籍田產各籍沒入官。後復戮張勳、蕭玉、王忠於市。而喬進等至泰昌元年秋始釋。惟張楨於三十四年。先監矩奉勅大審。同曹御史學程奏請未允。三十五年夏。大雨獄牆壞。楨等數人咸瘕死。先帝東宮紀事高公時明。伴讀沈公蔭皆誠名下。及二人以從龍勞陞秉筆。具疏奏復誠原官。討論祭爲身後榮焉。沒誠產時。先監矩已秉筆矣。繼誠掌印者。田太監義。掌東廠者。孫暹也。義陝西西安府人。嘉靖二十一年選入。由文書房陞南京守備。神廟久知其貞介忠誠。有大臣度。特召秉筆。其楷書端嚴。有如其品。及繼誠後。凡典禮政務。與先監矩開誠協濟。裁酌施行。田性儉樸寡言。休有量。人不敢干以私。二十四年三月。兩宮災。其夏偶與先監深夜坐語。仰天太息。先監會其意。詰朝乃攜兩奏稿往見。田看畢稱好。即署名同密諫神廟。其一疏略曰。臣義等竊見近日以來。外廷章疏留中不

報者多。以致部院屢行催發。間有疑惑議論。左右朦朧。隱蔽不行進奏。伏乞萬歲爺簡覽批云云。其二疏略云。臣義等竊見御前執事宮人內官。或干聖怒。責處發遣。絡繹不絕。每致重傷。兼患時疾而死亡者。殆無虛日。蓋以聖旨欽傳。卽以本日動刑。而用刑者因懼罪及於己。輒加數多酷責。而押解者復懼連累。日夜嚴加整鎖。致使受刑犯人得生者十無一二。如此致傷天和。豈聖世所宜有哉。且如近日。因尋訪楊山女一事。但兩宮回祿。咸稱不知。熾火煅煉。或成灰燼。未審的確。罪及守門。又斃幾命矣。凡宮人病死者。卽連累內官。或打一百二十。一百五十。性命難存。一人病死者。尙然可憫。況又波及無辜。生命乎。令耳聞目見。哭聲載道。怨氣沖天。景象如此。若不披瀝上奏。則是臣等貪祿戀位。畏死偷生。直犬馬之不如也。伏望聖斷。將臣等分別罷斥云云。神廟嘉納之。田下用事掌班趙剛。楊致中。各具能幹。廣交縉紳。凡田所進納。御前錢糧。皆兩人設處置辦。田亦推赤不疑。掌家王欽。具員而已。戊戌春。孫暹卒。葬西山碧雲寺。暹北直涿州人。魏忠賢之本官也。先監矩。繼暹掌東廠矣。田至乙巳八月卒。葬磨石口。繼田掌印者。亦先監矩也。遂兼掌東廠。見先監遺事語中。丁未冬。先監坐化。而繼掌司禮監印者。成敬也。掌東廠者。魏仲也。成於嘉靖三十二年。選入。由秉筆掌印。性豪俠。樂施與。喜狗馬。謳歌好花木。鮮服飾。善飲啗。不甚好讀書。然好武勇騎射。戊申三月。欽遣閱視京營。而識見深沉。料事多中。己酉之正月壬辰。訛言。從黃花鎮犯京師。男女避難者。踐踏塞路。城門爲之晝閉。神廟亟召問策。成徐對曰。無事。萬歲爺寬懷。如真有。兵部豈無塘報。此必訛傳。其後始知果薊帥王國棟夷兵。夜過昌平。擅拆民籬。落燃火禦寒。而火光燭天。遙見夷粧。

遂驚爲□至也。其掌班侯清，篤信仁善人也。成家政頗嚴急，賴清救解爲多。成卒於庚戌秋，葬於迎祥寺後。而掌東廠之魏仲，繼之秉筆。李浚掌東廠矣。仲碌碌苛謹，廠體從此漸墮。仲卒年餘，神廟慎印缺難其人，久不補。而後以督廠代攝印務。終浚之身，未掌印也。辛亥冬浚卒，特命乾清宮管事常雲獨力辦膳。神廟陞正陽門提督李恩文書房盧受爲秉筆。次年春，以恩掌司禮監印，以受掌東廠。至癸丑秋，受接常雲亦獨力辦膳。終事神廟也。萬曆乙卯閏八月，神廟重慶萬壽聖節時，西山楊家頂觀音菴僧處牡丹，忽開一朵，管花內官知之，受費六十餘兩爲寺中功德，將所開牡丹移進御前。神廟甚嘉悅爲瑞焉。受、魏仲皆嘉靖四十一年選入。李浚與恩皆嘉靖二十六年選入。於先監爲同年。恩能書，爲人坦率，令之秉筆。會復起掌印。宋太監晉其名下也。秉筆李太監鳳翔，南京守備李太監秀華，又皆宋名下也。不數年，恩卒。盧受自此以掌東廠兼司禮監印，卽率意妄奏。若籍王體乾產可百餘萬，足備京城河上河工之用。後不能實其言，遂借影匿爲題。逮體乾名下李晉、田玉、劉文忠、趙本政等於東廠，並沒晉等產。凡親屬牽連者可數百家。都中爲之不寧。承芳旣不稱任，於九月十五日，亦褫逮刑部獄。晉等尋自東廠送刑部獄。承芳凡兩次督廠，所參送內犯董貴、常國安、徐進喜等，外犯高騰震、高瞻昆、崔茂槐、路文顯等，計二十餘起。恐暗中肆毒報復，乃買許多厚木板，將所住房上下四旁徧壁廂之房門院門，皆換以堅厚者，怖怯不寧。人多笑焉。後部覆擬絞，遂吃素叩佛，書寫佛經。復虔事呂純陽仙師，每夜禮拜北斗。至辛巳春，遇赦。蒙內閣范相公復粹釋承芳罪。御筆特改承芳外衛軍。晉等亦充外衛軍。初萬曆庚申秋，神廟賓天，光廟念典鑿局郎

郝義潛邸勞久。陞秉筆掌東廠。兼尙膳監印。其年冬。義辭任閑住。先帝以沈蔭掌東廠。今曾秉筆張邦詔。郝隱儒。乾清宮管事。劉時登。皆義名下也。天啓二年夏。蔭爲逆賢。退斥閑住。宋晉掌東廠。三年冬。宋私宅閑住。逆賢掌東廠。慮受以天啓元年五月辭官。逆賢矯先帝旨。發鳳陽。准王太監安辭印不掌。而王體乾自元年五月至崇禎元年四月。掌司禮監印。兼掌御用監印。尙膳監印。逆賢退後。所遺東廠亦體乾掌也。自此之外。如神廟時秉筆邢銳、宋坤、許成、及隨堂李壽、冉登等若干人。光廟時秉筆魏學顏、田詔、崔文昇等若干人。先帝時秉筆杜茂、劉用、劉克敏、裴昇、史賓、張文元、諸棟、李晉、吳進忠、陰相、王敏政、郝隱儒、王朝輔、趙秉彝等若干人。亦皆典禮大內臣。顧不能遍載也。

# 酌中志卷之六

## 大審平反紀略

刑獄者重事也。我國家每年熱審之外，凡遇丙辛之年，卽特勅司禮監掌印太監一員，前往三法司錄囚，名曰大審。夫必於丙辛者，丙協於明，辛者新也。欲在上者必明，照覆盆在下者，既經此一番鍛煉，期於悔罪自新，斯不負祖宗以來欽卹之至意也。憲廟時，司禮監掌印黃太監賜五年大審，值大司寇陸公瑜大廷評王公概時重犯中，有兄與人鬪毆，其弟幫因而致死，坐弟抵償，黃太監欲從未減，二公持不可。黃大言曰：同室之人鬪者，尙披髮纓冠而往救之，況其兄乎？正該在矜疑之列，二公無以應。卒饒死改戍，事載沐化類編。夫此猶細犯耳，至神廟時，御史曹君學程以建言久繫，中外憐之。萬曆三十四年，先臣陳太監矩掌司禮監印，少司寇沈公應文署刑部事，於是先會同總憲大理卿，共具公書與先監曰：茲者伏遇聖明，舉五年欽卹之典，而臺下奉命出讞，雖係先朝令申，實千載一時。蓋朝廷將以詔赦之未釋者，而并蘇於熱審之時，幸臺下又以慈悲之度世者，而得行乎全活之惠，將丹書同注生之錄，罔圖有福堂之謠，豈獨諸囚籲天頌聖，哀鳴望援，而生等叨列法司，職在昭雪，於臺下實有非常之希冀矣。昨承開列，可原重犯六十二起，澤及枯骨，明燭覆盆，甚感甚感。夫入井赤子，惻隱之所必先，納溝匹夫，聖神之所甚憫，故知臺下仰體皇仁，廣行善事，更有匪夷所思者。蓋古人有宥一人而千萬人感泣，生等敢爲臺下誦言之。曹

御史狂戇批鱗。不識忌諱。囚繫十載。來日無多。聖慈如天。待以不死。彼日夕焚香頂戴。銜恩無極。第其有近百替母。倚閭堪憐。母既強視息。以願見子之還。子亦忍須臾。以思與母訣。颺颺爲伍。桎梏爲親。已微喘之奄奄。迫夜臺之寂寂。長安齒髮之倫俱惻。生等狐兔之悲可知。臺下地切紫宸。春先幽谷。豈靳夕奏。解此南冠。況朝鮮之役。釋放逮繫。在詔旨燦如日星。而欽卹之典。徧及繫囚。於言官豈靳雨露乎。生等特借重臺下。會疏叩闕。萬代瞻仰。在此一舉。至於遵肆赦而請釋者。既未奉有明綸。則從熱審而并上者。自應不拘往例。不然。朝廷詔令爲虛文。而法司壅闕負重譴矣。故於臺下擬釋之外。輒有奏記。皆灼見其有生之路。而不欲使有向隅之夫。若以一二情罪已確。應與衆共棄者。俱據實奏聞。以祈酌議。無非共襄公平之典。而逆知臺下之虛懷涵納者也。仰希鑒照。不勝延佇云云。至七月初九日。先監領勅審錄。至初十日。方審至曹御史。除會同三法司具疏外。先監曾有奏帖。內稱臣矩。本月初十日卯時前。到大理寺會同三法司侍郎等官沈應文等。照例升堂入座會審。至廣東司。有斬犯罪人一名曹學程。哭告犯人原係御史。爲東事妄言得罪。監候十年。悔過不及。豈敢惜死。惟是原籍廣西。家有老母。九十餘歲。經年盼望。生還一面。犯人在監。晝夜憂思。患疾沈重。若母憂死。犯人不得一見。忠孝兩失。雖死於九原。不成人類。望乞欽命列位。轉奏聖明。赦宥得生。實全母子二命。世世子孫。感戴天恩。臣向本犯說。你雖係言官。因言得罪。激聒聖上。況是欽定人犯。屢有嚴旨。誰敢輕議。臣又向各官說。先生每怎麼說。有三法司沈應文等說。曹學程愚戇言官。不識忌諱。罪實自取。雖係欽犯。不敢輕爲擬議。但東事仰仗天威。久已平定。本犯監候十年。

懲創已深。又有九十餘歲垂死老母。今遇欽卹大恩。我每職掌所關。正當仰體聖仁。大德好生。況覩本犯皮肉銷鑠。氣息奄奄。萬一髮死。罔圖望恩無日。若不具疏。後來難免溺職之罪。理當奏請定奪。煩欽使大人轉達天聽。有科臣梁有年等說。曹學程自知罪戾。緣係欽犯。不敢輕議。聖度如天。定無留滯。況今宮闈疊慶。千載奇逢。赦過宥罪。無處不及。今審稱伊母年九十。朝不保夕。本犯亦奄奄待斃。衆所共見。幸遇欽卹之時。正當仰體聖明。好生德意。合詞上請定奪。庶免不言之罪。擬此。臣又向各官說。這事情重大。如何批語。會議批奏請二字。臣謹奏。知是時神廟在宥有年。侍聖母慈聖老娘娘於慈寧宮。聖母已聞曹御史家有盲母九十餘歲。亦惻然憐之。是歲八月十七日。神廟萬壽聖節。躬詣聖母朝謁。言及祈天永命之事。漸及刑獄註誤之臣。神廟聖性至孝。卽跪承恩旨。至十月內。始將曹御史釋放。內犯張楨則未允也。又光廟於三十三年十一月十四日。誕生熹廟。正值慈聖老娘娘壽齡六表。喜育元孫。三十四年春。神廟加上聖母徽號恭熹二字。詔赦天下。光廟生母恭妃王老娘娘。進封皇貴妃。是以曰宮闈疊慶也。先監於曹御史一案。在神廟御前造膝口奏。語多祕不得聞。實暗有贊解力也。再味三法司公書濫厚詳婉。不以未同爲嫌。先監奏記亦委曲明割。慈祥藹惻。真可感動天心。義服中外。於以見當時納約自牖之義焉。宮府同中之雅焉。至今讀之者。宛在心目。詩曰。彼美人兮。西方之人兮。王制曰。刑者側也。側者成也。一成而不可變。故君子盡心焉。蓋神廟自萬曆甲辰年之後。停刑之旨無歲不下。真亦有所感而云然耶。抑遵聖母慈訓之一證也。猗歟盛哉。先監侍神廟左右。此平反一事。并妖書一獄。總非他人所能望其後塵者。曩臣敬

敝梗概。以恭識仰止之思於萬一云。



# 酌中志卷之七

## 先監遺事紀略

先監陳公諱矩。字萬化。號麟岡。北直安肅縣人。生於嘉靖己亥六月二十九日。至丁未冬選入。派秉筆高太監忠名下。任司禮監。萬曆十一年籍沒馮太監保時。已任典簿。後陞監官。至十九年春。代藩奉國將軍廷堂有罪。革爵禁錮鳳陽高牆。先監奉勅押發。既竣事。道經安肅過家上塚。有皇華紀實詩一卷。沿途廉靜寬恬。驛遞感悅。皆以佛稱之。詞臣中講官。惟與郭明龍正域。李九我廷機先生善。然一揖之外。亦絕不通往來。後於市書中得黃離草。每披讀玩賞曰。真宰相才也。先監學術醇正。每向人曰。我只守八箇字曰。祖宗法度。聖賢道理。其存心兢慎如此。一日姜士昌有疏。偶動神廟怒。要行杖處。先監憂恤之甚。形於顏色。蓋自杖王德完時。卽曾與田太監義力諫未允。今豈可當我掌印。而又行此事乎。正跌坐深念。忽被召至暖閣。語頗久。祕不得聞。及出。喜動眉宇。左手持姜疏。右手招宮人索黃紙套盛疏發下。其旨則神廟御筆所書行草。按舊制。凡有御札。卽片紙隻字。必用黃紙齊口。半套裝盛。識尊敬也。其仰全君德如此。雲南民變。戕殺內官楊榮。神廟震怒。欲詳核激變狀。逮處地方官。是時四明沈相公。偶註籍。惟歸德沈相公入關。卽具東達先監。先監卽本其意密奏曰。奉使內臣。固仰遵萬歲爺法度。不敢妄肆。或跟隨下人有不曉事而玩法者。若但歸罪有司。緹騎逮問。誠恐往返路遠。耳目驚慌。傳聞不便宜。從寬行勘結局。遐荒幸甚。

神廟嘉納焉。福建內官高竦進到所獲呂宋器械方物。傳先監擬票著內庫查收。先監奏曰。此島夷小醜。區區微物。著內庫收。恐看得聖朝希罕異物也。今此旨宜曰。著贓罰庫查收。其慎重國體天言如此。鎮撫司刑部所監誅誤諸臣。內外重犯。先監每以上帝好生。無知入井爲念。多方曲存。培養聖德。遇事卽諫。草多不存。是以潛移默化。外廷不盡知也。榮昌公主者。神廟之嫡長女。光廟之姊也。曾與駙馬楊春元反目。春元拂衣歸里。神廟怒甚。特召先監至御前。欲重處內官外官。先監奏曰。此閨壺小事。不宜上動聖心。傳聞不便。遂擬諭閣臣。以爲覽東廠事件。某不知緣故。出某門往固安縣去訖。遂俯允施行。及召春元回。罰於國子監演禮以懲之。此先監調劑之力。又不止調護士大夫已也。萬曆中年。凡正月燈市節。司禮監掌印等。各購擺設器物。書畫手卷。冊頁之類。進御前。一日。先監偶購宋人所畫鬼子母揭鉢圖手卷。內有楷書金字寶積經。鬼子母失子緣由。一百六名人題跋甚多。元趙孟頫跋云。佛以自然勝。而用智力者。以勉強求。西方竺聖。設此見靜聖作爲。自然勝。勉強以之覺世。抑以見佛道之深。不獨有功於名教也。而後世人心好善。皆賴之云云。其畫也。黯淡朽素之中。神彩煥發。世尊之慈容可掬。鬼子母之悲煩可憫。鉢內之兒。以手據地。兩目外注。欲出不得出之光景。宛然羣魔怪之兇狠。獠惡眉目如生。種種伎倆。繁而不紊。必非宋以後人所能贋爲者。先監曰。此卷甚好。然且未可進。恐萬歲爺疑我諫阻打宮人也。遂將大學衍義補一部。同此手卷。著人託王伴讀。安轉送東宮。說陳矩頂上千歲爺。乞容覽此書。暇時并覽此卷。蓋於進奉之中。已密寓獻替之意云。先監極愛左國史漢字學諸書。周程張朱諸集。菲衣食。淡滋味。貌雖不甚魁。

梧音雖啞而不揚。然白耳黑齒。雙眸如電。昔童時至京。大金吾陸炳一見。咤異曰。此子功名。異日不在我下。而令名過之。萬曆二十六年。以秉筆掌東廠。三十三年。以掌東廠兼司禮監印。預卜墓地於香山慈威菴側。建一石塔於塚上。曰太極鎮山塔。暨一石坊於墓道前。曰勅葬中使神道六字。有石門。顏其上。曰還一仙洞。至三十五年十二月十三日辰時。在內直房端坐以逝。神廟極爲悼惜。准從仁德門寶寧門。由廊下家出。元武門至東河邊。將暮。仍從北上東門西門。乾明門西安門出。至簿子衙衛宅。特傳造立棺。如僧家葬法。以無涇中正樂善令終之美云。賜諭祭九壇祠。額曰清忠。更給護勅。備載房地數目。皆殊典也。文武臨弔送葬者。素白塞路。壅不能行。山陰朱相公賡。晉江李相公廷機。福清葉相公向高。親詣立棺前。祭奠。其文有云。三辰無光。長夜不旦。其敬慕推崇如此。神廟推恩。特將掌家常雲陸乾清宮管事。後掌針工局印。管文書官馬鑑。師明苗全。俱陞暖殿近侍。光廟登極。復陞常雲隨堂。予告先帝陞鑑乾清宮管事。先監自秉筆。外廷皆不識爲何人。至癸卯冬。妖書一獄。保全善類。誠足回天。仁能覆物。知不知皆感服也。語具憂危。竝議後紀中。及丙午秋七月大審。至曹學程一案。先監多方婉救。極力平反。神廟聖孝覽而哀之。特俞允焉。具大審平反語中。自此士紳益敬愛之。先監每暇。卽玩味大學衍義補。或令左右誦聽。乙巳之冬。奏進二部。請發司禮監重刊。先監卒後數年。始完。惜督刻抄寫者寡。昧無識。其中頗多舛錯。至今沿習未正。良可痛也。先監最愛周禮。恆向左右曰。文中子有言。如有用我者。執此以往。又曰。我曾見一書。內載宋章聖講周禮。至典瑞有含玉。問云何義。講官對曰。人臣卒給含玉。欲令骨不朽耳。章聖曰。人臣俱要

名不朽。何用骨爲。先監每欲將陳鳳梧所刻周禮合集說考註訓。雋照向句解次序。勒成一書。亦欲奏請重刻。而志竟未遂也。先監又篤好易。萬曆年間。偶見坊間售有義經十翼。乃慈谿傅文兆所著。曰太初易。古周易玩辭篇。觀變篇。觀象篇。玩占篇。大與舉業不同。而推明古易次序上下二篇。十翼十篇。將三聖易學闡明可愛。漢儒費直亂易。剖辨無餘蘊。且主文王作爻辭之說。與周公無涉。先監嘗曰。揚雄解難。魏伯陽參同契。劉勰文心雕龍。俱直云伏羲文王。曷嘗有一字及周公哉。兩漢及梁。去古未遠。爾輩識之。及先監卒後。纍臣被常太監雲註誤鑿鎖。又先年。曾聞開雍顧老師說。國子監新刻經史。不可不買一部。纍臣既抱罪無所事。遂購得十三經二十一史。日披玩之。則周公繫爻辭之說。誠始於唐之孔穎達無疑矣。史記註則十翼井然。前漢志則三古三聖人。又三國志高貴鄉公視太學。及別史列傳。自唐以前都無周公作爻辭之說。其孔穎達杜撰。費直亂敍。不辨已明。宋程子以今易作傳。朱子以易作本義。奈今繩於舉業。拘於大全。誰敢如博文兆起而議之者耶。易也。十翼也。周禮也。天如假先監數年。則表章次第奏刊。豈止一大學衍義補而已哉。今上聖主右文極矣。惜臣下落。無先監之儔也。惜哉。先監遺像在德勝門裏。欽賜會館祠內。至今見者多淚落。其德望孚人未艾可知。先監九歲選入。萬曆丁未年卒。享壽六十有九。其同母弟萬策。中壬辰科進士。受先監之訓爲多。廕大金吾陳居恭。萬策第四子也。誥贈是以及先監之二親焉。

纍臣若愚曰。先監雖內臣乎。然其才識品望。今古希有。自萬曆辛丑。纍臣選入。得侍左右。未嘗見疾言遽

色體雖清羸。若不勝衣。其處大事。決大疑。羽翼忠良。仰全君德。卽賁育之勇。雷霆之威。不少易者。性不好飲酒。凡飲稍暇。卽鼓琴歌詩。或跏趺靜坐。自皇華紀實之外。有香山記遊。閩中紀述。惜未刻也。至於聲名貨利。了無所好。聚蓄書畫玩好之類。嘉靖庚戌之變。□薄都城。高太監忠披堅執銳。扞禦著勞。先監是時二十歲矣。目擊心慕。是以有志經濟。每留心於國家歲計出入。應改折者。應獨賑者。時密奏節縮。以蘇民困。更留心於邊塞衝險。士馬登耗。會審妖書。曾與大司寇蕭公大亨相談。蕭久歷塞上。極爲敬服。萬曆乙巳冬。遼東撫鎮議招徠流民爲功。遂將鴨綠江以西。寬奠以東。張其哈喇佃子地方數百里。棄之於□□。先監聞之。心頗不平。惟仰屋竊嘆已耳。見遼左棄地語中。至盧大司禮受掌印時。其掌家王朝弼。卽今之王朝應者。潛差張書紳等。往撫順做買賣。七宗惱恨之。書人言嘖嘖。章滿公車。蓋原委根因。盧原不知由。應朝私遣也。天下事尙可言哉。曩臣曾見嘉靖年間。詞臣裴君用卿所著書。曰雲岡選稿。內載奉使朝鮮。回條奏邊事。明悉議開海運。復舊遼陽。則糧可直達。開原城西老未灣。開原與廣寧相近。聲息可通。守邊最易。曩臣十餘歲。便隨先將軍宦遼陽。寓三年。其地理邊務。民情風俗。至今尙存胸臆間。思其土地瀕海。難脩邊牆。則偵哨獨不可加意乎。萑葦蔓衍。而屯田車陣。強弩騎射火器。獨不能以正兵爲奇兵。而守禦乎。五年滅□。雖袁督師一言自誤。然而無米之炊。恐又煩局中者費籌策也。全遼已矣。痛尙未復。又何有乎棄地。何有乎舊遼陽哉。西而薊門。戚帥繼光之餘制盡弛。春秋兩班脩築。恐不無鹵莽塞責也。再西而宣而雲而陝。以類推之。恐山西更甚。總之崑崙罷匱。處處待哺。或不甚懸絕也。回想我太祖開國時。有河

套有東勝。有開平。有大寧。有舊遼陽。是何等幅員。何等強盛。唐李翱有言。神堯以一旅取天下。今不能以天下取河北。豈不痛哉。纍臣幽繫圓扉。席藁待斃。回想先監。觸目傷心。祇空抱杞人之憂。向誰洒英雄之淚。如九廟之靈。憐鑒若恐血誠。願於伏法之後。遊魂爲變。誓作厲鬼。俾敵之金鼓無聲。而我之敵愾增壯。斯生雖無益於時。而志或可酬於冥路。卽所以上報國恩。下雪父恥也。纍臣非敢於談兵喜事之人。又非敢輕洩省中之語。惟念以羊易牛。非胡齧何以彰主心之仁。而楚王太子之賢。須鍾儀始達於晉。是以臚列於首。不憚疊疊。

# 酌中志卷之八

## 兩朝椒難紀略

光廟自元配孝元貞皇后郭老娘娘曾誕公主未育外有孝和皇后王老娘娘誕先帝卽封才人者也。又今上本生聖母賢妃劉老娘娘卽孝純皇后也。又傳老娘娘卽懿妃誕六公主七公主。又西李老娘娘卽誕生八公主。後因公主選婚時始封康妃者也。東李老娘娘卽莊妃賢而無出。又有趙選侍未得封號。極與逆賢客氏不合。先帝卽位之後。矯旨逼縊殺之。當臨命之際。將光廟賜過首飾金珠之類。列於案桌之上。沐浴禮佛。西向遙拜。痛哭良久。從容投繯。至今尙以宮人殯。無人肯爲申雪。客魏仍矯旨將名下答應近侍王亮等數人各加酷責。降發南京。今見存可問也。光廟莊妃東李老娘娘性仁慈寬儉。簡重寡言。儼若五六十歲。宮中多感頌之名位。素在西李老娘娘前。及奉先帝聖旨。撫視今上。凡起居食息。責內外執事。愛護關切。勝於親生者也。凡頤養聖躬。勤於學問。雖皆由天縱。然誘掖獎勸。蓋莊妃老娘娘亦間有力焉。承奉徐應元者。逆賢之同官。涂文輔之老叔。先爲承奉副。後將承奉正。張忠退斥。而應元爲承奉正。王文政爲承奉副。應元旣倚逆賢。借勢驕蹇。每叩見時。或揚揚自得。或答詈左右。無所忌。莊妃老娘娘爲人謹重寡言。負氣憤鬱。遂致病薨。彼時逆賢法正嚴急。宮中間有知是應元氣薨。不敢洩。是以應元在鳳陽病死。人多快之。光廟臨御未久。三宮未備。痛哉。先帝后中宮張老娘娘卽懿安皇后也。河南生員張國紀

之女。天啓元年夏。大婚禮成之後。客氏憚后賢明。遂於宮中捏言。后非國紀之女。云是重犯孫二之女也。其年秋。臺臣游士任。以募兵之差。已陞辭。瀕行。特上疏。力劾客氏。蓋首犯兇鋒之第一人。故乙丑緹騎之逮。亦首及士任也。客氏甚恨之。天啓三年。張娘娘覺孕。客氏逆賢。乃逐去宮人之異己者。故托不更事之宮人答應。一日。張娘娘偶腰痛。受捶過度。竟損元子容胎。東宮王娘娘。京師人。西宮段娘娘。南直人。俱無出。裕妃張娘娘者。已有身。鋪宮膺册妃禮畢。逾期久不乳。且有違言。客氏逆賢。悲其異己。於先帝前力譖之。仍矯旨。將宮人內官俱逐於外。絕其水火。獨將妃封閉宮牆之內。無所飲食。經數日後。天雨。尙力疾匍匐於簷雷之次。伏啗雨水數口。氣絕宮門外。看守宮人回話。奏知先帝。將妃革封號。如宮人例。焚化於淨樂堂。至今上登極。始復封改葬。如禮云。成妃李娘娘者。天啓四年二月三十日誕生二公主。是日地大震。其後公主薨。值中宮張娘娘偶病。范娘娘卽慧妃封皇貴妃者。復失寵。任娘娘卽容妃封皇貴妃。尙未誕生。皇第三子時。李娘娘間侍先帝寢。偶暗爲范娘娘乞憐。客魏偵知之。遂矯旨革封。絕食飲。欲如處裕妃故事。仍將內府供用庫管理內官李謙。以爲成妃用事人也。卽降發南海子。尋矯旨殺之。先時成妃見裕妃。生生餓死。遂平居時。凡櫺瓦磚縫之中。多暗蓄食物。至此暗得竊食數日。幸客氏逆賢怒少解。始退斥爲宮人。遷於乾西某所居住。僅僅得幸存。至今上登極。特復其封號。養膳居於慈慶宮之某宮。此外馮貴人等。或絕食勒死。或乘其微疾而暗害之。總因偶有違言。誤觸客魏所忌。而直之死也。在先帝亦未如之何也已矣。誰秉內政。而忍令至此極也。嗚呼。



# 酌中志卷之九

## 正監蒙難紀略

故司禮監掌印太監王公諱安，字允逸，號寧宇，直隸保定府雄縣人。萬曆六年，選入皇城內書堂讀書。擢司禮監爲掌印馮太監保名下，已故秉筆曾任承天監守備太監杜茂照管。杜，陝西人，耿介好學。監少之時，讀書習做，多玩嬉不勤苦。杜將監坐於椽上，用繩縛監股於桌之兩脚，或書做不中程，卽以夏楚從事。其嚴督如此。及馮籍沒後，監以年幼，未經退斥，蓋張宏輩卵翼庇護之也。神廟二十年後，廉知監學問優博，性孤介，又有先監矩密薦，遂於光廟未膺册立之前，御點爲皇長子伴讀。光廟之乳媪姓曾，直隸人也。光廟升遐，發引後，神主虞祭回，進德勝門，曾氏長跪路傍，伏塵號痛。時禮臣周道登等，大金吾駱思恭等，感嘆之，見吏科侯震陽疏，光廟生母恭妃王老娘娘，居景陽宮，是以母子同住。曾氏毫無怠肆，光廟髻鬢，曾氏卽出宮不入矣。萬曆二十九年春，光廟移居慈慶宮，從此母子睽隔不相見，惟監擁護保衛之功爲多。及是年十月十五日，光廟膺册立後，神廟點徐文兆爲典璽局郎，韓本用爲紀事，吳進忠爲典璽局寫字，鄒義、王安、李實等伴讀，盧進爲典膳，張忠、劉忠、劉朝等，各爲典兵等局官，陳應科、王輔等爲近侍。及光廟大婚禮後，講讀漸稀，佞臣王輔、劉朝等，日以鼓樂毬馬弓矢，導引獻諛，甚而私向外廷，指稱令旨，以囑託事情。初，徐文兆與典兵張忠相爭，光廟奏聞，神廟震怒，俱降做淨軍，鑿鎖。皇貴妃鄭娘娘再三懇赦，後

知其曲在張不在徐。遂復原職。而張忠遇赦不赦。至四十八年七月始釋。竟以病廢。此張忠非承奉張忠也。而徐文兆、盧進皆年老病卒。先是萬歷四十幾年。王輔有罪。被東廠盧太監受奏神廟。下輔法司獄。輔在獄中。益狂肆不悛。復將所使小厮打死。夜沉於井。事發問絞。至天啓六年。王體乾奉旨五年大審。逆賢力救出之。後陞天壽山定陵簽書。改姓馬。蓋輔亦監之讎也。所以逆賢臭味同焉。初光廟在青宮時。偶宮人王秋榮縊死。監執欲實奏神廟。而鄒義等恐滋事端。遂以病故奏聞。於是光廟每憚監嚴直。優禮雖加。而心疎畏之。乙卯五月。梃擊時。光廟令旨稱本官云云。監視草也。神廟賜光廟銀數千兩以慰之。始陞監。玉帶監是時已久。謝病家居。凡年節冬至千秋等節。或入宮叩見。一日半日而已。近侍魏朝、施大用等皆監名下也。朝後改名王國。陞管事掌兵仗局印。天啓元年。爲逆賢所害。施大用素占風望氣。善躲閃。得苟存。監旣萬歷年間。頻杜門養疴。時沉酣典籍。無書不窺。每寫扇送相知士大夫。而門多正人。凡事多效法。先監之所爲。先監形不魁梧。而耳白過面。兩目如曙星。闊口黑齒。然聲甚啞。十步之外。人不能聞。監頗效其啞。蓋拘於惜氣養生之術。又以爲先監之賢。在皋陶之瘖也。人多以此少之。光廟登極。監匡輔秉政。凡潛邸著勞者。各營求美印。監惟掌巾帽局一印。而納約自牖。知無不言。八月初六日。周朝瑞疏言。慎初三。要光廟震怒。欲因金花銀兩杖朝瑞。賴監力救。得降調。光廟孝養神廟。皇貴妃鄭老娘娘於慈慶宮。及保全。久事神廟。管事牌子魏學顏、胡進、常雲等。各陞秩予告。及發內帑助邊。起鄒元標、王德元等。議興大工。一月之間。善政種種。皆監獨力贊導之也。監爲人清癯多病。後服人參始漸腴。然不甚強壯。凡隨侍先帝。

朝講皆賴人扶掖始行。初移宮時，亦曾聽魏朝之言，曲救逆賢之命。見客魏始末語中，監自柝，兩目爛爛，素與文書房金太監忠契厚，金所刊御世仁風列監名焉。逆賢擅政之日，此書人皆不敢蓄。後金亦蒙今上眷注，陞秉筆御用監印，金性寬緩，而監性卞急，然同年契愛，無踰兩人者。先帝登極月餘，客氏寵伊始，曾欽賜客氏人參一袋，約重二三十觔。逆賢卽攘奪抱赴監直房，曰：天賜富貴，叩獻作湯用。其趨附諂諛如此。監自泰昌元年八月，至天啓元年五月，其直房先在乾清門裏之西南廊，後遷住於隆道閣西小房，每稱病靜坐。曾蒙先帝御書輔朕爲仁明之主七字於扇，以賜之，不常在御前，或有事，但搥拽一至而已。凡有文書，皆趙恩、張永齡等呈稟，監不開口明說，止於膝上或案上，用右手食指作畫字寫字形，或眼語頤指，非久侍者不能通其意，間不能會意，而致怒遭責者比比也。初監作伴讀時，杜任承天守備，叔姪曾失和，先監每調劑之。及監侍先帝，奏薦杜某，舊人多學，陞秉筆，未久任，以老病卒。又謀欲於留都改葬馮太監骨骸，未果，而罹禍焉。監性雖峭直嚴急，然頗樂道人善，凡有寸長者，皆不忍泯。天啓元年三月初，興光廟陵工大工，秉筆高公諱時明者，掌內官監印，恐不勝任而辭，印之第三疏有曰：微臣局量已盈，敝車難以任重云云。監擊節賞之曰：破車硬著好路兒，化得妙，此誰筆也。高公曰：本監寫字，劉時泰也。纍臣原名時泰，避光廟年號改此。監曰：名下果無虛士。老公宜厚遇之。高公至直房，隨喚纍臣慰勉，以銀兩錢幣旌之。且顧左右曰：怎得滿皇城官人，多好學讀書。如劉長官，我方喜也。又先監知於萬曆乙巳冬，奏請神廟重刊大學衍義補，至卒後十餘年始刊完。纍臣曾具草募化同會之人，捐資印造，焚化一部，以慰泉下。

供安一部以示永久。其單前弁言乃己未年罪中語。監後見而愛之。遂留置之案側。凡夙望多舉。如邊靜寧趙思諸人。間指示之曰。此我輩中有志懷本人也。其獎誘後人如此。監於天啓元年五月得告。隨奉旨著掌司禮監印。乃眺遊西山。辭不卽赴。其疏有云。臣願領罪不領官等語。蓋一腔忠憤。氣稍不平。致小人乘隙攘其印。而阻於內。又有邪人建議於外。而阻其出。仍復構謀陷害。以畢其命。方逆賢欲下手殺監。尙懷前救命恩。猶豫未忍。時王體乾急欲掌印。遂以危言動客氏。客氏密向逆賢曰。外邊或有人救他。聖心若一回。你我比西李何如。終吃他虧。賢意始決。遂降監南海子淨軍。卽陞劉朝南海子總提督。令代宋太監晉。以宋長者不忍殺監。而朝敢任之。亦以朝平素與監不合也。朝到任之後。遂禁其家人。絕其飲食。今日改調某園。明日改調某鋪。漸漸危迫。一二村民不忍監餒。或暗餉一糕一餅者。卽痛遠斥之。監饑甚。自於籬落閒。搽創蘿蔔。袖藏於夜半竊食之。又數日不死。朝欲徵客魏之喜。遂密授意於下手者。撲而殺之。備見崇禎元年十二月內曹太監化淳等參丁紹等疏中。初監奉有掌司禮監印之旨也。原擬疏辭。再奉溫旨。卽出不意。科臣霍維華有疏規刺。監以抄揭差名下曹公見高公。是時高公已居林下。頗爲咨嗟。然已無可奈何。又經路熊廷弼再起赴遼。雅敬重監。及都憲鄒元標等。後聞監亡。咸爲之流涕。悼惜也。監受窘未卒之先。秋雨霖霖。霏微慘黯。天日無光。怒風悲號。高公徐步簷前。仰天嘆息曰。王老爺難矣。又數日復密向疊臣曰。我夢王老爺青衣小帽來見。默而不言。其必西歸乎。主僕私語。淚不覺盈盈下。恐人見。隨拭之。疊臣得舊唐書列傳讀之。有張柬之等五人。不得令終狀。誦與高聽。又至別讚有曰。天地爲籠。去

將安所。更心如刺。促收之。不忍聽焉。至翌日。聞監果死矣。時辛酉九月二十四日也。其名下惠公。進泉。曹公化淳。王公裕民。楊公春。張公若愚等。皆重責。酷刑備至。凡發南京者。晝則鑿鎖。夜則打更。曹公等數人。先在北京更鼓房打更。不數月。亦發南京。又文書房趙恩。數人。張永齡。寫字史輔民。皆監之經理本章者。及監掌家張和等。俱被逆賢害死。嗚呼惜哉。監之爲人也。器宇嚴毅。鶴立昂霄。始惑魏朝之言。力救逆賢之命。而認賊爲子。誤中妖嬭之詔。遂爲所圖。視王體乾爲道義友。卒攘其位。而斃其命。世事糾紛。輾轉誠有出於意料外。真不可以成敗論英雄也。常辛酉五月初。高公最先告病。候旨詣河邊直房。監尙在官。曾具密奏。薦留高公內引。云未有仁而遺其親。未有義而後其君之句。高公力止之。若此奏會上。則高公必繼監受害。豈能至今日哉。自光廟寵眷西李老娘娘。遠在東李傅兩位老娘娘之上。監恆不憚。見西李老娘娘未嘗叩也。西李老娘娘下用事之李進忠。姚進忠。劉尙禮。姜昇等諸人。招權納賄。無所不至。既移宮之後。便該以正義尊崇神廟。昭妃老娘娘。俾先帝朔望朝謁。盡承重之禮。凡有應議之事。間有奏請。一一施行之。亟屏退客氏於外。而制馭逆賢。優以金帛。隆其虛銜可也。乃西李既退。而客氏炎炎。體乾縮臍。而逆賢日盛。誰作厲階。毒痛中外哉。於此見監讀書極博。品極高。守極介。性極骨鯁。有大臣風。其實於經國之體。圖事之機會。不無疎漏。蓋有未能盡善者焉。悲夫痛哉。當今之世。能再得憐才勉學之人如監者。誰耶。人之云亡。邦國殄瘁。豈非天哉。今上登極後。卽霽恩卹。崇禎二年夏。曹太監化淳等。復具疏。催部覆改祠額名。復蒙聖恩。賜祠額曰昭忠。爲後世榮也。監廣交遊。善貿易。靈濟宮西有布鋪一處。歲出息

若干各處房租又若干。是以雖處青宮冷局二十餘年。而財用充裕未嘗乏也。監又善書好奕。奕或輸則必詭著以求勝方已。又矜滿孤立。卞急馭下。頗爲知道脫俗者惜之。是以知其涵養尙未純粹。如先監矩也。或亦各成其是而已矣。

# 酌中志卷之十

## 逆賢亂政紀略

王體乾既掌司禮監印。逆賢既竊柄。遂陞梁棟、諸棟、史賓、裴昇、張文元爲秉筆。而殺王太監安。復驅逐原選。熹廟張后之劉克敬於鳳陽。而亦矯旨殺之。擯斥掌東廠之沈蔭。而昇宋晉。驅逐大臣王紀。滿朝薦鍾羽正等。詞臣文震孟等。建言劉宗周。王心一等。託心腹掌班劉榮。結交閣臣沈淮。導上於武。暗通線索。設立內操。差劉朝、胡良輔、紀用等。往山海關送器械。實所以開內鎮守之基也。巧留客氏於內。箝制宮壺。先殺光廟之趙選侍。後殺熹廟之裕妃貴人等。如刈草菅。又革成妃李娘娘之封。絕食幾死。夫以刑餘賤品。而專擅無忌。悖逆寬殘如此。名之曰逆。不亦宜乎。又導引先帝在宮中習放鳥銃。天啓元年。失記月日。有御前煖閣王進在先帝前放銃。銃炸。將進左手打得無蹤。幾危聖駕。改陞王進天師庵草場貼場。四年六月十五日午時。南方有五色雲起。一段鮮明。良久漸散。靈臺占曰。是爲景雲。此喜色也。又曰。文士入用。七月六科廊災。五年二月內視太學。逆賢王體乾擅改儀注。凡賜坐大臣。不得賜茶。逼先帝速還宮。至五月十八日。祭方澤壇回。卽幸西苑。本日申時後。中宮張娘娘已回宮。客氏同逆賢共在橋北淺水處。大舟上飲酒樂甚。先帝與體乾名下高永壽。逆賢名下劉思源。皆十七八歲小璫。在橋北水最深處。泛小舟蕩漾。上身自刺船。二璫佐之。相顧歡笑。若登仙然。忽風起舟覆。二璫與上俱墮水。船上金大盃酒具盡沒。當時

兩岸驚譁。皆無人色。逆賢客氏手足無措。逆賢亦自投水。然遠不濟事。最先奔趨入水。救先帝聖駕者。管事談敬等也。高劉二暨子皆淹死。後贈陸乾清宮管事。本年七月十五日。逆賢親赴大高元殿作法會。禮放河燈。追薦之。蓋擅權淫縱者逆賢。而秉筆掌印者體乾也。九月先帝賜忠賢客氏各金印一顆。方二寸餘。四爪龍鈕玉筋篆文印。九字三行曰。欽賜顧命元臣忠賢印。曰。欽賜奉聖夫人客氏印。每顆金重凡二百兩。鑄刻者御用監也。篆字者中書也。餞金龍印盒。則內官監也。先是萬歷年間。乾清宮坤寧宮災。皇后之寶被焚。及四十二年福藩之國中宮例有與王妃戒諭一道。須用寶鈐識。垂之久遠。神廟軫念。匱乏命御用監以梨木雕刻代用之。模篆者中書謝稷也。終孝端顯皇后世。中宮寶竟未補。是時體乾頓忘之耶。今諛逆賢乳媪。而屑越浪賞。殊可惜焉。又天啓六年夏。體乾等奉勅到司大熱審。忍悖祖宗欽卹之意。重笞戚臣李承恩五十。以博逆賢一笑。其開廷杖之端。令重打萬工部爍。吳御史裕中斃於杖下。皆衆耳衆目所共曉者。至於逆賢下之掌家王朝用。係體乾結義契厚同年兄弟。所以逆賢擅政而體乾安。二十四款等疏上而逆賢安。及逆賢事敗籍沒。其無辜株陷者比比。而朝用復安。無非彼此庇護。網漏吞舟。是之謂已。按南樂相公之通內也。實自天啓四年十月初一日。享太廟遲誤。被臺省參劾。遂生生逼上陽關路。始與逆賢通焉。凡有書札。皆用閣揭摺子。親筆行書。外貼南紅紙。簽題曰。內閣家報。釘封。鈐曰。魏廣徵印。送至惜薪司掌家王朝用。朝用仍外加封。識畫花押。差心腹官人賚送逆賢。直房係李朝欽收掌。而李永貞。石元雅。涂文輔。念與逆賢聽。各命家下官人。照將姓名抄小楷摺子。藏於袖中。崔呈秀之通內也。始



自呈秀之舊居停許秉彝導引。凡有字帖及點將錄、同志錄、天鑒錄，俱將原本付朝欽收掌。而永貞、元雅、文輔亦各命照抄小楷摺子藏於袖中。每日早齊付逆賢直房。按名回話。今日陞官本內有無摺子姓名。參官本內有無札子姓名。面同簡舉。罔敢異同。其永貞之札，則繫臣所代抄騰者。也是以自擊最真。蓋傳遞線索，捷如桴鼓。秉彝係元雅掌家內官，監管理大工，催攢各省大木者也。朝用以逆賢掌家帶御乾清宮管事。凡永貞、元雅、文輔及劉應坤、王朝輔、孫進等，每日見朝即叩頭稱老叔。其姪王永祿亦驟蔭至都督同知，則勢燄可知也。逆賢奢侈性成，服色僭制，出外戴束髮冠，端陽懸珍珠牌總，而內織染局之掌印齊良臣及南京內守備楊國瑞等，劉文耀、胡良輔、胡濱等，各代爲繡造，或製衣袄褲，而金線蟒龍，或方補戎衣，而蒼龍頭角，較藩王止欠一爪。比御服僅讓柘黃。至於按節令應景製造，更從古以來所未有者，而晏然服飾，恬不爲異。且性貪饕善飲啗，尤好噉犬肉。秉筆涂文輔管事，劉忠每自鄉間烹來，於乾清宮大殿內以享。逆賢既飽飲，令其衆名下手奪口噉，須臾立盡，以爲笑樂。說者曰：殿內有神明，逆賢了不畏懼，其恣肆傲誕如此，目中知有朝廷乎？逆賢罪罄竹難書，茲聊記其亂政之略若此耳。



# 酌中志卷之十一

## 外廷線索紀略

天啓四年三月十九日。科臣傅樾參汪文言。既逮詔獄。罪不可測。計無所出。至五月二十九日。憲臣楊漣參逆賢二十四罪之疏上矣。奉聖夫人客氏者。先帝之乳媪也。久與逆賢私。司禮監掌印王體乾。柔佞貪狠。實黨附逆賢之元兇。戎首賊害椒紳之主盟國老也。與客氏日在御前。贊逆賢巧法庇護。軟語乞憐。而秉筆李永貞等。復幫助之。凡文武大小七十餘疏。概置不聽。賢既得瓦全。便從此改心放手。爲惡無所忌憚。實楊公此疏激成之也。其後將體乾名下李晉陞秉筆。田玉陞正陽等門提督。李永貞掌巾帽局印。石元雅掌針工局印。涂文輔掌御馬監印。而文書房之王敏政。李守質。楊國瑞等。各賞有差。皆酬保安之勞。賢之賞掌班紀用。及劉應坤復差往遼東。亦所以酬之也。崑山顧相公等。因楊公疏有門生閣老字樣。噴之。南樂魏相公。於是年孟冬之朔。又失誤享廟大典。遂與外廷大相水火。乃以己意用墨筆間點縉紳便覽一冊。極重者三點。次者二點。又次者一點。閣部詞林葉向高。韓爌等。何如寵。錢謙益。成基命。繆昌期。姚希孟。陳子壯。侯恪。趙南星。高攀龍。楊漣。左光斗。魏大中。黃尊素。周宗建。李應昇等。約六七十員。密付逆賢。皆目爲邪黨。託逆賢於御前。借事擯斥。而崑山居然首揆矣。體乾倡言開廷杖時。原欲杖林御史汝嘉。以危福清。林逃未獲。偶值皇第三子薨逝之變。工部郎萬燦適遭其毒。批此本者李永貞。從與御筆改此票。

者體乾阿逆賢也。天啓五年十二月，又杖斃吳御史裕中。凡在午門前喝令重打，屢換人尙嫌輕者，體乾  
驚也。初贊崔呈秀傳遞線索者，許秉夔也。其年十二月，復逮汪文言。至五年春興大工後，逆賢指稱看工  
催工名色，無日不與呈秀面會，卽屏人密語移時方散，或授受害人姓名如天鑒等錄之類。逆賢奉爲聖  
書，心甚悅之，以爲崔家疼我，贊我設法報仇出氣也。一時捏詞獻諛入告者，梁夢環、李魯生、曹欽程等也。  
五日一比，追賊之嚴旨，四六駢儷之濫旨，皆崑山等所票擬也。閣中俱有底簿可考，中書官可證也。凡逆  
子良卿之獎勅誥券文，皆內閣詞臣撰擬，用紅掩而揭奏，亦閣中有底簿可考也。凡內府衙門及關揭擬  
票，一應中旨創草者，王體乾、李永貞、涂文輔也。甲子之冬，南樂魏相公，旣手點縉紳便覽一本，又手寫所  
欲起用之人，黃克纘、王紹徽、王永尤、徐大化、霍維華、阮大鍼等五六十員，各加三圈二圈不等，密付逆賢，  
目爲正人。陸續黜用，至乙丑之後，崔呈秀密付逆賢之天鑒錄者，首列東林渠魁，葉向高、韓爌、孫承宗、劉  
一燾、趙南星、楊漣、惠世揚、高攀龍、左光斗、孫居相、李邦華、喬允升、王洽、曹於汴、李騰芳、錢謙益、姚希孟等。  
次列東林脅從，孫鼎相、徐良彥、熊明遇、沈維炳、熊奮渭、侯恪等。其後又列真心爲國，不附東林，顧秉謙、魏  
廣微、王紹徽、馮銓、王永光、霍維華、徐大化、周應秋、薛貞、崔呈秀、閻鳴泰、王在晉、楊維垣、卓邁、倪文煥、李魯  
生、吳淳夫、孫國楨、劉廷元、元詩教等若干人。同志錄者，首列輔臣詞林部院諸臣，卿寺則陳宗器、韓繼思、  
易應昌、張潑等。臺省則黃尊素、李應昇、劉芳、張慎言、惠世揚、房可壯、章允儒、劉宏化、蔣允儀、游士任、侯恂  
等。部郎常博則賀煊，今改名世壽。張光前、孫必顯、汪始亨等。藩臬俱失記。任子貲郎武弁，則趙隆美、許念

敬張念堂。卽張懋忠等若干人。最狠最重者三圈。次者二圈。輕一圈也。點將錄者。首曰天罡星。托塔天王李三才。及時雨葉向高。浪子錢謙益。聖手書生文震孟。白面郎君鄭鄭。霹靂火惠世揚。鼓上阜汪文言。大刀楊漣。智多星繆昌期等共三十六人。地煞星神機軍師顧大章。旱地忽律游士任等共七十二人。原不會詳開姓名。計魏廣微點的便覽該處的。並親筆所寫該用的。黃克纘等六七十人。卽付永貞。元雅。文輔。抄小楷摺子。又崔呈秀遞入點將錄。天監錄。同志錄。並東林姓名共四箇摺子。只永貞。元雅。文輔三人。各袖藏一分。御前傳出。削處某人。人多驚訝。以爲聖上怎就知道某係邪黨。某係門戶。某係熊廷弼姻家。某係劉鐸宗族。某係程註之子。以爲是東廠密奏事。其後年月漸久。逆賢李朝欽及李石涂亦不甚避人。凡行一事。卽公然曰。某係某錄某摺有名。各家官人始知所由來。體乾。永貞等。身在事中。曩臣亦目擊耳聞。最悉。恨彼時不會設法暗抄下全名。爲今日印證耳。自逆賢擅政。從來先帝中旨。非由一路而至。如關廉見長。如寶璽呈祥。如元兇已放。如遼東復內臣鎮守。如處各省考官之類。則崑山南樂稿也。如朕方云云。而曰云云。以擠去南樂。如纂修三案。引祖宗設立紅牌一節。皆崔呈秀等稿也。如先日拏汪文言。及擠蒲州之去。拒高陽之朝。皆崑山謀首輔之線索。南樂攬高陽之狠著也。譬之鎖未至。而鑰已密入。捷如枹鼓。外廷何由而知耶。天啓六年春。諫止內官鎮守者。貴池丁相公。有單疏力言不可。以爲分將吏之精神。害一掣戰守之肘。害二文武相害。陰嗾鼓噪。害三維清兵清餉一利。查功查罪一利。然關門之計。不過一言。申嚴軍法而已。我太祖禁內臣。不得典兵。世祖罷除鎮守等語。而體乾逆賢憎之。遂奏請先帝留中不報。

凡留中之本。各有白套裝盛。寫職名詳註年月於外。收於御前大鑿櫃內。天啓七年八月二十二日。先帝賓天。二十三日。聞御前燒毀字紙甚多。想同時一概焚之矣。各人或有疏草也。涿州馮相公。票擬樞臣王承光覆差內臣鎮守疏。時亦曾具揭力諫。然非特疏如貴池所奏也。凡彼時閣中送票者。文書房李守質、楊國瑞、王敏政、翟國楨等。捧匣者。侯保山、馬昇、張完赤等也。每至閣中有話硬傳。全無敬禮輔臣之體。初南樂欲專政。遂於告病之際。求逆賢密奏。先帝特諭分票商量。又引世廟時。必不敢如此等語。又托逆賢謂先帝照神廟時故事。用一筆勾法。將門戶之人。按所點便覽勾去。此事皆李魯生造謀也。至於呂維祺、張宗衡。皆不與南樂同心也。又吏部文選司謝陞。起用到京。見光景不好。遂勉完一選。潔身勇退。且以書勸南樂停止中旨。大拂南樂逆賢之意。李魯生是以有旨不從中出。而何出哉之疏也。又史記事黃汝良。亦各有書。以大義責南樂。咸拒而不納也。此三事永貞於逆賢處。見過原書。愛其辭氣。袖到直房。曾著彙臣抄謄。皆實事也。乙丑春闈。崑山南樂入場主試。於二月十五日前。後南都臺臣楊棟朝。有本糾參王之臣。先是南樂所寫。欲起用五六十人之內。惟之臣姓名。有四圈。餘者一二三圈而已。逆賢力奏先帝。遂口傳特留。此實從來異政。緣之臣邊才不易得也。又萬歷丙辰進士劉鐸。江右名士。博學善書。廷試日。偶飲酒過當。將試卷多寫踰格。排列不下。讀卷諸臣銜名。遂失鼎甲。人多惜之。歷任刑部郎中。天啓乙丑秋。陞揚州知府。其在京時。曾與梅檀寺矮僧本福往來。僧求鐸寫扇數把。適未印圖書。後差家人持圖書到本福處。於扇上補用。而廣東歐陽暉者。亦久與本福來往。偶到寺用拜帖紙寫詩三首。內多怨望失平語。鐸

僕不解字。容本福將鐸。圖書鈐暉。詩紙尾粘之。屋壁被錦衣衛人偵知。揭詩參鐸。會倪御史文煥等。憚鐸在揚。嚴明。遂托崔呈秀。嗾逆賢。矯旨逮鐸到獄。後詳詩句內有彈射逐臣等字樣。鐸係遷陞官。大不類。始知圖書雖鐸姓名。而詩則歐陽暉作也。遂復逮暉面質。與鐸無干。得復任。初鐸繫獄時。見戚臣李承恩。擬辟丙寅熱審。又被王體乾狠打五十心。竊憐之。密與方御史震孺。極力營救。益觸逆賢之怒。時巡捕營把谷應選者。王體乾之姪壻也。與提督張體乾。復巧砌羅織成獄。刑部尙書薛貞。將鐸背二十五板。援詛呪。祖父母律。立決於市。今上崇禎元年夏。張體乾。谷應選俱正法。二年秋後。倪文煥決於西市。四年九月。薛貞。瘐亡於獄中。外始快其報云。





# 酌中志卷之十二

## 各家經管紀略

王體乾名下管文書官人薛光祚。天壽山某陵掌印。今閒住。田玉曾任文書房閒住。逆賢感之。起陞爲正陽門提督。天啓七年十一月。陞秉筆。今閒住。趙本政曾任乾清宮管事。掌尙衣監印。日在御前後。爲李永貞所忌。差往高橋。督修關帝廟工程。今上登極。復管事閒住。劉文忠曾任文書房閒住。又任大同監視。謫南京。後爲民。已上三人。俱文書房掌文書寫字出身。李晉正陽門提督。天啓四年夏。逆賢陞晉秉筆閒住。並田玉等三人。俱於崇禎十二年籍沒體乾時。株連下刑部獄。坐斬。十三年冬。體乾瘐死。十四年夏。晉等四人遇赦。俱改充軍。本政已斷葷酒。皈依釋氏。居然一頭陀也。何失其名。陳失其名。馬號文軒。失其名。鮑永吉曾任暖殿。退出。因籍沒體乾時。馬鮑二人逮東廠。俱督廠。李太監承芳。刑斃於獄。其司禮監名下。則田維章曾任典簿。護送桂藩之國。今閒住。樊秉忠。張忠。素若干人也。凡有在先帝御前牌子。如高永壽。任昇等。不備載也。

逆賢下管文書房。念本章念東廠事件。寫各邊諭帖等項。官人劉榮。曾任兵仗局管理。在局居住。今故。苗全曾任李太監浚及先監矩。後任懋勤殿暖殿。宮內教書。又侍宋太監晉。劉文正。今故。紀用。曾任遼東鎮守。錦州蘇雄原係文書房掌文書出身。今故。陳福壽原係文書房出身。掌文書。在鐵獅子衙衙住。夏鑑曾

任宮內教書。入門日淺，遠不及蘇陳二人也。李朝欽，今故。裴有聲，降發南京，今爲民。李失其名。別號秀才。馬陞原是文書房捧匣出身，別號馬長子。曾任惜薪司總理，今發南京，改爲民。諸蠻子，江西人，失其名。其司禮監名下，則趙秉彝、金良輔、孟忠、劉應坤、石元雅、涂文輔、孫暹、王朝輔、楊國瑞、蘇應宣、邱洪緒、李守貞、李應詔、劉興等若干人。其在先帝御前做官，掌各衙門印，及外方鎮守者，俱略載在逆賢羽翼款中。梁棟下管文書官人趙奉馮，失其名。司禮監名下翟國楨等若干人也。

李永貞下管文書官人孫光祚，原文書房寫手出身，今侍王公文政。吳有兆曾任乾清宮牌子，今故。劉若愚，今繫獄擬斬，後蒙改絞，今在獄。丁紹呂內官監管理大工，領勅有名。今侍司禮監掌印高公時明、賈如皋等俱曾與若愚打發永貞批文書，或效輪流抄謄之役者也。其掌家則王成德，崇禎元年六月追贓畢，降更鼓房淨軍，今故。

石元雅下掌家許秉彝，曾任內官監管理。天啓七年冬降淨軍，發鳳陽。陳應祥號雲麓，今見侍東廠王公。允祚，今降乾清宮管事。黃國祥曾任文書房閒住，故餘不知姓名。

涂文輔下管文書官人劉秉德，曾任煖殿，今退出。張國寧曾任管櫃子近侍，今侍金公忠。殷良弼曾任宮內教書，今侍掌印高公時明，故。餘尙二三人不記姓名也。凡點將等三錄有名，或密帖有名之人，遇陞官或參官本內有名者，則自乾清宮大殿內發下片紙，各直房官人，卽於進士履歷及縉紳便覽查寫，是誰門生，父是誰，那里人，那科出身，抄帖回報，以聽施行。一日欲處錢受益，以爲錢謙益之昆仲也。又一日欲

處黃願素以爲黃尊素之昆仲也。各直房執事之人。細查籍貫父母姓名。逆賢始知其不相干。方已。凡每日票本奏下。各秉筆分到直房。卽管文書者。打發本管公公一本。一本照閣中原票。用硃筆謄。批事畢。奏過。纔打發。此係皇祖以來。累朝舊制。非止今日一家一人如此也。自李朝欽。裴有聲。涂文輔。馬陞。丁紹呂。賈如皋。許秉彝。陳應祥。殷良弼。諸人。俱於各直房曾見過。甲子冬。魏廣徽。黑筆所點。縉紳便覽。及親筆所寫。應起用黃克纘等六七十姓名。並乙丑之後。崔呈秀所逮東林姓名。天監錄。點將錄。同志錄。各摺子姓名者也。其摺五六種。俱永貞臥房內收。非若愚等掌管也。如諸摺子姓名。並墨筆所點。縉紳便覽。果出自永貞。若愚捏造。便駢首所甘。但實自外廷遞入。若愚以猜防疎斥之人。効輪流抄謄賤役。始則懸坐曰。主使。後復懸坐曰。加功。至崇禎十四年春。遇皇恩大赦。於大理寺會審。明明白白。蒙內閣范註。若愚有詞。復遺落姓名不覆。反將撒潑。狠罵之。石騰爲首。打滾放刀。恣肆混鬧之。申得忠。增入此二人者。似皆不會註有詞者也。乃俱狡潑得生。可謂有天日王法也耶。



## 酌中志卷之十三

### 本章經手次第

凡每日通政司使封本到文書房。回知該正公公。卽付掌文書周近侍進朝等拆開口占註語略節。旁有寫手一人。執筆草稿文書單畢。連本付捧匣者。如侯保山、李黑子、張大漢等。失其名。請本至乾清宮大殿內。付王體乾、梁棟、劉永貞、石元雅、涂文輔分投互看。凡有要緊處。卽鈐關一寸許白紙條。復於本上下空紙處。用指甲捏一痕。有應關白逆賢者。永貞三人。爭先朗誦。體乾助爲講解。逆賢聽畢。公同商量區處。南樂相公及崔呈秀等。密遞姓名。著數行事。每日閣中封來票本。亦文書房拆開。呈體乾等分投互看。如不合逆賢意。應改者。及內有錯字。或稱頌逆賢。該出溫旨者。亦各鈐紙條捏痕爲記。每日申後會極門。接實封文書。文書房轉呈體乾等。亦先於大殿拆開。如有前項密遞線索姓名。亦鈐紙條捏痕爲記。以便次早奏請施行。除體乾等五人。絕無敢擅捏痕鈐紙條者。其紙條於傳票改票時除去。而指痕之本。今尙存各科也。已上通本票本。乃晝間事。惟會極門封本。雖衆官大殿內看過。尙恐未遍。未詳。捧匣者又自日暮爲始。先到日精門。體乾直房。次到西南攬角。逆賢直房。次過月華門。到梁棟直房。到石元雅直房。到涂文輔直房。次再過仁蕩門。到李永貞直房。各家都有經管文書識字官人。如若愆之類者。立於案傍。一本一本打發各家本管公公細查看。或延至二更三更始完。惟在文書多寡何如。捧匣者。宮中亦有直房一間。每

日晚間膳房例給酒食供給。每夜文書看完。方由仁德門縫。叫應門外官人。將門縫拭淨。裏外各執燈籠。查數遞出。呈文書房。該班衆公公看過。仍交與掌文書周近侍等。并寫手官人。從新燈下開寫。停當於五更攢點頭次宮開後。都將是日早事。應奏文書。捧至日精門。體乾直房。復加查看。通本若干。批紅該發若干。比至天將明。仍復全到。是日該正秉筆直房。亦查看一周。每晨奏先帝覽文書時。逆賢、永貞、元雅、文輔。先將應處應點姓名。及應改票帖。俱托體乾口奏曰。萬歲爺。某係門戶。該處某票。某字當改。或從與先帝御筆親改。惟梁棟不經管。魏廣微、崔呈秀等事。而逆賢不識字。從來不批文書。不輪流該正。然頗有記性。只在御前贊揚附和。植黨徇私。或危言冷語。挑激聖怒。凡奏文書之時。管事牌子。皆屏息遠侍。不敢近前。至於一本一本口奏姓名。黨逆朋比者。王體乾也。幫助逆賢查姓名。李永貞、石元雅、涂文輔三人也。其秉筆梁棟、孫暹、郝隱儒。俱不能干預一字也。其贊逆賢執掌收藏姓名原本。及外來雜帖者。李朝欽。而造謀殺命。密遞線索害人者。魏廣微、崔呈秀也。一切削奪勒限追贓諸嚴旨。皆內閣顧秉謙等票擬。非中旨。見有閣中底簿。中書官可證也。擠蒲州烏程聊城者。南樂也。擠南樂者。崔呈秀也。詔獄鍛煉。承指下手者。許顯純也。謀興大獄。私圖報復者。崔呈秀、徐大化、霍維華等也。殺義僕韓三。欲構成賄案。牽連蒲州者。楊維垣等也。維垣雖以中旨起官。而未甚大者。因爲贊座師徐紹吉。攘戶部左侍郎缺。爲南樂銜之。而曾向逆賢譖之也。危哉狠哉。至今言之。猶令人色變心顫。按南樂旣罷相。臨行時。亦具厚禮於逆賢。體乾等。其屬上親寫詩曰。秋雨沉沉夜未央。薊門有客欲還鄉。關心社廟愁先結。灑淚君臣念不忘。蒼狗白雲仍變幻。

傾葵捧日但悲傷，故人回首雙龍遠，離思還從潞水長，及抵里，仍各以厚餽彌縫之，恐呈秀等下石也。





# 酌中志卷之十四

## 客魏始末紀略

魏忠賢原名李進忠。直隸寧肅縣亡賴子也。父魏志敏。母劉氏。妻馮氏。生女魏氏。嫁楊六奇者是也。賢無子。家貧自宮。妻改適他方人不存。萬曆十七年選入。隸司禮監秉筆。掌東廠太監。孫暹名下。派與御馬監劉吉祥照管。劉之墓今在碧雲寺下北山坡者是也。後復本姓曰魏進忠。中官規矩。本管者視甲科之大主考。照管老叔者視房考。同官者視同門。本管之於名下。照管之於姪子。猶座師之視門生。亦若父子焉。忠賢少孤貧。好色賭博。能飲啗嬉笑。喜鮮衣馳馬。右手執弓。左手設弦。射多奇中。不識文字。人多以傻子稱之。亦擔當能斷。願猜狠自用。喜事尙諛。是其短也。素好僧敬佛。宣武門外柳巷文殊菴之僧秋月。及高橋之僧愈光。法名大謙者。乃賢所禮之名衲也。如碧雲寺僧。則酒肉勢利不足齒矣。徐應元亦孫暹名下也。於賢同年。神廟時。四川稅監邱乘雲。係暹掌家。又徐貴者。亦暹名下。於賢爲前輩。而爲乘雲在京掌家。逆賢日與應元。趙進教爲嫖友。呼盧飲博。罔論晝夜。逆賢因囊橐乏。遂遠赴四川。見乘雲爲抽豐計。徐貴備將賢亡賴狀。已申報房中。先布之。賢不知也。及到。邱大怒訶罵。倒鎖賢空房中。絕飲食。欲斃之。時僧秋月遊蜀。偶見邱。是時賢不食已三日。僧力爲勸解。邱勉從之。僅給路費銀十兩。遣回。僧憐賢。仍爲致書馬謙。囑令厚遇之。謙於嘉靖四十一年選入。歷陞內官監總理。又皇貴妃鄭娘娘下宮人林廷官女。謙所侍

也。最有時道。凡逆困乏。謙每資助之。徐貴又在京具揭先監處。以魏某私往四川云云。乞行重法。亦賴謙救止之。賢自此在甲字庫漸裕。掌庫李宗政。賢之前輩也。光廟在青宮淡薄。先帝既誕之後。生母才人王老娘娘。無人辦膳。賢遂夤緣入宮。辦才人及先帝之膳。其介紹引進者。近侍魏朝朝。乃王太監安名下。光廟久寵信之。安素剛正。主持一宮事。魏朝朝夕譽賢。安爲朝所惑。頗信之。朝初與先帝之乳媪客氏。暗相厚。以待安及答應先帝多不暇。而賢遂乘間亦暗與客氏相厚。分朝愛焉。賢性狡猾。指稱辦膳爲名。於十庫諸內臣。如藥張等。皆騙其食料醢醬。或財物玩好。以至非時果品花卉之類。必巧營取之。而轉獻先帝。以固寵也。及才人娘娘崩。東李老娘娘位列在前。時西李老娘娘擅專宮之寵。固要光廟奏請神廟。又密懇皇貴妃鄭老娘娘。奏請神廟。將先帝托西李老娘娘看管。又今上亦屬看管。并西李老娘娘所生皇八妹者。共乳媪三人在宮。客氏原先與朝厚。既暗與逆賢又厚。一穴兩蛟。爭競必至敗。而朝之爲人也。佻而疎。賢之爲人也。慙而壯。泰昌元年八月初一日。光廟登極。擬冊立先帝爲東宮。是時逆賢尙列庫銜。暗與客氏深謀。遂相與刻意擁戴王太監安。而客氏又巧逢迎之。無不可者。遂充東宮典膳局官。此缺客氏力也。九月初一日。光廟升遐。先帝暫居慈慶宮。科臣楊漣時爲給諫。疏參逆賢。賢無措。泣懇魏朝。朝在王太監前力營救之。遂得旨著司禮監查明具奏。賢先年原名李進忠。遂將西李娘娘下用事之李進忠。算作一人。以欺外廷。其實皆朝力也。朝與賢既客氏私人。曾結盟爲兄弟。賢居長。而朝顧次之。稱曰大魏二魏。及先帝卽位數月。二人因寵。漸相媚嫉。於乾清宮煖閣內。醉罵相嚷。時漏將丙夜。先帝已安寢。而突自御

前開起。司禮監掌印盧受、東廠鄒義、秉筆王安、李實、王體乾、高時明、沈蔭、宋晉等皆驚起。是時逆賢已陞秉筆，掌惜薪司印。魏朝已改名王國臣。陞乾清宮管事掌兵仗局，並跪御前聽處分。盧受、鄒義等侍側，乘威知憤爭。由客氏起也。先帝玉旨問客氏曰：客妳爾只說爾處心要著誰替爾管事。我替爾斷。客氏久厭國臣猥薄，而樂逆賢慙猛好武，不識字之人樸實易制，遂心向逆賢。而王太監安久中客氏逆賢諛媚，且心惡名下之人，作此醜態，遂打國臣一掌，勒令告病，往兵仗局調理，離御前矣。此時逆賢尙名魏進忠，始得專管客氏事。從此無避忌矣。先帝端拱於上，惟客魏之言是聽，而尾大不掉之患成焉。後國臣被斥，逆賢矯旨發鳳陽，在逃，復於薊北山寺中搜獲，使人於中途邀截，至獻縣縊殺之。按國臣保衛先帝聖躬，最先曾共臥起，頗著勳勞，及登極晉秩貴近，御筆改復姓賜名，特掌美印，受寵眷不在賢下。嗟哉！王太監安何不留國臣以制逆賢，或不然，就將賢與國臣坐以驚御之罪，而一併先黜，候大婚禮成，優客氏以金帛，而亦黜之外監，何明於防西李老娘娘之垂簾，而昧於防客氏之淫橫也。嗚呼！知經而未知權耶！抑拘理而寡於術耶！奈何自翦爪牙，束身入井，殃遺身後，禍及椒紳。若王夷甫諸人，真不能辭其責矣。千古之下，有餘痛也。初，天啓元年，四川稅監邱乘雲撤回京，賢差外司房李茂春號完素者，遠迎至畿南，邱賞銀三十兩。李先入隆宗門外直房回話，賢爲之淚落曰：我先年被徐貴譖害，止給我十兩路費，今賞爾如此，便三倍我了。歎息者久之。其後徐貴竟爲賢所害，而邱之令終，復賴賢喪葬如禮。中外榮之初，祖宗舊制，於乾清宮東設房五所，西設房五所，俱有名，封大宮婢所住，所以正名分，嚴等威也。泰昌元年冬，客氏遷乾

西二所。先帝親臨。爲之移居。陞座飲宴。鐘鼓司官邱印等扮戲承應。司禮監盧受、鄒義守居。而王安、王體乾、高時明、沈蔭、宋晉隨侍。另設吃膳處於所內側室。猶孔聖之有四配焉。客氏自此在宮中乘小轎。撥內官近侍擡走。儼如先帝嬪妃之禮。缺一青紗傘蓋。而茵褥之精美爲尤勝也。天啓元年後。改住咸安宮。各衙門答應錢糧。比御前更吃緊。夏則大涼棚貯冰無算也。冬則大地炕貯炭無量也。其驕奢僭越。真日異而月不同。凡客氏生日。先帝亦必臨幸陞座。歡宴賞賜無限。每日先帝所進之膳。皆客氏下內官造辦。名曰老太家膳。聖意頗甘之焉。舊制司禮監掌印掌東廠乘筆大膳房。遵照祖制所造辦之膳酒。乃只爲具文備賞用而已。希進御也。初王體乾、宋晉、魏進忠三家。每月挨辦膳。天啓二年。進忠改名忠賢。四年以後。便是王體乾、魏忠賢、李永貞三家輪流辦之。遇閏月。則各四十日算之。惟客氏常川供辦。共四家矣。每家經營造辦膳羞。掌家等官數十員。造酒醋醬等項。并葷素各局外廚役將數百人。此紫禁城之外者。至於乾清宮以內。則每家各有領膳煖殿四員。管果酒煖殿二員。請膳近侍四五十員。已上皆穿紅者也。又司房、管庫房、湯局、葷局、素局、點心局、乾碟局、手盒局、涼湯局、水膳局、饋膳局。管柴炭及擡膳。又各內官百餘。若恐係永貞項下。管文書兼管膳掌班。欽賞花名可證也。此皆係外衙門穿青者也。按先帝所進之酒。曰秋露白。曰荷花蕊。曰佛手湯。曰桂花醞。曰菊花漿。曰芙蓉液。曰君子湯。曰蘭花飲。曰金盤露。名色可六七十種。皆先朝舊戚臣魏士望傳方佐逆賢外宅造辦。而轉於御茶房進之。大工告成。陞士望玉帶。實酬其醞釀力也。按御茶房職司上用茶酒。閒雜人無敢輕入者。逆賢擅政。自王體乾起。至煖殿近侍止。俱得私

向茶房索酒吃。而答應客氏、逆賢、體乾等器具匙筯。如私人焉。又弓箭房者秩次之。亦皆客魏私人所據。司御前弓矢。以備非常。逆賢喜射。好蹴鞠跑馬。先帝好馳馬。好看武戲。又極好作水戲。用大木桶大銅缸之類。鑿孔創機。啓閉灌輸。或湧瀉如噴珠。或澌流如瀑布。或使伏機於下。借水力沖擁圓木。毬如核桃大者。於水湧之。大小盤旋宛轉。隨高隨下。久而不墮。視爲戲笑。皆出人意表。逆賢客氏。喝采贊美之。天縱聰明。非人力也。聖性又好葢房。凡自操斧鋸鑿削。卽巧工不能及也。又好油漆匠。凡手使器具。皆御用監內官監辦用。先帝與親暱近臣。如涂文輔、葛九思、杜永明、王秉恭、胡明佐、齊良臣、李本忠、張應詔、高永壽等。朝夕營造成而喜。喜不久而棄。棄而又成。不厭倦也。且不愛成器。不惜天物。任暴殄改毀。惟快聖意。片時之適。當其斤斲刀削。解服盤礴。非素暱近者。不得窺視。或有緊切本章。體乾等奏文書。一邊經營鄙事。一邊傾耳注聽。奏請畢。玉音卽曰。爾們用心行去。我知道了。所以太阿之柄下移。南樂薊州東光輩。及在京之徐大化等。一派線索。如枹鼓之捷應也。先帝每營造得意。卽膳飲可忘。寒暑罔覺。可惜玉體之心思精力。盡費於此。然皇極等三殿落成。於天啓之年。肯堂肯構。先帝之好土木。豈亦天啓其朕兆耶。抑逆賢之幹濟才智。刻意督催之跡。或藉此以難泯耶。按萬曆中年。乾清坤寧兩宮告成。神廟令正。一真人張國祥。率道侶數十人。於宮中啓建黃籙大醮。聖德格天。曾感羣鶴飛鳴。旋繞之瑞。至皇極等等三殿告成。逆賢等只圖廕賚爲己榮耳。又祖宗舊制。凡萬歲聖節。中宮千秋。皇貴妃千秋。則凡內執事宮人。并王體乾等。及山陵等處內官。各有賞例。每銀一兩以上。六年十月初六日。中宮張娘娘千秋。適先帝欲幸內教場。圍

獵聖性最好手刺獐狼狐兔以爲樂。是日張娘娘不肯出。延至辰時以後。方始同出。止略散銀枝箇。竟累年未批賞。非舊典也。逆賢生於戊辰年正月晦日。自元宵節後。送壽禮者。做法事祝延簽字者。每早乾清宮兩丹墀幾滿。將至正日。綬帶擠擊挨摩之聲。鏗然。聞有擠傷衣帶腿足者。千歲千歲之聲。殷訇若雷。而從來盈滿驕橫光景。未之有也。逆賢早起漱口。自擊銀漱盂之聲。盡力大響。卽寢居咫尺。了不畏也。緋袍玉帶。充滿道路。高明之家。鬼瞰其室。盛衰平陂。理何逃焉。逆賢自泰昌元年冬陞秉筆。凡不識字而躡躑乘筆者。穆廟時孟沖。神廟張明。先帝時魏忠賢。孫暹。王朝輔五人而已。天啓初年。逆賢卽掌惜薪司內府供用庫。尙膳監印。督寶和等店。天啓三年十二月。掌東廠印。前後獎勅數十道。溫旨無算。七年十一月廿六日。准告病。十二月初二日。降淨軍。發鳳陽。初六日。行至阜城縣南關。夜半與心腹名下李朝欽同縊死於旅店。崇禎元年二月十一日。該御史卓邁等。遵奉明旨。將逆賢原屍磔之。梟首於河間西門之外。天下快之。猶恨其不生正典刑也。凡司禮監掌印秉筆。非奉公事。不敢出。王體乾提督禮儀房。四仲之月。得奉差選妳口。寅出申回。不至過宿。只會住京北沙河故里。祭掃始過一宿。天啓元年十二月。逆賢雖出外。尙未敢數。尙未敢遠。至四年以後。外廷暗助。羽翼旣成。仗客氏。王體乾。李永貞。石元雅。涂文輔在內。遂遠至涿州等處。天壽山春秋二次祭孝和王老娘娘畢。卽詣西山碧雲寺。祭本管孫暹。卽及照管老叔劉吉祥墓。或遠至瑠璃河看工祭水。或至大壩馬房相度修城。無非巧立名色。招搖畿輔。以恣馳騁。得意耳。凡出外之日。先期十數日。庀治儲備於停驂之所。賚發賞賜銀錢。絡繹不絕。小民戶設香案。插楊柳枝花。

衆焚香跪接冠蓋車馬。繽紛奔赴。若電若雷。塵埃障天。而聲聞於野。有狂奔死者。有擠踏死者。燕京若干。大都人馬僱賃殆盡。凡達官戲子。蹴踘廚役。打茶牢役。趕馬擡槓之人。其數不止數萬。每遇逆賢遠出。則京中街市寂然空虛。頓異尋常者。將數日焉。大約外廷之欲親炙逆賢。內廷之獻諛乞憐者。凡四人之轎。將數百乘矣。怒馬鮮衣束玉而爲之前後追趨。左右擁護者。又百千餘矣。跑馬射響箭。鳴鏑之聲。不絕於耳。鼓樂笙管數十餘簇。且行且奏。夏則大車載冰。冬則炭火如山。古今所罕見也。逆賢坐八人大轎。前用騾二頭或四頭拉拽之。疾如飛鳥。逆賢飽則正坐。倦則臥。醉則憑軾。兩眼迷離。不知行至何處也。畿南一帶。素苦泥濘難行。賢爲之捐資修築。廣建橋梁。堤若長虹。至今便之。凡御前有本有緊要之事。先時專托劉榮紀用等。後則托之李永貞、石元雅、涂文輔等。各派能幹之人。站馬疾馳。卽百里之遠。一日可再往也。都城東有故監劉永成之墓。寧晉伯祖也。逆賢曾便道一展拜。而奏請新之。此時魏良卿尙未封伯。蓋私欲援例爲良卿封伯計耳。逆賢有名馬千餘。騾數百。皆邊弁梁桂朝、楊國棟、馬世龍、滿桂、侯世祿、尤世威及督臣王象乾、閻鳴泰、劉詔等送之。楊國棟者。逆賢名下牌子。曹承恩之姊夫也。梁桂國者。逆賢名下煖殿。胡國用之姪婿也。凡所送之馬鞍轡精美。每具何止百餘金。不過剝軍餉占軍匠以辦之。爲一己功名也。可嘆可恨。其後李永貞出外。往西山北山通灣。亦如逆賢之疾行奢侈。而馬亦多跑死。雨泥暴殄。不惜民情。更甚於逆賢。皆紹呂等從臾也。而凡體乾、永貞、元雅出外。則林下大老公。如高、如沈、如宋。各有重犒之禮以奉之。概不收也。崔呈秀與許乘彝契厚如同胞。始得與逆賢交結。乘彝之力也。又李魯生、李藩。先

歸南樂之門。後入涿州之幕。見涿州不能久任。則又與崔呈秀比焉。首行贊美。重修肅寧城垣者。呈秀也。誇詡大壩城垣者。巡青之李魯生也。因媚賢而又媚永貞者。通州造匾。送至永貞富河莊。老人等未敢懸掛。永貞拒而不納。人皆笑而鄙之者。李藩也。李永貞之姪李旺。得考入通州學。入丁卯北闈。應試者。藩力居多。與逆賢合宅看風水。推星命。規造墳地府第。妄言禍福。無所不至者。方宏蔭也。書寫圍屏扇畫者。袁志學。許周賓。楊善等也。書寫皇極等殿文昭等閣牌額者。顧承忠。顧名遠也。凡逆賢一應辭恩賡等項。奏本。皆心腹外書房李茂春。或東廠外寫字掌班耿良臣。孔應龍創稿。李朝欽念與逆賢聽。有不合意處。賢授意朝欽改正寫真。則東廠閱司房也。

逆媼客氏者。定興縣民侯二之妻。生一子曰國興。嫠不多年。泰昌元年冬。封奉聖夫人。先住乾清二所。後住咸安宮。每日天將明。卽至殿內候先帝聖駕醒。始至御前。甲夜後回咸安宮。其彩鳳門。亦有直房。凡逆賢往宮相見時。必將宮人官人屏開。語祕不得聞。其上危中宮皇后。及裕妃張娘娘等。獨用王體乾。殺王太監安王國臣等。皆客氏造謀也。其母老矣。彼時尙在。每以惜福持滿戒勸。客氏不聽。凡客氏於天啓元二年。每月間中旨慰留者。皆體乾力也。七年九月初三日。奏懇今上准歸私第。其夜五更。開宮門之後。客氏衰服。赴仁智殿先帝梓宮前。出一小函。用黃色龍袱包裹。云是先帝胎髮瘡痂。及累年剃髮落齒。及翦下指甲。痛哭焚化而去。至奉旨籍沒。步赴浣衣局。於十一月內。欽差乾清宮管事趙本政。臨局答死。發淨樂堂焚屍揚灰。其子侯國興伏誅。其弟客光先止擬遣客。戍氏掌班內官張貴。劉失其名。名下崔祿。許國



寧等各行賄得免。客氏貴顯時，惟王體乾耆舊，魏忠賢表裏，梁棟舊人，凡送禮時，棟僅下小的帖，然都不叩頭。自孫暹、王朝輔、劉應坤、李永貞、石元雅、涂文輔及掌事牌子劉忠、王應科、胡明佐等，每日見必叩首如子姪焉。夫以乳媪儼然住宮，自視爲聖上八母之一，亦僭妄殊寵極矣。且條出條入，人多訝之。道路流傳，訛言不一，尙有非臣子之所忍言者，皆不足信也。按自天啓元年起，至七年止，凡客氏出宮，暫歸私第，必先期奏知，先帝傳一特旨。某月某日，奉聖夫人往私第云云。至日五更，欽差乾清宮管事牌子王朝宗，或涂文輔等數員，及煖殿數十員，穿紅圓領玉帶，在客氏前擺隊步行。客氏自咸安宮盛服靚粧，乘小轎由嘉德成和順德右門，經月華門，至乾清宮門西一室，亦不下轎，而竟坐至西下馬門。凡弓箭房帶簡管轎子、御司房、御茶房，請小轎管庫近侍，把牌子、硬弓人等，各穿紅蟒衣、窄袖，在轎前後擺道，圍隨者數百人。司禮監該班監官、典簿、掌司人數等、文書房官，咸在寶寧門內跪叩，道旁迎送。凡得客氏目視，或領之，則榮甚矣。內府供用庫大白蠟燈、黃蠟炬，燃亮子，不下二三千根。轎前提爐數對，燃沉香如霧。客氏出自西下馬門，換八人大圍轎，方是外役擡走，呼殿之聲，遠在聖駕遊幸之上。燈火簇烈，照如白晝。衣服鮮美，儼若神仙。人如流水，馬若遊龍。天耶帝耶，都人士從來不見此也。每年不論冬夏，或出三四次不止。客氏到宅，陸廳坐，自管事起，至近侍止，挨次叩頭。老祖太千千歲，殷然震天，各有回答。銀帛以犒之。凡欽賜金銀錢帛，不可勝計。每日三時輟御膳，以賜之。絡繹旁午，或在外住十餘日不等。而逆賢催入焉。出入皆於五更，其迎接圍護如一。客氏私宅在正義街西，迤西蓆市街北，而逆賢亦有一第，便在街南斜對門不遠。

賢與客氏滿望後來得請林下。受享富貴。齊眉到老。不料俱不得死。而逆姪良卿。客氏男國興。乃駢首戮於市。蓋裕妃張娘娘。王太監安。楊左等慘死冤魂。必不肯默默於泉下也。古今報應。誰肯饒過誰哉。初逆在西庫。與孝和老娘娘辦膳時。便漸充裕。而良卿執掌上房庫房鎖鑰。凡酒漿食物。出納勤劬。聞良卿雖不會讀書。而儀表堂堂。亦善說話。侯國興少受業於涂文輔。肥蠢異常。口甚小而神不足。坐則盹睡。氣息齟齬。或與人共坐。未及欠伸而已。入夢鄉矣。此二人形狀。疊臣一面未識。一字未通。至於崔呈秀。更不會識面交通也。夫如是而懸坐曰同謀。非忌者下石而何耶。冤哉。事久論定。自有公評。必難哄天下後世也。客氏住咸安宮時。先帝賜名下官人。如崔祿。許國寧外。尙數十人。以至各衙門。投托私人。將數百焉。又賜近身答應官人十餘口。及今上准歸私第之初。而徐應元尙踵故套。每日輟御膳賜之錢帛銀兩。已不能如先帝在日。其隨往私第。尙有賜過宮女四名。後不知歸於何處。客氏墳地。在京西之田村。今已拆毀。逆賢墳地在碧雲寺。所費甚鉅。及各處生祠逆像。並廢毀無遺。良卿、國興等誥券。盡行追奪。逆賢妻馮氏。止生一女。嫁楊六奇。而馮繼先者。其妻族也。逆姪良材。曾廕都督。先逆賢死。良材非魏家子。乃南方買來小廝。爲逆賢所愛。冒魏姓而膺廕也。傅應星者。逆賢親姊魏氏之子也。天啓七年五月病死。又惜薪司內官劉失其名者。逆賢生母之族弟也。因毆傷僧命。法司追理。遂奏知先帝。拏付更鼓房。勒令自盡。魏良卿的係逆賢之姪。非子也。由光祿寺署丞。改廕金吾。歷晉伯侯公爵。代先帝郊天園丘。七年孟秋。代享太廟。代填祝版。榮寵極矣。先是關中曾擬獎勅體裁臚列。與曹操之九錫文相近。見者無不瞪目咋舌。無惑乎人

疑其朶頤大物。然逆賢實無是心。實非其人也。但彼不學無術。甚於霍光。客氏狠毒。浮於婁顯。害裕妃等。慘於許后。良卿等驕奢擅寵。遠過山雲。本靠徐應元爲接手後勁。而應元已另具別腸矣。託李永貞、石元雅、涂文輔爲眼目。而永貞、文輔但知擁戴。應元甘悖逆賢如遺跡矣。視外廷崔、徐、楊、霍諸人。欲同華子魚、劉歆輩。而妬寵互爭。一敗塗地。不可收拾矣。世有生來好殺人。好殺貴人。又偏聽縉紳。以害縉紳正人。而欲得令終於牖下。豈理也哉。從來叛逆者。首惡真犯正法。凡幼小無知者。另成議處。天啓年間。爲逆妖等犯。有懷抱嬰孺。赴市曹駢斬。尙盹睡懷抱中未醒者。市人嗟嘆。孺子何辜。逆賢客氏。旣以慘殺。佐先帝。惟痛在宥。七年之久。中宮張娘娘等。凡誕皇子三位。皇女二位。皆保衛不得法。以致嬰年薨夭。良可悲痛。逆賢之死。而剉骨。客氏之死。而揚灰。豈不有天道哉。疊臣於天啓丁卯冬。謫南之際。見沿途田里間孩兒。多憨憨壯壯。易得存養。遂條纂保衛淺言一冊。計十款。於崇禎戊辰仲春。梓行南北。無非爲聖子神孫。詳計久遠。卽士庶人家。亦用得著者也。



# 酌中志卷之十五

## 逆賢羽翼紀略

李永貞者。通州富河莊民李經之子也。經原寶坻縣人。僑寓於此。先娶高氏。生長男。失其名。流落不知何往。次男李奉。三男李成。又生一女。嫁皮村李家。今嫠矣。高氏故繼室者申氏也。生第四子。失其名。少與永貞鬪墻。遂輕生自縊於房後棗樹上。永貞第五子也。自五歲時闖爲宦。十五歲進京。侍孝瑞顯皇后之母夫人趙氏者。於永年伯王棟宅中。十九歲選入皇城。時萬曆辛丑六月也。九月內。卽陞坤寧宮近侍。又一年。經故。永貞名李進忠。於萬曆三十一年。卽奉旨鑿鎖。頻遭譴責。幾賜死者數矣。先監曾力救之。後始奉有遇赦不赦之旨。至庚申七月二十一日。奉神廟遺旨釋放。復原職。近侍於坤寧宮。孝瑞顯皇后宮。几筵前供職。始與逆賢識面。泰昌元年九月初一日。鄒義尙膳監掌印到任。尋陞永貞司禮監。其鑿鎖十八年也。始讀四書。詩經。後讀易經。書經。左傳。史漢等古書。習寫趙吳興字體。先奕棋。能作詩。作古文。亦能選看時文。其兄奉生子之旺。成生子芮。俱庠生。其餘李之榮。李之藻等數人。皆廕錦衣衛。永貞同母妹一人。嫁王道寧爲妻。道寧亦廕錦衣衛。生甥慕堯。慕舜。皆陞序班。僕李培。亦陞光祿寺署丞。初。天啓元年五月。高太監時明。王太監安。盧太監受。俱同時相繼告病求退。爲自全計。其年秋。逆賢與王體乾串同一路。特陞史賓。諸棟。梁棟。張文元。裴昇。秉筆。永貞遂入諸棟之幕。而棟掌兵仗局印時。在局居住。管理劉榮者。號楚

亭。自玉熙宮近侍出身。健訟通文理。逆賢之心腹掌班也。爲棟樹僚。遂與永貞相結。互相推獎。恨相識之晚。棟於天啓二年夏。因請帑不遂。與逆賢左。憤鬱成病卒。永貞緣榮力薦。入賢幕。陞文書房。至三年十一月。先帝親詣園丘郊祀回。陞永貞玉帶隨堂秉筆。賜坐蟒椅。匝月五遷。總榮薦拔。榮後因與宮人亂。逆賢逐之。而李朝欽始不離左右矣。榮雖被逐。在兵仗局住。耳目甚廣。凡有所聞。卽密疏於帖。緘封之。差名下官人馬獻祥入宮。類見永貞屏人密看。畢卽焚棄之。在獻祥亦不知何等語也。後榮因又暗謀逆賢事。露。賢恨之。噉兵仗局掌印王應科。參榮處死。六年四月廿九日。永貞隨朝。跌傷左股。告病在梨園直房調治。至五月初六日。因王恭廠之變。懼而求退。體乾固不肯放。噉逆賢借先帝天語。催永貞少愈卽出。永貞爲人有口。矜肆驕譎。極好而折人。不肯爲之下。七年正月初旬。司空薛鳳翔有疏。爲今上婚禮在邇。其移居府第。合用錢糧。廠臣體乾時匱乏。極力節省。所有內官監合辦者。量於該監搜括奏處。永貞噴其不全。應付而推諉一半於內官監也。遂同體乾向逆賢曰。外官一邊譏哄老爺。一邊參小的衙門。賢默然。次早賢乃稱疾不起。亦不赴御前。但垂首冷笑。長吁短嘆。切齒曰。原來天下人都是譏哄虛譽我。體乾代永貞危之。永貞慌懼極不安。泣懇賢掌家。王朝用力爲救解。賢怒稍釋。又次日。賢始力疾到先帝御前。雖值元宵。然不樂者數日。逆賢好名中諛。惱人直言。大率如此。惜永貞非勇退之人。實貪大工之乾沒。告成之恩。廕馴至成禍。非一朝一夕也。其戕害楊左諸人。造謀布竄。實由外延線索。歷歷有據。永貞卽非殺人之。然而在御前及逆賢面前。顧不知果何光景。又不知劉榮密帖。是何字句。凡面到直房。偶因甚事。亦曾向

纍臣等。或痛哭怨嘆。以今思之。想必因心口不一。換語裝點。以詐忠陰賊。哄衆人乎。不然。何其視若愚如。讎。而猜防間諜。無所不至。何耶。想一則恐若愚眼前。苦口勸諫。二則恐若愚日後。復侍高公。於己不便。所以抑阻之。禁錮之。嚴防左右。凡事不可洩漏。與若愚知之。其度量心地。可概見也。七年八月二十四日。今上登位。永貞於二十七日。告病未允。九月初二日。差往天壽山。看擇先帝壽宮。初四日回朝。見蒙欽賞。赤金二十兩。永貞灑淚固辭。聖顏頗不悅。勉慰領受。九月初七日。准辭。十月初二日。卽自砌於外宅小院之內。晝夜讀書。穴牆以通飯食。二十六日。聞逆賢允辭。始拆牆見人。撫今思昔。蓋永貞之固求退也。非真心求退也。原欲與徐應元。合爲一局。擯退逆賢。借應元之力。待永貞從新另做世界。此機巧人多不能知之。至十一月初二日。天不從人。徐應元。王國泰退矣。永貞始手忙脚亂。密差周承恩等。餽王太監體乾。王太監永祚。王太監文政。各銀五萬兩。皆侵落大工原物也。旬日後。三家畏聖上英明。且知永貞素性反覆。遂都不敢收。各進獻御前。著內承運庫收。是日晚。永貞知之。不自安。密庀鞍馬。率其甥婿孫良濟。易服逃走。二十六日。奉旨降永貞淨軍。發湖廣承天府顯陵安置。舉家驚慌。無處尋覓。不數日。其兄李成自縊死矣。至十二月初九日。永貞外宅得一報信。男子持永貞親筆帖差回。取盤費衣服。宅中居住。掌家王誠德等。拏獲羈住。將來帖賚入宮中。稟見體乾等。奉聖旨著承天守備魏相下官人。徑同永貞家人等。卽往黃河岸上。將永貞押赴顯陵。崇禎元年春。永貞兄李奉亦驚憂死矣。二月。又將永貞同徐應元自承天府調發鳳陽。三月內。山西道御史劉重慶疏參。將永貞提解赴北。途中服砒霜不死。絕食旬日不能死。四月十三

日入刑部獄。六月二十日。中府會審。擬斬罪決不待時。二十七日。召對玉音云。李實空印本李永貞填寫。驗是墨壓硃。七月初十日。前後候旨。乘連夜陰雨。永貞自縊兩次。皆繩斷。跌暈。頸皮勒損。又不得死。至十六日未時。縛赴正義街。臨刑之際。尙跪向監斬官訴冤。人多笑其不中用也。生年四十有六。掌家王成德。自六月內。於司禮監追賊被刑。比後降更鼓房淨軍。六月初旬。已先病故。而管家婁允德。掌班丁紹。呂煖。殿周承恩。姜永憲。管上房曹文玉。蔡化齡。王應時等。料理後事。其妹夫王道寧。姪李芮等。及心腹家人李培等。皆挾厚費。四散逃躲。或報應商役。或避人拏訛。或改面事人。凡踰二年。而永貞尙身首異處。無一肯爲殯埋者。後王道寧偶因他事。干連下獄。繫臣以骨肉大義勸勉。及道寧出獄。始自大興縣。購其首。漏澤園。啓其軀。於阜成門外嘉祥觀後。買地瘞之。癸酉春。繫臣蒙恩。改擬候覆問。其冬道寧暴亡。恐久湮無處。可問。遂重賞經手工人等。根尋得葬處。備牲醴冥資。遣僕代奠。其祭文曰。嗚呼痛哉。戊辰孟秋。旣望之夕。候旨徬徨。中心如刺。詰朝相辭。畏威饒饒。詎意我公。竟罹大厄。銜抱冤誣。丹化爲碧。骨肉逃匿。產業蕩然。吞獻繇人。豈特簡編。小人改面。君子情遷。後事之托。負信堪憐。荒坵權厝。土燥多年。瞻彼他墳。春秋祭酌。嗟唯我公。荒蕪爲最。泉下交遊。佳客藹藹。夜臺觀書。青燐是賴。悲纏肝腸。嗚呼痛哉。未死若愚。朝審赴市。數載奔趨。路人嘆息。叫天何辜。屢蒙存活。血淚爲枯。眵勉作善。幻視微軀。六七年來。敢忘厚德。皈依釋門。布衣蔬食。近荷平反。更生在即。曾夢見公。如侍公側。遣僕叩奠。冤填胸臆。聖明在上。終照覆盆。果得脫難。當約同門。擇吉卜穴。改葬高原。勒銘垂後。冀慰尊魂。靈其格止。嗚呼痛哉。尙饗。永貞白哲長靈。



性狡慧。通文能書。喜讀韓非短長語。極好談天文。好說夢。類以身質言語。賭重誓。語最叵信。貪復猜險。更善負心。而性驕好勝。自王體乾等無一人不與之恚怒爭競者。卽逆賢亦屢次委曲包容之。遂自釀殺身之禍。了無解救。六年夏。於富河大築房舍。置園圃。始將其四兄所經之棗樹伐去。於興隆寺延僧衆。建華嚴道場百日。以懺解超度之。七年冬。永貞逃後。丁紹呂。王誠德等。打點家產。進過銀八萬兩。崇禎元年夏。又追銀六萬兩。連前次三家未收者。通共銀二十九萬兩。其南北往返。各項花費。屋下隱埋。並名下逃奴吞拐。及入獄被騙者。不與焉。爲永貞河邊管家司鎖鑰者。卽巾帽局管理婁允德也。

丁紹呂者。昌平州人也。亦辛丑年選入。自盜甲廠簽書陞內官監管理。逆賢囑永貞延請做掌班。及永貞掌內官監印。一應事務。資紹呂爲多。然永貞猜復自用。亦多有不盡聽者。惟故鄉修築。并通州城內置產。城外修橋。及每年巾帽局。鑿散靴料銀兩。皆賴紹呂區畫。崇禎六年。爲慶陵寶頂大雨衝塌。將紹呂擊赴司禮監。代永貞交贓三千五百兩。尋復職。後以內宮監管理。復經管慶陵工程。至十年秋八月二十六日。聖駕親臨都城。遍視雉堞樓櫓。奉旨著紹呂以總理。同總理馬光沂分左右幫。築外羅城。紹呂早夜拮据。年雖老而督催有法。勞可念焉。十一年九月間。工尙未完。猝值寇。由薊鎮牆子路入犯。蹂躪北直。遠至山東。未敢近都城也。紹呂爲人善應對。有識見。嫻兵略。好田獵。頗通堪輿家言。多智術。有心計。能尺牘文移。練達事體。揣事多奇中。與秉筆田玉契厚。於體乾爲同年。後投掌印高太監時。明高自己選擇墳地於白家潭。往西南地方。大覺寺山場。其名曰九龍山點穴。託紹呂同王國輔修造。曩臣曾聞盜甲廠王承恩。安

民廠李艾成云。曾各製大鐵鉤。生鐵銀錠。用小車運至墳。所以錮之。蓋但欲奉承當道石槨之堅。其自己職掌戎器之鐵。則不計也。夫臣子何處不可埋身。而不必九龍之名。爲墳亦不過鑿傷祖陵之龍脈。與高何所益耶。且先帝時。常永貞烜赫之日。富河之風水吉壤。門戶方向。亦向極力託人選擇。而今安在哉。總之□□未滅。何以家爲。永貞輩自見不及此也。永貞同列秉筆。惟石元雅。涂文輔。皆賢心腹名下也。具見本章經手次第中。其籍貫履歷。亦略序於後。王體乾。梁棟等。亦漫及之。

石元雅。北直雄縣人。萬曆辛丑選入兵仗局寫字。善射。好畋獵。不甚讀書。與紀用契厚。泰昌元年十一月。逆賢奏陞司禮監。歷任文書房。陞秉筆。掌針工局印。南海子提督。延請許乘彝爲掌家。首引崔魏之交者。許也。每見逆賢。卽屏人語。移時方出。及大工興後。每事而相授受。而許亦衰老不甚靠焉。至七年夏。寇犯寧錦。保全後。呈秀曾有一帖。復請許達。有請加九錫字樣。王朝用。李永貞等曾親眼見之。哂其諛佞。然逆賢默默已耳。元雅亦於天啓七年九月內告辭。十月內逃走。客死于外。

許乘彝。大興縣人。萬曆六年。選入皇城。曾侍盧太監受。歷陞內官監。總理工程。提督皇城木廠。總理各省大木。七年季冬。被霍維華參。奉旨著司禮監拏問。該監官鄭之惠等。問明具奏。又奉旨有搬遞線索等語。姑夾拶打。降淨軍。發鳳陽。崇禎元年夏。又被科臣祝世美參。奉旨提解。六月入刑部獄。後於都城隍廟少司寇丁啓睿等。受其重賄。以爲審無證據。仍發鳳陽。

涂文輔。北直安肅縣人。客氏在光廟青宮時。其子侯國興尙幼。遂延文輔在外教訓。天啓元年。文輔冒姓

姜選入皇城。陞管庫近侍。三年。歷陞乾清宮管事。四年。復本姓隨堂。又陞秉筆。掌御馬監印。總提督四衛營。又提督太倉銀庫。節慎庫。文輔姿容修雅。有心計。善書算。通文理。能辨論。好琴。善射。甫四載。而晉秩秉筆。賜坐蟒。棹。先帝升遐。逆賢因文輔爲徐應元照管之姪。且客氏之私人也。差文輔同心腹。名下王朝輔。迎請。今上聖駕踐祚。不想朝輔先退。而文輔及叛客魏。與李永貞共擁戴應元。幸上察其奸。斥之。先發鳳陽。崇禎元年三月。調發南京。新房間住。按太倉銀庫。戶部事也。節慎庫。工部事也。文輔並總督之。藉先帝寵靈。客魏逆焰。詣兩部到任。勒司官行屬禮。坐八人明轎。使甘蔗大棍。舒徐容與。揚揚長安道上。其呼殿之聲。比閣臣道子還雅。其音細而長。彷彿聖駕清御警蹕之聲。內官外官。無不下馬迴避者。又強買戚臣李承恩宅。大剝廩宇。其署額曰戶工總部者。乃主事王姓者所獻諛也。復將先朝公主家廟神主。逼遷別處。躡治不祥。內臣中第一人焉。凡魏崔等遞入姓名。惟文輔頗能記憶。一日吏部推湖廣司官汪始亨。李師沆。而師沆文輔之父母官也。遂亟查始亨姓名。與逆賢云同志。錄有名。攘奪如拾芥焉。初逆賢既矯旨殺劉克敬於鳳陽矣。馬謙者。克敬之照管老叔。曾任乾清宮管事。御馬監督。告病閒住已久。逆賢嗾文輔疏參。謙任監督時。所造火車銃礮。不如法。亦矯旨捏賊。降發鳳陽。復殺之。此天啓六年夏事。逆賢心腹馬昇。現在可鞠也。網漏吞舟。惟賄之力。今不過逆孽軍犯。近復蒙恩。改爲民。骨肉完聚也。

王體乾者。昌平州人。萬曆六年。選入皇城。爲蘇杭織造孫太監隆名下。讀書正途。萬曆二十八年。歷陞文書房。泰昌元年八月。密以重賄。求西李娘娘下李進忠。得充先帝典璽局印。九月初七日。秉筆掌御馬監

印辦膳。後噉賢殺一進忠以滅活口。天啓元年夏，掌尙膳監印及盧受發鳳陽奉先帝聖旨，着王安掌司禮監印矣。而霍維華者，直隸東光人，時任給事中，其妻弟陸蓋臣，天啓元年選入之內官也。爲高太監時，明名下，凡宮中動靜，霍最先知，遂具疏劾安，安再上辭疏，候繳溫旨卽出，而客氏憚安剛直，喜體乾軟媚，遂矯旨准安辭免，將司禮監印付體乾掌之。復陞諸棟等爲幫手，屢有中旨巧留，客氏與逆賢比暱爲奸，又外結沈灌爲謀主，逐大臣王紀、滿朝薦、劉一燝等，殺內臣王安、王國臣等，心蠶膽大，漸及妃嬪，皆體乾依阿逆賢也。天啓四年三月三十日辰時，成妃李娘娘誕生皇第二女，是時也。地大震，宮中殿宇搖撼，有聲，銅缸木桶之水，湧波震蕩，坐立者皆骨軟如醉。乾清宮大殿藻井內，所懸圓鏡，東西南北震動不定，如鏗舌焉。至五月初十日，太祖忌辰也。體乾等不穿青素，而穿青綠錦繡，其日未時，乾清宮東丹墀旋風驟作，將內官監之大鐵片，如屋頂方闊者，盤旋如紙，隔丹陛石闌干之上，拋擲於西丹墀，鏗訇若雷。其月晦，卽有楊漣二十四款之疏，是時汪文言尙繫詔獄，爲體乾者，若肯從國家起見，據外廷讜論，屏退兇逆，有何難者。乃輕徇掌家王朝用之密懇，且心感客氏培植掌印，遂將如許參本，不肯字字全念，而多方曲庇之。忍先帝孤立，忠言見忌，士大夫之禍，從此不可收拾。況又開廷杖之端，導稱頌之路，令無骨力，無遠識，患得患失之閣臣，出四六俚語之旨，凡口奏文書之際，體乾必歷指姓名，幾誤因錢謙益、黃尊素而波及無辜，良可嘆息。體乾爲人，柔貌深情，其貪無比，卽自己名下，如田玉等，而亦巧借題目，頻刻削也。凡司禮監題本年月之下，上層居中排，臣王體乾，臣魏忠賢，下層往後排，臣梁棟、李永貞、石元雅、涂文輔諸人，蓋

其媿惻心腸。只知獻諛。大非禮制。可惜典禮衙門。亦屑越至此。真可痛哭。其原疏現存者可證也。及刻內臣便覽。復甘心讓賢居首。特高一字。尤可笑焉。神廟時功。今寬。凡文書房官。俱得與外廷結識往來。楊維垣。霍維華。徐大化等。中旨之起。蓋不特逆賢一人而已。天啓七年八月。先帝不豫已久。乘先帝彌留之際。於八月十一日。召今上至御榻旁。玉音蹙蹙不已。而是日閣臣揭所批中旨。有禮臣。廠臣。輔臣等字樣。原揭具存內閣。可證驗也。二十日巳時。永貞自御前問安畢。到忠義堂直房。於衣袖內取出白連四大紙花。一箇內有鮮血一縷。長二寸餘。闊三四分。似肉非肉。似痰非痰。云自萬歲爺鼻中出來者。凝結如筋。當與丁紹呂及若愚等遞視之。有嗟嘆淚落者。若愚曰。此出自御前。龍體聖恙所關。不可輕易。遂用紙復包一層。上寫某月某日。老公御前請出。有血紙花一箇。隨粘於屋壁高處。至申時。太醫院官來問安御前。果索此血。以憑計藥。當即取下交進。至二十二日申時。龍御上賓。逆賢差文輔等迎請今上。先帝崩移晷矣。嗚呼痛哉。先帝聖性虛明。推赤心置內外臣子之腹。惜體乾。逆賢非宗社之器。而南樂。薊州。東光。又皆濃於名利。刻於報復之人。梁棟齷齪不足齒。李永貞。石元雅。涂文輔。皆少不更事。驟登榮寵。天低地窄。前無古人。後無清議。滿眼只知有富貴。滿腹只知有諂諛。嫉賢醜正。根於性成。伏法者伏法。逃亡者逃亡。或用重賄。苟免平安。向至夜氣清明。良心忽萌之際。一追思之。不知魂夢中。尙有何顏色而視息人間也。身死後。又有何面目對越先帝之靈於在天也。鄙夫鄙夫。可與事君也歟哉。體乾至崇禎己卯夏籍沒。逮刑部獄。擬斬。庚辰冬。死於獄。真天網恢恢。疏而不漏云。

梁棟宛平縣人。萬曆十一年選入。歷陞司禮監。提督太和山。天啓元年夏。逆賢拔陞秉筆。掌酒醋麪局印。馬謙力也。其兄梁植等。廕錦衣衛。陞都督同知。招權納賄。爲賢憎惡。七年秋。擯棟蘇杭織造。旋撤回京。今故。

趙秉彝北直新安縣人。萬曆二十九年選入。泰昌元年冬。逆賢奏陞司禮監。天啓七年。以監官差。送惠藩。陞秉筆。

孫暹北直晉州人。亦二十九年選入。神廟時。牌子王永永名下。侍賢最久。作人寬厚。陞文書房。歷任南京守備。陞秉筆。閒住爲民。戊寅冬。深入。暹守城犒軍。賴以保全。

王朝輔原名王朝忠。卽所稱黑王者。北直文安縣人。二十九年選入。侍逆賢久。先帝登極後。陞乾清宮管事。提督兩司。掌銀作局司苑局印。天啓七年陞秉筆。

李明道大興縣人。萬曆十七年選入。陞司禮監。提督南京守備。提督漕運。皆客氏力。而逆賢任之。自此之外。當年曾任乾清宮管事。牌子。掌銀作局印。曾於天啓七年五月。差往錦州。接濟禦。者胡明佐也。掌內織染局印者齊良臣也。掌尙衣監印者杜永明也。掌司鑰庫印者王秉恭也。總督忠勇營者譚敬斐。芳也。提督上林苑監四署者吳國泰。曹承恩也。掌混堂司印者李本志也。監督勇士四衛營者吳光成也。提督御酒房者李昇也。提督牲口房者張應詔也。此人乃客氏掌班張貴之姪也。又御茶房弓箭房之鄧汝敬。王國祚。鄭思廉等。總是逆賢名下。皆北直人。天啓元年選入。日在先帝御前。尙有煖殿近侍。并三年選入。

名下者數十人。不能備載姓名也。此外如領勅鎮守。并徐應元等。亦略次於左。以備攷焉。

劉應坤。北直新城縣人。二十九年選入。侍逆賢最久。歷陞管事。同時之劉忠曰大劉公。劉朝曰二劉公。應坤則三劉公也。總督忠勇營。掌御馬監印。後陞乘筆。遼東鎮守。便宜行事。駐劄山海關。天啓七年五月守寧遠。崇禎己巳丙子戊寅。深入。薄新城。應坤設法捍禦。備極心力。畏而宵遁。曹大監化淳疏稱其勞。紀用。北直文安縣人。二十九年選入。爲逆賢心腹。陞乾清宮管事。提督忠勇營。遼東鎮守。便宜行事。用竊通文字。慷慨有膽略。性孝友。天啓七年五月守錦州。

葛九思。北直延慶州人。天啓元年選入。逆賢名下。能書。精騎射。陞乾清宮管事。總督忠勇營。鎮守宣大山。西丙子秋。深入。九思死於山西某處。此外則張守誠。李應江。胡良輔等。不概錄也。

金良輔。孟忠。俱北直人。二十九年選入。泰昌元年冬。逆賢奏陞司禮監。任文書房。良輔正陽等門提督。忠大壩馬房提督。

楊國瑞。陝西臨潼人。天啓元年選入。逆賢名下。陞文書房南京守備。

李承堯。北直容城人。萬曆十一年選入。孫暹名下。歷陞內官監總理。

蘇若霖。北直安肅縣人。原名進忠。十七年選入。繇內府供用庫。陞內官監總理。天啓元年。費數萬兩。差往荊州。修惠藩府第。未就。因病撤回。與馬誠。李承堯。俱領大工。坐名勅書。分中左右三路督催。崇禎元年夏。以言官參論。承堯。若霖。都著司禮監拏問。追賊完日。俱發南京。更鼓房淨軍。誠先賢死久。承堯近日亦死。

於南京。若霖茹長齋。於崇禎六年爲慶陵寶頂兩損。復逮北繫獄。擬戍。仍發南京。修梵行。猶頭陀也。

徐應元。北直雄縣人。於逆賢爲同年同官。以兄事賢。天啓七年八月。陞秉筆。十一月。發承天後。降淨軍。調發鳳陽。按光廟莊妃之封。原因撫養。今上其薨也。的係應元氣鬱所致。近聞死於鳳陽。人咸謂天道不爽也。應元爲人不識字。幼無行。宿娼飲博。如談讀嫚罵。坐立傾欹。唇不蓋齒。形雖瘦長。而眉目無神采。腰股筋骨。若不聯屬。富病初起者。焉。神廟時爲管庫近侍。綽號徐雌才。云。蘇若霖與應元契厚。在大工時。每請應元會飲。差去內官。卽曾引見。今上於藩邸者數人。而內官監總理吳得中。更與應元厚。請掌家。繼陸乾。清宮管事。如王朝用故事。尋降處云。

趙進教。亦係孫暹名下。逆賢應元之嫖賭弟兄。因無賴隨福藩之國。秩甚卑。天啓五年冬。逆賢聽其密稟。譏譖。將福藩伴讀崔進。于進表到京之日。幾置之死。賴永貞力救始免。逆賢復破舊例。乘福藩差進教來京。奏陞御馬監裏草場貼場。陞玉帶內府騎馬。看守寶月亭。先帝遊幸。亦屢得瞻仰。天表云。至七年夏。先賢病死。喪葬極其盛也。

李實。北直雄縣人。萬曆六年選入。讀書正途。二十九年十月。神廟黜爲光廟伴讀。泰昌元年八月。陞秉筆。掌御馬監印。先帝登極後。差往選皇后。天啓元年夏。差往蘇杭織造。實爲人樸素無文。推聽掌家樊得和。孫昇等提掇。衆享其利。而實司其名。先因楊姜之事。頗與巡撫周起元不睦。及南樂通線索與逆賢。而崔呈秀等次第布罪。於六年二月內。逆賢勒要實空印本。著李朝欽等串謀。同孫昇等填寫。七君子之命始



斃。此事疊臣始終未見此本。夫空印本既出自孫昇之手，果是何人湊砌。江南事件，果屬何人捏稿填真。事關進呈，豈一人一手可能做得。惜崇禎元年七月初四日，聖明召對時，只辨硃墨之壓否，何如竟未調取實從來別本，與此本對字跡，但究及寫真之人，則自有寫稿造謀之人，再比對原本紅字，是誰所批。當時王體乾、梁棟、李永貞、石元雅、涂文輔五人之字跡，亦易認也。必如歷歷實核，直求到底，朝欽雖死，孫昇等見存，便言下明白矣。乃止以墨跡蓋硃，而指爲永貞成案。永貞雖死，真正捏砌填寫此本之人，尙漏網倖免，揚揚於聖明之世也。實原不知情，降南京淨軍，近亦老死，人尙多憐之。

王國泰者，京師人。二十九年選入，孝瑞顯皇后司禮監名下也。於李永貞爲同脈，謫南畿二十年。光廟登極，取回。天啓元年，退斥。後於大佛寺管工，客氏逆賢喜之，補今上藩邸局官，遂與徐應元爲一派人。天啓七年八月，陞秉筆，掌尙騰監印。十一月，發南京，後調承天，降淨軍，今爲民國。國泰性篤實多學，能書，尙氣節，善治生理，廣交遊，胸中坦率，無機械尖巧也。

馬謙者，宛平縣人。嘉靖四十一年選入，由司禮監寫字，歷陞內官監總理。逆賢救命之大恩人也。謙與秉筆梁棟契厚，陞乾清宮管事，改名馬誠，性剛直，曉營造，虛心采納，可則可，否則否，敢於逆賢面前持正不阿。卽內官監之掌印宋晉、李永貞，咸改容敬憚之。大工門閣三殿，初萬曆年間，馮御史嘉會掌河南道時，大家估計所需三千萬，計工二十年。至天啓年間，鼎建，馮以少司馬亦預估計，撙節，乃所費不過六百萬。誠區畫安詳，任勞任怨，祁寒暑雨，未之少懈。不四五年，克臻厥成，勞難泯焉。惟曾與總理戴福壽、汪良德

管理霍應奎有隙而幾置之死。人多少之。誠於天啓七年春病故。享年將及八十。富寵服食亦極。內臣之貴。何其生樂死安。得報康吉如此。抑前世種德因。而今生逸樂耶。不可知已。

紀用石元雅。俱兵仗局出身。好武勇。劉榮名下。馬獻祥。掌關防。掌司也。凡祖宗以來。庫藏中所蓄刀劍鎗銃。一切武器。最利最精者。逆賢以勢索取甚多。且轉賜心腹名下。胡良臣、葛九思、劉應坤、楊朝等。并姪魏良卿及甥傅應星等無算。此所以利刃在手。逢著便害也。

七君子姓名

周忠惠起元。周忠介順昌。繆文貞昌期。高宗憲攀龍。李忠毅應昇。周忠毅宗建。黃忠端尊素。




83  
14  
:3966


酌

中

志

二





叢書集成

初編


主編者  
王雲五

商務印書館發行

3967



酌 中 志  
(二)



劉若愚撰

北京圖書館藏

A 024456

# 酌中志卷之十六

## 內府衙門職掌

皇明祖訓所載。設立內府衙門。職掌品級。立法垂後。亦盡善盡美。惟是間有祖訓所未及載。或載而未詳者。謹譜次梗概于左。按內府十二監。曰司禮。曰御用。曰內官。曰御馬。曰司設。曰尙寶。曰神宮。曰尙膳。曰尙衣。曰印綬。曰直殿。曰都知。又四司。曰惜薪。曰寶鈔。曰鐘鼓。曰混堂。又八局。曰兵仗。曰巾帽。曰針工。曰內織染。曰酒醋麪。曰司苑。曰浣衣。曰銀作。以上總謂之曰二十四衙門也。此外有內府供用庫。司鑰庫。內承運庫等處。亦臚列於後。司禮監。掌印太監一員。乘筆隨堂太監八九員。或四五員。設有象牙小牌一面。長寸餘。每日申時。交接輪流。該正凡每日奏文書。自御筆親批數本外。皆衆太監分批。遵炤閣中票來字樣。用硃筆楷書批之。間有偏旁偶訛者。亦不妨略爲改正。最有寵者一人。以乘筆掌東廠掌印。秩尊視元輔。掌東廠權重。視總憲兼次輔。其次乘筆隨堂。如衆輔焉。皆穿貼裏先斗牛。次陞坐蟒。先內府騎馬。次陞攬杓。祿米每陞一級。則歲加祿米十二石。各家私臣曰掌家。職掌一家之事。曰管事。辦理食物出納。銀兩曰上房。職掌箱櫃鎖鑰。曰掌班。領班。鈐東西班。答應官人曰司房。打發批文書。謄寫應奏文書。其下則管帽。管衣靴。茶房。廚房。打聽官。看莊宅。各瑣屑事務也。其餘大小衙門。遇有應題奏事情。皆先關白司禮監掌印。乘筆隨堂而始行。凡御前親近大臣。如乾清宮管事。打卯牌子。其秩亦榮顯。猶外廷之勳爵戚臣然。皆得

掌各衙門之印。視其寵眷厚薄而欽傳界之。不拘資次。司禮監提督一員。秩在監官之上。于本衙門居住。職掌古今書籍名畫冊葉手卷筆墨硯綾紗絹布紙劄。各有庫貯之。選監工之老成勤敏者。掌其鎖鑰。所屬掌官四員。或六員。佐理之。并內書堂亦屬之。又經廠掌司四員。或六員。在經廠居住。只管一應經書印板。及印成書籍。佛藏道藏。番藏。皆佐理之。自提督以下。則監官典簿十餘員。第一員監官。提督皇史宬。并新房候轉提督。俱輪流該正。在廊下家宿。專理皇城內。一應禮儀刑名。鈐束長隨。堂差聽事。各役關防門禁。至逆賢擅政時。令與文書房輪挨。遇雙月十六日。前往教場比試武職應襲。其次六科廊掌司六員。或八員。分東西兩房。管精微科。內外章疏。及內官脚色履歷職名。月報逃亡事故數目。其次人數十員。或八員。管二十四員衙門山陵等處。內官職級姓名。撰寫每日傳行聖旨。稽查門禁。鈐束常差聽事。題奏應行禮儀。應頒賞賜。其次六科廊。謄黃寫字一員。其次管掌寫字。則按節令挨次。題稟禮儀文書及賞例。或百員。或數十員。分兩班四撥。各若干人。其班按十二支輪之。曰頭頂。整一日過夜。曰守早。從卯至申。曰守晚。從申至次日天明。曰末頂。整一日過夜。方得下班歇息四日也。凡遇聖駕朝講遊幸。穿麟補。紅襪。執藤條。攔擋者。皆掌司人數寫字也。或轉經廠司禮監掌司者。則每撥內。另有一種衙門寫字。共十餘員。挨補而已。自提督至寫字。俱穿襪。凡出入皇城各門。軍接與擋道。自內書堂奉旨派撥者。名曰正途。其次或乞恩奏保。改陞者。亞焉。按祖宗舊制。必照依欽錄姓名。挨次魚貫陞轉。罔敢撓越。自逆賢擅政。盡將歷練老成之人。擯斥殺害。內御司房。或退出于冷淡衙門。林衡等署西。各以名銜前後分管之。其在外之關票。



在內之搭票一應旨意聖諭御札俱由文書房落底簿發行所以如今凡掌司陸轉文書房者概削去司禮監銜都借列內官監銜其呈稟文書具見經手次第中然不過逆賢時如此耳先時從公揆轉雖非外衙門選擇委任尙可觀也而逆賢盡行斥退信用自己名下間有一派少不更事之人非制也按舊制後右門卽雲臺右門之北隆宗門之南坐東朝西房一連原名協恭堂每日早晨或非朝講之日及申時後掌印公過司房看文書秉筆隨堂人各有室挨次細看先看文書房外本次看監官典簿文書自逆賢竊柄其規矩蕩廢無遺所以事事苟且萬歷年間先監過司房例印公穿直身率秉筆等都是單身入室其親信掌班人等一人不得入機密禁近理應如此奈王體乾黨附無骨而逆賢不識字遂公然于乾清宮大殿上看文書或懋勤殿板房看文書硬拆實封高聲朗誦又挨次到各人直房那一家管文書看直房掌班司房官人肯不出宮門不張權勢如纍臣者乎不過大同房議批改正也如欲君德昭明左右得人須先振刷內書堂起欲章疏不洩漏權不旁落須有好明白印公不徇私不憚勞仍復早晚過司房之舊制始如欲真才柄用中外不水火須大破逆賢積習爲官擇人不爲自己子孫擇官始在聖主自無一番一番如傳舍用人之理在內臣亦聞風觀感羣于爲善庶免本官勢倒連累退斥之患此必得虛明爲國淡名利忘報復之人柄政當朝立賢無方庶可辦此若只悠悠忽忽張三敗了便將他支派退淨李四敗了又如此趙甲王乙又如此縱有真心爲國束身自好者恐亦孤掌難鳴也東海逝波其奈之何哉凡御前面考隨堂秉筆自崇禎元年冬欽出事君能致其身題者鄭大監之惠曹太監化淳中式始至十二年

夏李太監承芳署司禮印時。其名下願三聘者。亟圖速化。遂密托己之名。下王建鼎。代選于衆時藝一篇。被巡綽官發其事。李不得已。奏知聖上。立將三聘責斃。降建鼎淨軍。發南海子。看守牆鋪。其年秋。李褫職逮獄。偶言及此。纍臣曰。重懲三聘。甚當。李曰。何也。纍臣曰。彼草野寒士。或迫于家貧親老。行險徼倖。世所間有。罪不致死。今三聘職叨典禮。于御前面考。隨堂秉筆。自崇禎元年冬。乃敢藐視憲典。迫挾名下。任性冥行。至此。便是犯一欺字了。于臣子之誼安乎。嚴懲處死。不爲苛也。

內書堂讀書。自宣德年間創建。始命大學士陳山教授之。後以詞臣任之。凡奉旨收入官人。選年十歲上下者。二三百人。撥內書堂讀書。本監提督總其綱。掌司分其勞。學長司其細。擇日拜聖人。請詞林衆老師。初則從長安右門入。北安門出。後則由北安門出入。每學生一名。亦各具白蠟手帕龍掛香。以爲束脩。至書堂之日。每給內令一冊。百家姓。千字文。孝經。大學。中庸。論語。孟子。千家詩。神童詩之類。次第給之。又每給刷印做影一大張。其功課。背書。號書。判做。然判做。止標日子。號書。不點句也。凡有志官人。各另有私書自讀。其原給官書。故事而已。派年長有勢力者。六人或八人爲學長。選稍能寫字者爲司房。凡背書。不過寫字不堪。或損污書做。犯規有罪者。詞林老師。批數目付提督責之。其餘小事。輕則學長用界方打。重則于聖人前罰跪。再重。扳著幾炷香。扳著者向聖人前。直立灣腰。以兩手扳著兩脚。不許體屈。屈則界方亂打如雨。或一炷香半炷香。其人必眼脹頭眩。昏暈僵仆。甚而嘔吐成疾者。此最酷。最不近理之法也。凡強凌弱。衆暴寡。長欺幼者。每賄托學長。借公法以報私怨。此第一陋套。所宜痛革者也。嘉靖年間。讀書官人。

有年少貪睡者散學時。人叫不起。遂鎖在內。半夜聞有呼殿聲。儀衛甚衆。云聖人到。搜得此官人。聖人曰。既得見我。可謂有受教之分。視有何書。取來我親教之。不意案有大統歷一冊。乃指誦一週。至天明向人言。如此試令背誦。一字不差。又姜淮者。少年有口。值殷太史士瞻教書。偶不在室。淮戴其紗帽。束其帶。正在室中搖擺作勢。殷猝至。淮不知帶插橫解法。殷不懌。淮曰。師父還繫玉帶哩。此銀帶何足貴。殷笑而釋之。歸寓向夫人備道相笑。萬歷初。殷入相東玉夫人尙憶淮名。白殷托馮太監保察之。見任御馬監。奉御隨令赴殷寓。拜見師母。殷山東人。罷相致仕時。淮送至天津始回。凡讀書官人。遇令節朔望。亦放學一日。其每日暮放學。則排班題詩。不過雲淡風輕之類。按春夏秋冬。隨景而以腔韻題畢。方擺列魚貫而行。有不知而撓越者。必羣打詬辱之。別衙門官。遇學生排班行走。必拱手端立讓過。卽司禮老公遇之亦然。凡各衙門缺寫字者。卽具印信本奏討。奉旨撥若干名。卽挨名給散。至逆賢時。此制大壞無餘。殊可嘆也。凡內書房官人。已撥散將完。無人讀書。該監題知于二十四衙門官。占官下及監工。改讀書以補之。其實事久弊生。冥頑貪詐。或竊獲兇猾。總非作養人才良法也。如欲痛改前轍。只在聖主右文。主持于上。好印公提督掌司。振飭于下。不吝教。不憚煩。詞林老師。激勸于外。不倚勢。有良心學長。曉事年長。應之于中。不三五年卽有成效。十年內外。國家自享真才之用。消元黃之戰于廟堂。衍無疆福澤于億世。顧惟在位者加意何如耳。禮儀房署。在東安門外。舊都府草場之東。向南。提督太監一員。掌印乘筆攝之。掌司及寫字管事各數員。本房長隨數員。掌管一應選婚吉禮。每年四仲月。選乳媪生男十口。生女十口。月給食料。在妳

子府居住。凡宮中有喜鋪月子房。生男生女。各一二口。在文華殿西北臨河之小房住。及報生皇子。則用生女。嫁口。皇女則用生男。嫁口。彌月。翦髮。百日命名。及請髮留髮。入囊冊。立冊封。選妃。打扒角。選駙馬。一應禮儀。皆經理之。

中書房。掌房官一員。散官十餘員。係司禮監工。年老資深者。挨轉。專管文華殿中書。所寫書籍對聯扇柄等件。承旨發寫完日。奏進御前。凡宮中糊飾。如不放外匠。只是監工。并學手。懸牌子糊飾。挨轉此處。并御前作至貧老無依。則發外經廠看守。以待斃焉。凡司禮監掌印。秉筆隨堂。故後。各有牌位。送外經廠供安。各有影像。送西直門外大佛寺供安。看廠監工守寺僧人。侍香火不絕也。

御前作掌作官一員。散官十餘員。亦是監工。年老資深者。挨轉。專管營造龍牀龍桌箱櫃之類。合用漆布。桐油銀硃等件。奏准于甲字庫關支。已上二處。亦掌印或秉筆提督之。

司禮監外差南京。正副守備太監二員。關防一顆。其文曰。南京守備太監關防。護衛留都。爲三千里外親臣。轄南京內府二十四衙門。孝陵神宮監官。奏進神帛鱗魚苗蠶等鮮。各衙門印文。比北京多南京二字。孝陵神宮監。掌印太監一員。別衙門可陞。不係司禮監也。轄本陵僉書掌司。及謫種菜淨軍人等。

天壽山守備太監一員。關防一顆。轄十二陵。掌印僉書。工部廠掌司等官。凡每年清明。親率各掌印來京。奏添土木。每歲進松花。黃連。茶。核桃。榛栗等果。各陵皆有晾果廠在京。

鳳陽守備太監一員。關防一顆。護衛皇陵。轄僉書數十員。兼管高牆。犯罪宗室。

湖廣承天府守備太監一員。關防一顆。僉書數十員。轄承德荆襄地方。護衛顯陵。徵收籽粒。每年進茶扇葛布、香茶、手巾。

太嶽太和山鎮守太監一員。關防一顆。轄均州等處。經管本山香火羽流。進榔、梅、鷹嘴筍、嵩山茶等件。

正陽等九門。永定等七門。正副提督二員。關防一顆。已上六處。秩在文書房監官之上。并孝陵掌印。各有勅諭。又正陽等門掌司一員。秩視六科廊。然不隨內轉。缺則補之。近已裁革不補。

大壩等馬房。正副提督太監二員。勅諭關防。秩在文書房之次。外衙門官亦間任之。

蘇杭織造太監一員。亦有勅諭關防。秩視乘筆。而安逸尊富過之。萬歷年間。惟孫太監隆。先監之同年也。多學善書。曾刻通鑑總類中鑒錄等書。所造清謹堂墨。款製精巧。猶方于魯。程君房。而劑料精細。爲殊勝焉。神廟最重之。今不易得也。隆在蘇杭日久。又以暇日。重修西湖蘇堤。從容儒雅。蓋事辦而民不擾。大得東南民心。至今思之未艾也。掌印王體乾。乘筆王文致。皆隆名下也。今上卽位。憫東南財物凋敝。特停止不差。

東廠自成祖卽位。永樂十八年始置。其外署在東安門外迤北。提督太監一員。關防一顆。勅諭最爲隆重。凡內官奉差關防。皆曰某處內官關防。惟此處篆文曰。欽差總督東廠官校辦事太監關防。自泰昌元年九月。先帝登極後。歷掌東廠者鄒義、沈蔭、宋晉也。至天啓四年春。逆賢掌廠。其年夏。李永貞偶分批一疏。疊臣見面上關防。因稟永貞曰。此廠何如。直省提督學道關防。彼俱因避御名。題請改鑄。此臣子尊君之

體不忍缺者。東廠係內府親近衙門。何三四年尙用舊關防。無人題請改鑄可乎。永貞始竊歎稱曰。老爹素通六經。可謂識體。卽轉白。逆賢曰。眞字我尙不識。這篆字誰能認得。隨令廠司房呈稿具題改鑄。更官校曰。官旗也。及六年以後。內臣紛紛出鎮。值陶文討鑄關防。不過曰內臣內官足矣。不意關票欠詳。先帝御札于關票內誤增太監二字。王體乾等不達體制。含糊奉行。未之奏正。聞近日鑄給者。亦多稱太監。各人原疏可證也。本廠設掌貼刑千百戶。二員掌貼。領班司房四十餘名。圓帽。皂靴。穿直身。十二顆。管事圓帽。襖。皂靴。其擋頭辦事百餘名。分子丑寅卯十二顆。圓帽。襖。褶。白靴。番役千餘名。外署大廳之左。小廳供岳武穆像一軸。廳後磚影壁。雕狻猊等獸。狄公斷虎故事。存此者良有深意也。大廳西有祠堂。內供從來掌廠職名牌位。前有坊曰百世流芳。稍南有獄一處。凡重犯則繫此。輕犯于連則在署外之店也。署西南有門。以通出入。向南大門。不恆開也。近年將西門改牆。而井中水無故汎濫。是以鄭太監之惠。李太監承芳。相繼褫職。逮刑部獄。人或以爲宜。仍開西門爲妥云。凡中府等處。會審大獄。北鎮撫司。拷訊重犯。本廠皆有人聽記其口詞一本。撈打數一本。于常晚或次早奏進。每日訪看兵部。有無進部。有無塘報。京城各門皇城。各門關防出入。俱有事件奏聞。或地方失火。或雷擊何物。亦奏聞之。每月晦日。奏報在京雜糧米豆油麪之價。此祖宗良法深意。欲九重之上。覽物價之多寡。卽知農歲之豐歉。以商賈之通塞。卽知道路之險夷。總留意民。曷第一義也。凡皇城禁地。人命亦皆有事件。其內署在東上北門之北街。東混堂司之南。萬曆初年。馮太監保奏建古槐森鬱。廡宇肅然。凡各處辦事打來事件。皆到內署。先見廠公心腹內。

官發司房刪潤奏之。逆賢專政時，所獨信任者李朝欽耳。天啓元年二月，因□□之患，將元武門外入賣貨物大市，奉旨挪改于東安門外戎政府街。民間謠曰：大市去矣。至七年秋，皇極等殿告成，復奉聖諭：前朝後市之義，仍將大市移入元武門外。時先帝違和久，逆賢因飭夜禁，被巡撫提督張體乾一言所激，曰：夜巡非不禁，奈有內裏犯夜。巡軍那敢問，又因客氏之母路遇一醉內官爭道，惡罵馳去。逆賢大怒，遂猝布旗番，卽于初三日晚，捉得夜行內官陳烏眼等十餘人，聽李朝欽之言，乘大市之日，賢親自到內東廠，將犯夜內官各狠打一頓，有發鳳陽，有發南海子者，致死于路者數人。逆賢坐板，由元武門入，王體乾等凡在河邊居住掌家，皆望塵跪伏道旁。俟賢過方起。其市上買賣人觀看，亦有叩頭匍匐，俟過而方起者。此逆賢肆毒作威之末一著也。內署有扁曰：朝廷心腹，有至聖堂，有井，其掌廠公宮中，直房有欽給密封牙章一枚，凡事件應封奏者，以此鈐封。逆賢擅政，更造一差大者，曰東廠密封。凡在賢左右念本章者，蘇雄、陳福壽、李朝欽，裴有聲也。每日清晨叩頭旁立，挨次回通本封本票本話者，李永貞、石元雅、涂文輔三人，如孫進、郝隱儒等，概不聞也。凡先帝御前奏念事件，亦止此三人。李朝欽等亦不及也。

內官監掌印太監一員，其所屬有總理、管理、僉書、典簿、掌司人數，寫字、監工、自典簿以下，分三班。宮中過夜，每班掌司第一人曰掌案，所管十作：曰木作、石作、瓦作、搭材作、土作、東作、西作、油漆作、婚禮作、火藥作，并米鹽庫、營造庫、皇壇庫、裏冰窖、金海等處。凡國家營建之事，董其役。御前所用銅錫木鐵之器，日取給焉。外廠甚多，各有提督掌廠等官。眞定府設有抽印木，值管理太監一員，則內官監之外差也。四年一撥。

只有本監公文。無敕書關防。及寶坻縣收籽粒。西湖河差大石窩。白虎澗等處。各有提督俱外差也。凡外方修建。分封藩王府第。亦是管理外差也。須數萬金。營求方能到手。領敕書關防前去。工竣卽回。天啓元年。湖廣衡州府。修桂藩府第。管理翟應魁。遞銀四萬。未能得。黃用費五萬卽得之。餘差可以例其多寡矣。無惑乎桂藩地基不堅。殿宇傾塌也。凡大行帝后陵寢。妃嬪皇子女薨。修造墳塋。及完姻修理府第。皆其職掌。天啓元年春。慶陵工興。御前所發帑銀五十萬。卽有分侵八萬者矣。欲堅美完善得乎。至七年春。今上大婚禮成。藩邸殿宇。及陳設器具。俱塗飾草率。皆李永貞貪其侵冒。包工了事。漫不加意之所致也。可恨極矣。永貞伏法。而經管員役漏網。謂非孔方之力哉。

御用監掌印太監一員。裏外監把總二員。猶總理也。有典簿掌司寫字監工。凡御前所用圍屏擺設器具。皆取辦焉。有佛作等事。凡御前安設硬木牀桌櫃。及象牙花梨。白檀紫檀。烏木鶴鶉木。雙陸棋子。骨牌梳櫛。標甸填漆。雕漆盤匣扇柄等件。皆造辦之。仁智殿有掌殿監工一員。掌管武英殿中書。承旨所寫書籍。畫扇。奏進御前。亦猶中書之于文華殿中書也。

司設監掌印太監一員。有總理僉書等官。如內官監。而所職掌者。鹵簿儀仗。圍幙褥墊。各宮冬夏簾。涼席。帳幔。雨袱子。雨頂子。大傘之類。事最煩苦。遠不逮御用監內官監。有盈餘肥潤也。如遇御前。打點庫藏。揀箱。則此三衙門之人。皆任重擡運。不敢憚勞。

御馬監掌印太監一員。有監督提督。四衛營勇士。小廝。有監官典簿。掌司寫字。擊馬象房掌房等官。牙。母。



象九隻。各居一房。缺則外象房補之。金鞍作長隨房等處。各有監工。本監象房之東。有裏草欄草場。皇城之外。有天師菴草場。舊都府草場。天啓六年夏。舊草場失火。逆賢率內外官員軍士人等救撲。三日始息。都城東北有大壩等二十四馬房。大壩城垣。逆賢重創一新。李魯生巡青之疏所諛者是也。凡逆賢出外到此。則于城樓上陞座飲酒。至夜。則花礮巧線盒子烟火之類。皆在城下放看。如元宵焉。

神宮監掌印太監一員。司禮監監官。或文書房無力者陞之。有僉事掌司十餘員。在端門之左。九廟在焉。四孟之朔。聖駕親享之。正旦及別朔。或遇日食。則改卜于初五前後行。其餘節令祀事。惟謹。卽外太廟也。其地無敢畜犬者。萬歷年間。掌印杜用養一獬豸小犬。最爲珍愛。東廠李太監後訪知之。指爲違禁。不敬。聲欲參奏。費千餘金。方得免。

尙膳監掌印太監一員。光祿寺西門提督太監一員。西華門內裏總理太監一員。管理僉書掌司數十員。寫字監工。及外牛房羊房等廠監工百餘員。而擡供養官撥子長隨各數十員。光祿涼樓醬房逢七等項。各有監工坐家名色。職掌造辦。每日早午晚。奉先殿供養膳品。乾清宮等宮。一號殿。仁壽宮等宮。眷月分廚料。各有差等。凡在御掌印。秉筆。管事牌子。暖閣近侍。及外之內閣文華武英殿。中書畫士。桌兒銀兩。咸光祿寺職掌。用典簿關防緘封。每月酒飯一桌。折銀十兩有奇。半桌者五兩有奇。到每月晦。照欽賞數目。坐名頒給之。光祿寺志可考也。凡遇大典禮。萬歲爺陞大座。則司禮監催督光祿寺備辦茶飯。鐘鼓房承應九奏之樂。有所謂炮鳳烹龍者。鳳乃雄雉。龍則宰白馬代之耳。至如南京等處。進各樣鮮品。皆屬收納。

天啓以前。凡聖駕每日所進之膳。俱司禮監掌印秉筆掌東廠者。二三人輪辦之。近年改由此監。亦節省。意至十三年。復令司禮掌印掌廠秉筆。炤先年例。按月輪流辦膳。仍遵祖制也。

尚寶監掌印太監一員。僉書等官數十員。職掌御用寶璽。敕符。將軍印信。其所可知者。尚寶司凡所領者。曰皇帝奉天之寶。郊天齋醮用之。曰尊親之寶。上尊號用之。曰親親之寶。有大小二顆。與藩府用之。誥命之寶。敕命之寶。廣運之寶。則用之最也。御前之寶。則宮中庫藏箱鎖用之。曰御藥謹封。則牙刻者也。御藥房用之。凡敕命遠出者。仍用一黃紙封套。上下悉用牙刻方寶封識之。其文曰。丹符出驗。四方之寶。其餘咸玉刻也。凡寶皆內尚寶女官掌之。遇用寶。則尚寶司以揭帖。赴尚寶監。監請旨。然後赴內司領取。歲用寶三萬餘顆。歲用寶色銀六十餘兩。工部虞恆司辦進。別項供億不盡載也。其餘寶璽尚多。不恆用。天啓甲子冬。河南巡撫程紹。遣副使張夢鯨。進到玉璽。玉質瑩潔。款制渾朴。其白文曰。受命于天。既壽永昌。似小篆。不甚古。角無剝缺。的非秦璽。想是宋元時僞造者。惟關臣魏廣微。誇大其詞。從臾逆賢。播告中外。以爲此璽之進。正在萬方慶祝之前。又值朝政維新之會。顯是瑞應。實所以榮感先帝。受賀稱慶。藉肆報復云。

印綬監掌印太監一員。僉書掌司數十員。職掌古今通集庫。并鐵券誥敕。貼黃印信圖書。勘合符驗信符諸事。及南京解文武誥軸。凡追奪誥命。交納本監。會同該科給事中。中書舍人。於勘合底簿內。附寫爲事緣由。于本監後小門之西。傍河牆焚化。

直殿監掌印太監一員。僉書等官數十員。職掌皇極、建極、中極、武英、文華、殿庭樓閣廊廡流掃之役。最勞苦冷局。無大廳公署也。

尙衣監掌印太監一員。管理僉書掌司等數十員。掌造御用冠冕袍服。履舄靴襪之事。兵仗局之南。舊監庫之北。卽本監裁縫匠役成造御用之袍房也。又名曰西直房。萬曆時。凡造上用袍服之裏。合用杭紬等絹。例具尺寸數目。于東廠太監處取辦之。不知今尙如此否也。萬曆三十三年冬。御前偶失珍珠袍一件。神廟震怒。命先監矩親至袍房拷問數次。時掌管內官王乾、王進、王保三人。素不睦。而互訐陷之。先監怒其愚狡。察其實寃。竟不爲嚴旨所拘。再四撻鞠。了無盜袍證據。時王進孱弱。被掠病亡。王乾等奉旨降淨軍結局。其後數年宮中有人云。此袍是一貴顯宮女偷出。付其答應內官。拆碎變賣。人始追感先監之明允淑問也。尙希旨煅煉。則支連蔓引。含寃而死者。寧能再生乎。益知執法者。凡事宜虛公詳慎可也。都知監掌印太監一員。甚不顯貴。餘皆本監寫字長隨。各有青紅執事衣服。凡聖駕出朝謁廟等項。在前警蹕清道者。卽此監之官也。執骨朵。身穿鸚哥等補子。戴平巾。或官帽。亦有穿圓領襖襍者。其人極寒苦。難以陞轉。下下衙門也。

惜薪司掌印太監一員。總理數十員。僉書掌道寫字監工數十員。各外廠又數十員。專管宮中所用柴炭。及二十四衙門、山陵等處。內臣柴炭。每月初四、十四、廿四日。開元武門。放夫匠及打掃淨軍擡運。堆積糞壤。每年春暖。開長庚、蒼震等門。率夫役淘浚宮中溝渠。正旦節安彩粧。凡遇冬寒。宮中各銅缸木桶。該內

官添水湊安鐵鑄其中。每日添炭以防冰凍備火災。候春融則止。皆惜薪司事也。凡宮中所用紅籬炭者。皆易州一帶山中硬木燒成。運至紅籬廠。按尺寸鋸截。編小圓荆筐。用紅土刷筐而盛之。故名曰紅籬炭也。每根長尺許。圓徑二三寸不等。氣煖而耐久。灰白而不爆。如經伏雨久淋。性未過盡。而火氣太熾。多能損人。倏令眩暈昏迷發嘔。大人尙可。皇子女嬰幼何堪。又宮中咸木做地平牆壁。多缺土氣。凡乳母畏寒。皇子女或中此毒。屢致薨夭。良可痛也。順天府歲供糯米十五石五斗。永平府歲供紅棗一萬五千五百七十觔。于紅籬炭交納之。廠中舊有香匠塑造香餅獸炭。又塑造將軍。或福判。仙童。鍾馗。各成對。高二尺許。用金彩裝畫如門神。黑面黑手。以存炭制。名曰彩粧。于十二月廿四日。奉安于宮殿各門兩傍。此亦歲暮植將軍炭于門傍之遺意也。至次年二月初二日。仍擡歸本廠修補粧新。臨年節再安。逆賢專政。則各增而大之。所費百倍于前。傀儡體做法。高八九尺丈餘不等。穿以真正綾絹紵。備以真正弓矢兵器。鬚眉直豎。猛惡如生。又恐無知之人。戲弄損壞。凡該地方近侍。必明燈看守。雖冰雪寒夜。不敢遠離。必交接明白。人人敢怒而不敢言也。凡隆德等殿。修建齋醮。焚化之際。用楊木長柴。宮中膳房用馬口柴。內官關領則片柴也。外有北廠南廠西廠東廠。新西廠新南廠等處。各有掌廠僉書監工。貯收柴炭。以聽關支。鐘鼓司掌印太監一員。僉書數十員。司房學藝官二百餘員。掌管出朝鐘鼓。凡聖駕朝聖母回。及萬壽聖節。冬至年節。陸殿回宮。皆穿有補紅帖裏。頭戴青攢。頂綴五色絨。在聖駕前作樂。迎導宮中。陸座承應。凡遇九月登高。聖駕幸萬壽山。端午鬪龍舟。插柳。歲暮宮中驅儺。及日食月蝕。救護打鼓。皆本司職掌。西內

秋收之時。有打稻之戲。聖駕幸旋磨臺無逸殿等處。鐘鼓司扮農夫。餽婦。及田畯官吏。徵租交納詞訟等事。內官監衙門伺候。合用器具。亦祖宗使知稼穡難艱之美意也。又過錦之戲。約有百回。每回十餘人。不拘濃淡相間。雅俗並陳。全在結局有趣。如說笑話之類。又如雜劇故事之類。各有引旗一對。鑼鼓送上。所扮者備極世間騙局醜態。並閨壺拙婦。駢男及市井商匠。刁賴詞訟雜耍把戲等項。皆可承應。又御用監武英殿畫士。所畫錦盆堆則名花雜果。或貨郎擔則百物畢陳。或將三月韶光。富春山子陵居等詞曲。選整套者。分編題目。畫成圍屏。按節令安設。總皆祖宗原因。聖子神孫。生于宮壺之中。長于阿保之手。所以製此種種作用。無非廣識見。博聰明。順天時。恤民隱之意也。猗歟盛哉。意淵微矣。又上元之前。或于乾清宮丹陛上。安七層牌坊燈。或壽星殿。安方圓籠山燈。有高至十三層者。派近侍上燈。鐘鼓司作樂。讚燈。內府供用庫備蠟燭。內官監備奇花火礮。巧線盒子烟火。火人火馬之類。誠所謂瞬息之樂。粧點太平。或藉此孝娛聖母。未爲不可。但火燭擔驚。糜費甚鉅。思及民瘼。實可惜焉。又木偶戲。其製用輕木。雕成海外四夷蠻王。及仙聖將軍士卒之像。男女不一。約高二尺餘。止有臀以上無腿足。五色油漆。彩畫如生。每人之下。平底安一樺卯。用三寸長竹板承之。用長寸餘闊數尺。深二尺餘。方木池一箇。錫鑲不漏。添水七分。滿下用橈支起。又用紗圍屏隔之。經手動機之人。皆在圍屏之內。自屏下游移動轉。水內用活魚蝦蟹螺蛙。鯢鱔萍藻之類。浮水上。聖駕陸殿座向南。則鐘鼓司官在圍屏之南。將節次人物。各以竹片托浮水上。遊鬪頑耍。鼓樂喧哄。另有一人執鑼在旁。宣白題目。贊傀儡登答道。揚喝采。或英國公三敗黎王故事。或

孔明七擒七縱。或三寶太監下西洋。八仙過海。孫行者大鬧龍宮之類。惟暑天白晝作之。如耍把戲耳。其人物器具御用監也。水池魚蝦內官監也。圍屏帳帷司設監也。大鑼大鼓兵仗局也。乍觀之似可喜。如頻作之。亦覺煩費無餘矣。先帝最好武戲。于懋勤殿陸座。多點岳武穆戲文。至瘋和尚罵秦檜處。逆賢常避而不視。左右多笑之。自天啓六年以後。凡御前插科打諢。本有鐘鼓司僉書王進朝。綽號王癩子。抹臉談諧。公然稱贊。惜薪司怎樣軫恤商人。內府庫怎樣米積天堆。東廠怎樣釐奸剔弊。寶和店怎樣裕國通商。內修朝政。外鎮邊疆。或稱好箇魏公公。或誇好箇魏太監。逆賢居之不疑。自以爲美。先帝聖顏亦爲喜悅。回想憲廟時。汪直擅權。尙有懷恩之流。居帝左右。所以阿丑敢譎諫也。今王體乾既熟軟巧媚。在王癩子不過俳優賤役。自然因而化之。可嘆也已。因想稱功頌德。又寧止章疏間哉。五年之九月九日。駕幸萬壽山。鐘鼓司太監邱印。執板清唱。雒陽橋記內之攢眉黛鎖不開者一套。至六年九月登高。邱印仍唱此曲。識者已哂其不合景。失大體矣。撫今思昔。亦莫之爲而爲。良非佳兆云。神廟孝養聖母。設有四齋。近侍二百餘員。以習宮戲外戲。凡慈聖老娘娘陸座。則不時承應。外邊新編戲文。如華岳賜環記。亦曾演唱。是日神廟侍側。見權臣驕橫。寧宗不振。至云政由寧氏。祭則寡人。神廟亦矚目不言者久之。先是仁聖陳老娘娘在時。凡遇節令。聞必恭請兩宮聖母于乾清宮大殿陸座。神廟先在雲臺門之下。朝北立候。仁聖老娘娘。娘。娘。至景運門。慈聖老娘娘。娘。娘。至隆宗門。神廟卽居中朝北跪接。候兩轎俱至乾清門方起。中宮王娘娘。扶請仁聖老娘娘。皇貴妃鄭娘娘。扶請慈聖老娘娘入宮。陸座。神廟遞酒膳。下氣怡聲。膝行叩拜。周旋中。

禮傾心孺慕。從來古今帝王聖孝所希觀也。神廟又自設玉熙宮。近侍三百餘員。習宮戲外戲。凡聖駕陞座。則承應之。又蔡學等四十餘人。多怙侈不法。自萬歷己亥秋。俱下鎮撫司獄。至庚申秋。光廟始釋。然瘦死者已十之三四也。此二處不隸鐘鼓司。而時道有寵。輿暖殿相亞焉。

寶鈔司。掌印太監一員。管理僉書十餘員。掌司監工數十員。每年工部商人辦納稻草石灰木柴若干萬斤。又香油四十五斤。以爲膏車之用。抄造草紙。堅不足二尺。闊不足三尺。各用簾抄成一張。卽以獨輪小車運赴平地晒乾。類總入庫。每歲進宮中。以備宮人使用。至聖上所用草紙。係內官監紙房抄造。淡黃色。綿軟細厚。裁方可三寸餘。進交管淨近侍收。非此司造也。神廟至先帝。惟市買杭州好草紙用之。祖宗時抄造印板及紅印。聞其在庫中貯之。其衙門左臨河。後倚河。有泡稻草池。每年池中瀘出石灰草渣。二百餘年。陸續堆積。竟成一臥象之形。名曰象山。有作房七十二間。各具一竈。突朝天。名曰七十二兇神。凡空闊土地。最宜種蔬。今蛙圃綿亘。桔槔相聞。若田家清野之象云。

混堂司。掌印太監一員。僉書監工數員。職司沐浴堂子。惜薪司月給柴草。內官監撥有役夫。今事皆廢弛。凡內官皆于皇城外。有堂子之佛寺沐浴。有選不中淨身男子。俗稱無名白。卽古之私自者。爲之擦澡。討賞。該寺僧擅其利。而無名白分其餘潤。故內官全不來司沐浴也。

銀作局。掌印太監一員。管理僉書數員。寫字監工數十員。專管造金銀鐸針枝筒桃杖金銀錢金銀豆葉豆者。圓珠重一錢或三五分不等。豆葉則方片。其重亦如豆不拘。以備欵賞之用。又造花銀。每錠十兩不

等。止可八成。又祖宗舊制。有粟兒銀者。重十兩五兩三兩一兩。至一錢之方塊也。其色止有六七成。有分兩印子。逆賢擅政。久廢不造。止以細絲銀分賞。遂失祖宗節省之意。可惜甚焉。

浣衣局。掌印太監一員。僉書等數十員。惟此署不在皇城內。在德勝門迤西。俗稱漿家房者是也。凡宮人年老。及有罪退廢者。發此局居住。內官監例有供給米鹽。待其自斃。以防洩漏大內之事。法至善也。天啓七年十一月。客氏笞死于此。

兵仗局。掌印太監一員。管理僉書十餘員。軍器庫提督一員。掌關防司一員。掌司寫字監工數十員。卽掌造刀鎗刺戟。鞭斧盜甲弓矢。各樣神器。又火藥局一處。屬之宮中。元宵。上鼈山頂上之燈。例點放神器三位。則監工事也。凡每年七夕。宮中乞巧小針。并御前鐵鎖。錘鉗針剪之類。及日月蝕。救護鑼鼓響器。宮中做法事。鐘鼓鐃鈸法器。皆隸之。是以亦稱爲小御用監也。逆賢時。凡解寧遠皮島等處。佛郎機等件。木局庫中物爲多。

巾帽局。掌印太監一員。管理僉書等數十員。職掌內官內使小火者。平巾官帽。每年入夏。據見在員數。具題移文工部。至冬初。卽于節慎庫領銀十餘萬。分散內官內使人等靴料。凡有羨餘。繳進御前。凡新陞乘筆。卽送朝衣冠笏帶鞋一分。凡選中駙馬冠靴。中使之家正帽。閣者之豬嘴帽。插柳跑馬勇士之圓帽。藩王之國。其旗帽靴帶若干分。皆本局造送。奏于工部。支領工價。其署後臨河。有梓潼帝君廟。傳云。神像是順流漂入。至此不動。遂祠祀之。籤最靈。



釧工局掌印太監一員。餘與巾帽局同職。掌內官人等冬衣夏衣。每年遞散一次。遇辰年戊年冬散鋪蓋銀一次。凡宮中做法事。揚幡桌圍等件。皆隸焉。凡內官曾賜蟒衣。退出官及病故者。各具本交還本局收也。

內織染局。掌印太監一員。總理僉書等數十員。掌染造御用。及宮內應用緞匹絹帛之類。有外廠在朝陽門外。澣濯袍服之所。又有藍靛廠。在都城西。亦本局之外署也。萬歷三十六年。始建西項娘娘廟于此。其地素窪下。時都中有狂人。倡爲進士之說。凡男女不論貴賤。筐擔車運。或囊盛馬馱。絡繹如織。甚而室女豔婦。藉此機會。以恣遊觀。坐二人小轎。而懷中抱土一袋。隨進香紙。以徼福焉。可笑也。此先監沒後光景也。又數年。神廟宮中。偶興掉城之戲。于御前十餘步外。畫界一方城。于城內斜正十字。分作八城。挨寫十兩至三兩止。令司禮監掌印東廠秉筆。及管事牌子。遞以銀豆葉八寶投之。落于某城。卽炤數賞之。若落迸城外。及壓線者。卽收其所擲焉。至戊午年。遂有建□□□□之變。失撫順開原等處。此戲始不作也。酒醋麪局。掌印太監一員。管理等官。與別局相若。職掌內官宮人食用酒麪諸物。浙江等處。歲供糯米小麥黃豆。及穀草稻皮白麪有差。以備御前宮眷及各衙門內官之用。與御酒房不相統轄。司苑局。掌印太監一員。管理等官。同前職。掌宮中蔬果及種藝之事。歲用黑豆穀草。山東等處。歲供之。御前所用瓜菜茶料。俱此局與林衡等署。上林苑南海子同辦之。已上總謂之廿四衙門。惟浣衣局在皇城之外也。

內府供用庫掌印太監一員。總理僉書寫字監工共百餘員。專司皇城內二十四衙門山陵等處。內官食米每員每月四斗。神廟時張明掌此印。插稻子或爛米。甚而至有三斗半者。孫成掌此印。將天廚之米亦罄盡。有油蠟等庫。廳前懸一木魚。長可三尺許。以示有餘糧之意。後庫上有瓦鴿子一。相傳已久。不知何所取意也。凡御前白蠟黃蠟等。沉香等香。皆取辦于此庫。其印非九重倚毗最有寵眷者。不得掌也。司禮掌印東廠秉筆管事牌子等。歲賜祿米。各于季冬奏過給散之。宮中各長街設有路燈。以石爲座。銅爲樓。銅絲爲門壁。每日晚內府庫監工添油點燈。以便巡看關防。逆賢擅政盡廢之。以便冥行。莫敢言者矣。司鑰庫掌印太監一員。管理僉書等官數十員。凡寶源局等處鑄出制錢。該部交進本庫。備御前討取賞賜之用。庫中積有歷代古錢。洪武以來大錢。逆賢引導先帝。濫賜左右。幾無子遺。一日御前傳錢內。偶得天啓錢大小數枚。色甚古。徧問人無知者。李永貞到直房。向疊臣說之。疊臣隨告假到外直房。于史內及袁氏叢書玉篇等書內。查出梁蕭莊魏元法僧。及南詔俱有此年號。及萬歲爺共四矣。此進擬年號之宰相。不多讀書之明驗也。惜疊臣身爲人役。不能親到御前奏對。而反爲招妬之媒。豈非命耶。凡乾清宮等門。及東華午門鎖鑰。皆本庫監工。于五更三點時。自宮中發出。分啓各門。其鑰卽繳回。其印文曰司鑰庫印。俗曰天財庫。

內承運庫掌印太監一員。近侍僉書十餘員。掌司等官數十員。職掌庫藏在宮內者。曰內東裕庫。寶藏庫。皆謂之裏庫。其會極門。寶善門。迤東。及南城磁器等庫。皆謂之外庫也。凡金銀紗羅紵絲織金閃色綿絨。

玉帶象牙瑪瑙珠寶珊瑚之類總隸之。又浙江等處。每歲夏秋麥米。共折銀一百萬有奇。卽國初所謂折糧銀。今所謂金花銀是也。候解到京。于每季仲月。由長安右門入。徑進本庫交收。此印及直殿監印鐘鼓司混堂靈臺等印。皆本衙第一員僉書挨掌。不係貴近內臣掌。至崇禎三年冬。董實事發之後。此印便改內臣掌也。凡內臣陞玉帶于本庫領取。及褫降病故。其名下仍具本交還。近年奉旨陞玉帶者。亦如外臣自備。殊公私兩便也。南京供應機房太監一員。則本庫外差。有敕諭關防。所謂漢府織造是也。靈臺掌印太監一員。近侍僉書數員。看時刻近侍三十餘員。學習數十員。凡遇收選官人。則撥三四十名。年幼者。讀步天歌。陰陽雜註。天官星歷等書。習寫算。觀星氣輪流上臺。以候變異。呈稟掌印。具呈司禮監。據實奏職。其占候書曰。觀象玩占。流星撮要等書。皆抄寫授受。不敢傳布于世外。雖有抄本。多差訛不全。未足信也。其教法極嚴。比司禮監之學規凜肅也。每年造曆。係靈臺欽天監公同經管。御酒房。提督太監一員。僉書數員。專造竹葉青等酒。並糟瓜茄。惟乾豆豉最佳。外廷不易得也。牲口房。提督太監一員。僉書數員。收養珍禽異獸。有虎城羊房。彈子房。掌房一員。僉書數員。專備彈弓所用泥彈。大小有等。以黃布袋盛之。刻漏房。官十數員。不係靈臺。專管每日時刻。晝則文華殿後。每一時至。卽令直殿監官入宮換牌。每夜攢點後。至天明。則隆宗門外。報幾刻水之第一聲。而答應長隨接報第二聲。如某時初一至初四。某時正一至正四之類。爲接班起早之候也。

更鼓房。凡有罪內臣。謫司其事。挨年久者一員。予牌帽總之。平巾烏木牌者數人。佐之。凡逆賢殺人。皆牌子候得用下手。今死矣。餘者曰二牌。曰定水牌子。其餘則淨軍。每夜五名。輪流上元武門樓打更。自起更三點起。至五更三點止。按數目用藤條擊鼓。檀木榔頭擊點。例只一更一人。上樓不許攜燈。晴夜尙可。惟風雨晦冥。苦不可言。如有差誤。卽責處之。

甜食房。掌房一員。協同內官數十員。經手造辦絲窩虎眼等糖。裁松餅。滅煤等樣。一切甜食。于內官監討。取餞金盒裝盛。進安御前。兼備進賜各官。及欽賜閣臣等項。其造法器具。皆內臣自行經手。絕不令人見之。是以絲窩虎眼糖。外廷最爲珍味。又七月十五進獻波羅蜜。亦所造也。

織作。卽洗帛廩。掌作官一員。協同內官數十員。經手織造各色兜羅絨。五疋等縵。花素勒甲板縵。及長隨火者牌總縵。惟兜羅絨織法。傳自西域。外無敢私織者。此作與甜食房皆屬御用監轄管。最寒苦可憫。裏草場。在皇城內東御馬監大廳之南。永樂初年建。收料豆。至宣德年間。將中府草場之草分受。始立場。有倉廩也。

中府草場。卽舊都府草場。在東安門外。妳子府街。永樂初創收馬草。傳云。是勝國時都督府。故云。

天師菴草場。在皇城外東北。正統年間。以張天師舊處建。故名。以上共謂之三場。皆隸御馬監。各有掌場太監一員。貼場一二十員。僉書數十員不等。

甲字庫。職掌銀硃、烏梅、靛、花黃、丹、綠、礬、紫草、黑鉛、光粉、槐花、五倍子、闊白、三稜布、苧布、綿布、紅花、水銀、礬

砂、藤黃、蜜陀僧、白芨、梔子之類，皆浙江等處歲供之，以備御用監奏取。

乙字庫，職掌奏本紙、票、榜紙、中夾等紙，各省解到胖襖，以備各項奏領。

丙字庫，每歲浙江辦納絲棉，合六絲串五絲荒絲，以備各項奏討，而山東、河南、順天等處歲供棉花絨，則內官之冬衣、軍士之布衣，皆取于此。

丁字庫，每歲浙江等處辦納生漆、桐油紙、黃熟銅、白麻、檫麻、黃蠟、牛筋、牛皮、鹿皮、鐵線、魚膠、白藤、建鐵等件，以備御用監、內官監奏准領取。

戊字庫，職掌河南等處解到盔甲、弓矢、刀廢鐵，以備奏給。

承運庫，職掌浙江、四川、湖廣等省黃白生絹，以備奏討欽賞夷人，并內官冬衣、樂舞生淨衣等項用。

廣運庫，職掌黃紅等色平羅熟絹、各色杭紗及綿布，以備奏討。

廣惠庫，職掌綵織帕、梳櫛、扞刷、錢貫、鈔錠之類，以備取用。

廣積庫，職掌淨盆、焰硝、硫黃，聽盔甲廠等處成造火藥，凡京營春秋操演，皆取給于此。

贓罰庫，職掌沒官衣物等件，或作價抵俸給官，以上總謂之曰十庫，各有掌庫一員，貼庫數員，僉書數十員不等。然庫自戊字之後，不全用十字者，己者已也，止也，是以改用別名也。逆賢自甲字庫出身，惟倚任李宗政爲掌庫，餘九庫聽宗政指揮。先帝時，凡宮中喜慶，以及萬壽聖節，御馬監三草場，并此十庫，俱隨宮內關領銀鐸針枝箇，比別衙門示優異焉。復奏討關防，令掌場庫者掌之，其篆文一行直下，不過曰某

字庫。某草場關防而已。萬歷時。在京親藩。如潞王福王。先帝時。在京親藩。如瑞王。惠王。桂王。各府承奉等官。止有食米冬衣。惟天啓年間。今上信邸承奉等官。俱隨宮內關賞。蓋先帝友于至誼。祖宗以來所希有也。

漢經廠。釋典具宗教兩門。而誦經持咒。勸化羣生。此吾世津梁。必不可缺者。我二祖列宗。咸多御製序文。隆重佛典。自宮壺藩封。以及學士大夫。近而村里。遠則邊塞。罔不藉佛力以寓勸化。布經典以堅款貢。神廟在宥。孝侍兩宮聖母。琳官梵刹。徧峙郊圻。丹籙梵文。無遠弗屆。皇城內舊設漢經廠。內臣若干員。每遇收選官人。則撥數十名。習念釋氏經懺。其持戒與否。則聽人自便。如遇萬壽聖節。正旦中元等節。于宮中啓建道場。遣內大臣瞻禮。揚旛挂榜。如外之應付僧一般。其僧伽帽袈裟縹衣。亦與僧人同。惟不落髮耳。圓滿事畢。仍各易內臣服色。神廟會選擇經典精熟。心行老成。持齋者數員。教習宮女數十人。亦能于佛前作法事。行香念經。若尼姑然。又萬歷初年。馮太監保掌司禮監印時。輔臣張江陵居正也。時款貢伊始。宣大撫巡移咨言。□求佛經。江陵以書答曰。□王求經求僧。此悔惡遷善之一機也。南北數百萬生靈之命。皆係於此。天祐中華。故使虎狼梟獍。皆知淨修善業。皈依三寶。我聖祖所謂佛氏之教。陰翊王化。不虛哉。禮曹准公咨。即可題請。不必別疏。但今在京番僧。皆淫穢之人。不通經典。遣去恐爲□人所輕耳。所求佛經。須有聖祖御製序文者。乃可與之。公可特作一書諭。□王嘉其善念。曲爲開導。示之以三塗六道之苦。誘之以天人福果之說。及念珠坐具。亦可裁與。俾益其向化之心。則亦調伏凶人之一大機括也。聖人

之道。苟可以利濟生民。隨俗用其教可也。何必先王禮樂法度。而後爲功哉。此萬歷初年事也。至于三十年後。于西直門外萬壽寺中。建大鐘樓。懸大鐘一口。鐘鑄楷字佛經。樣式淳古。其音洪大。可聞數十里。是時雨暘時若。香火豐足。此鐘日夜撞不絕聲。云十萬八千杵。至天啓年間。卽廢不撞。今不知鐘存何處也。纍臣少時。讀通鑑節要。中芟節潘氏榮總論。及宋儒崇儒重道書。極厭僧釋教。以爲惑世誣民。最宜擯絕者。後恭觀列聖御製諸經序文。及舊唐書太宗文皇帝本紀。所載貞觀三年十二月癸丑。詔建義以來。交兵之處。爲義士勇夫殞身戎陣者。各立一寺。命虞世南、李百藥、褚亮、顏師古、岑文本、許敬宗、朱子奢等爲之碑銘。以紀功業。又初學記此詔文曰。有隋失道。九服沸騰。朕親總元戎。致茲明罰。誓牧登陴。曾無寧歲。其有桀犬。嬰此湯羅。銜鬚義憤。終乎握節。各徇所奉。咸有可嘉。雖復項籍放命。封樹紀以邱墳。紀信捐生。丹素著于圖像。猶恐九泉之下。尙淪鼎鑊。八難之間。永纏冰炭。所以樹其福田。濟其營魄。可于建義以來。交兵之處。爲義士凶徒殞身戎陣者。各建寺刹。招延勝侶。望法鼓所振。變災火于青蓮。清梵所聞。易苦海于甘露。所司其量定處所。並立寺名。具爲事條。以聞。稱朕哀矜之意。按今都城宣武門外之憫忠寺。寔其一焉。寺有唐刻石碑。係蘇靈芝書。傳爲李北海筆。然有史思明字樣。則非貞觀時碑可知。纍臣自崇禎戊辰秋。絕葷酒。皈依釋氏。又誦金剛等經。又得詳味蓮池大師所纂彌陀疏抄。菩薩戒發隱等編。歡服釋教。宏博誠暗。助聖朝治化不淺。或在至戚密友。苦口勸戒。所不能感格之人。或自己于內典發露。眞可使神懷汗流。至壬申春。山東巡撫余公大成者。博山大師弟子也。因孔有德之變。逮獄。纍臣得侍座側。蒙指教。

且云。我聖朝大明會典所載。每月禁刑十日。卽十齋期也。凡未能長齋者。先習十齋。加至正五九月。循誘後人。慈悲方便門也。蓋治世法與出世法。卽儒門成己成物。用行舍藏之道。凡具慧性上根法器之人。當終有憬然悟覺。翻然懺悔者焉。總憲唐公世濟長男元竑。萬歷乙卯中浙江鄉試。持齋二十餘年。甘心恬退。推精禪學。亦博山大師弟子也。甲戌冬。唐留都召北任總憲。元竑因慮日久年衰。曾刺血寫家書。勸唐辭官。唐不聽。丙子秋。□由宣鎮東北入犯。潛從天壽山後柳溝深入。踰皇陵。陷昌平。薄都城。殘掠畿輔。竟飽颺去。其冬奉旨。朝官各舉素具邊才者。唐薦及霍維華。奉旨逮唐獄。元竑聞之。號泣奔北。無可奈何。遂復斷鹽鼓。持白齋。刺血寫金剛經二函。叩佛祈佑。丁丑夏。部擬唐戍。奉旨俞允。以唐素有清名也。唐亦不知。維華于丁丑正月內。已客死戍所也。

番經廠。習念西方梵唄經咒。宮中英華殿所供西番佛像。皆陳設近侍司其香火。其隆德殿欽安殿香火。亦各有司也。凡做好事。則懸挂旛榜。惟此廠仍立監齋神于門傍。本廠內官。皆戴番僧帽。穿紅袍黃領。護腰。一永日或三晝夜圓滿。萬歷時。每遇八月中旬神廟萬壽聖節。番經廠雖在英華殿。然地方狹隘。于隆德殿大門之內。跳步叱而誦梵唄者十餘人。而習學者數十人。各戴方頂笠。穿五色大袖袍。一人在前吹大法螺。一人在後執大鑼。餘皆左持有柄圓鼓。右執響槌。齊擊之。緩急疎密。各有節奏。按五色方位。魚貫而進。視五色傘蓋下誦經者。以進退若舞焉。跳三四箇時辰方畢。監齋神者。傀儡體製法。真盔甲器械。高與人等。如門神焉。而黑面豎髮。威靈可怖。於本殿宮門安之。做法事畢。卽收於本殿庫中。一夕有賊入庫。



神施法禁不能行。托夢於看庫內官曰：庫內有賊，我替爾拿住了。天明果然，是以人皆畏之。凡食驢肉者，絕不敢入殿，入則必有意外災咎。食牛犬肉者，亦不敢入。蓋亦頗著靈驗。人不敢犯也。英華殿前有菩提樹二株，結子可作念珠。詞臣張士範作偈，其序文略曰：大內西北之隅，建有英華殿一處，殿前菩提樹二株，聞係九蓮菩薩慈聖皇祖母所植，葉如楸子，不從花得，乃生於葉之背，拾作念珠，較南產者，惜不甚大，然色黃潤，而花瓣之線色微白，名納多寶之。神廟以聖母上賓，奉御容於樹之東北別殿，值朔望節，卽親詣行禮，每瞻仰雙樹，若有栝栳之思焉。因上尊號曰九蓮菩薩云。偶禪持此珠作施，備述其詳如此。臣張士範敬撰小偈，以代頌言云云。初萬歷元年四月，順義王俺答奏，選得金字番經，并喇嘛僧爲傳誦經典，禮部通行順天府，造金字經三部，黑字經五部，選得番僧兼日早回，毋得淹滯。神廟報可。至十一月，禮部如督臣王崇古之請，給俺答佛像番經，賞去傳經番僧二人，禪衣坐具，并靴襪，授在□番僧九人，官仍給禪衣坐具帽靴，及各給其番官四人綵緞。

道經廠演習元教諸品經懺，凡建醮做好事，亦於隆德欽安等殿，張挂幡榜，穿羽流服色，而雲璈清雅，儼若仙音。萬歷五年十月戊子，彗星見，神廟以星變，特諭禮部建醮於朝天宮三日，仍徧告各宮廟。至二十六年，鼎建乾清坤寧兩宮，勅先監矩總督工程，每月初四日，同閣臣九卿入宮閱視。至三十一年，工始告成，勅正一嗣教大真人張國祥，卽天師也，率領道侶數十員，於乾清宮大殿，啓建黃籙大醮若干日，香燭輝煌，齋供清美，儀文隆備，世所罕見。至第三日午時，有白鶴千餘，於兩宮之上，飛鳴旋繞，移時方散，無不

嘆聖誠格天。元宵鑒臨。羣內臣仰視空中之鶴者如堵。有小近侍王昇者。其口大能容拳。亦隨仰視。真人一見。卽曰。這孽畜。躲在這裏了。云昇是得道大蝦蟆化生之人也。此廠掌廠林朝者。秦昌元年八月。陞乾清宮管事。王太監安極器重之。改原姓魏。陸天壽山某陵神宮掌印太監。後被逆賢害死。神廟初欲選宮女數十人。令習元教爲女道士。而掌壇內臣李昇、白忠、林朝。執奏曰。不可。佛教慈悲。凡些微簡褻。尙或耽待。若元教諸天神將。恐女子無知。惹咎不便。是以中止。已上三經廠。每遇收選宮人。各撥數十人隸之。凡做好事一永日。或晝夜或七晝夜。各有欽賞錢錠爲襯。一總事畢。易服叩頭謝恩。凡三經廠。將做好事之前。須先頒旨意。傳各衙門答應錢糧。凡遇癸亥。神廟景命三經廠。各做好事一永日。遣管事牌子贈禮。凡司禮監掌印東廠。乘筆管事牌子。各進素盒十二副。或八副。點茶每廠掌廠太監一員。貼廠各司房數十員。於各衙門帶銜。惟番經廠韓長老。神廟極爲信禮。稱長老而不名。又王定安清修能琴。爲先監器重。云南海子卽上林苑。總督太監一員。提督太監四員。管理僉司數十員。分東西南北四圍。每面方四十里。總謂之二十四鋪。各有看守牆鋪牌子。淨軍若干人。東安門外有菜廠一處。是在京之外署也。職掌鹿獐兔菜西瓜果子。凡收選內官於禮部大堂。同欽差司禮監官選中時。由部之後門。到此廠過一宿。次日早辰。點入東安門。赴內官監。又細選無遺礙者。方給烏木牌。候收畢請旨。定日差司禮監掌印於萬壽山前撥散之。

林衡署、蕃毓署、嘉蔬署、良牧署、提督太監一員。各有掌署官一員。貼署僉書數員。職掌進宮瓜蔬、襪果、菜、

栽培樹木、鷄黃、鵝黃、鴨蛋、小豬等項。

織染所掌關防太監一員、僉書十餘員、職掌內承運庫所用色絹、其署向南、在德勝門裏、內有空地、堪爲園囿、其染成之絹、赴內承運庫交納、此所工部亦有監督、有大使、有辦顏料諸項商人、此所不隸內織染局。

盜甲廠、卽鞍轡局、在都城內之東南隅、掌廠太監一員、貼廠僉書數十員、轄匠頭九十名、小匠若干人、專管營造盜甲、銃砲、弓矢、火藥之類、萬歷年間、火藥忽燃者再、其三十二年九月丙申時、忽響一聲、烟如靈芝、燒死京營領總等官九員、軍人六十三名、重傷者二十一名、毀房屋若干間、禮科蕭近高所題、燒死不下數百人、凡於工部領銀一萬兩、則此廠六千、王恭廠四千分造之、工部主事一員監督之、近因東西南北不便、復增主事一員、各監督之、崇禎甲戌九月初七日、天明時、忽響一聲、毀房屋甚多、將火藥石礮、遠拋於泡子河城牆下、又一石礮自空中落於民家屋上、打透至炕、而炕上所臥小兒、不知何因、在地無恙、又一人繫掛於梁上、頭與腳下垂、止有皮無衣、無肉骨形、比生時頗增長許多、是日也、本廠匠頭蔡承祿、號小泉家出殯、人頗富侈、冥器皆用真綾絹爲之、延優娼扮十二寡婦、征西故事、又製火人、火馬、十四、各以火爆縛徧人馬身上、點藥線馳跑、則火起四飛、紙爆迸響、而人不傷、是日之變、人多云蔡家所致、凡附近寺殿、多未震動、而配殿概損也、有一吳羊兒者、素以食物入廠貨賣、比晨已擔入、忽覺眼黑、耳畔略聞有響聲、移時方甦、開眼視之、身已立泡子河橋上、不知得何神祐而無恙也、又有賣肥阜者、素在崇文

門裏賣。後於門外賣。此日偶入城索債。震死於姜百戶門首。肥阜箱油粉狼藉。見者無不悚懼。奉旨將掌廠值日內臣賀堯年監督主事蔡宸恩下獄薄責之。

安民廠。卽王恭廠。建署於都城之西南隅。掌廠太監一員。貼廠僉書十餘員。轄匠頭六十名。小匠若干名。營造錢糧與盔甲廠同。天啓六年五月初六日辰時。忽大震一聲。烈踰急霆。將大樹二十餘株拔出土。又有坑深數丈。烟雲直上。亦如靈芝。滾向東北。自西安門一帶。皆罪落鐵渣如麩如米者。移時方止。自宣武街迤西。刑部街迤南。將近廠房屋。猝然傾倒。土木在上。而瓦在下。殺有姓名者幾千人。而闔戶死及不知姓名者。又不知幾千人也。凡坍平房屋。爐中之火皆滅。只賣酒張四家。兩三間之木簿焚。然其餘無燬。凡死者之肢體多不全。不論男女。盡皆裸體。未死者亦多震褫其衣帽焉。真未有之變也。遂改卜於西直門街北建廠。先帝賜名曰安民。并盔甲廠。各鑄關防以給之。重軍需也。其舊址改爲戎政署。凡在西會議兵事。卽共集面計。甚便。而崇禎辛未。戎政尙書閔夢德。設處錢糧。修理捐俸完局。云近因火藥局逼窄。遂於宣武門街儘北街西。分創新火藥局一處。又安定門內東繚兒衚衕。舊設鎗局一處。係京營官軍。自兩廠領出火藥。併軍器堆積。以便教場取用。崇禎戊寅四月初五日卯時。新火藥局。忽震一聲。損壞房屋人民許多。至六月初二日午時。安民廠大震。略減於天啓六年時也。八月初七日卯時。局復大震。且延燒草若干垛。其湧起之烟。各如靈芝。如雲如浪。移時方散。聖明極矜憐之。發銀分賑。司禮曹太監化淳。親詣傷處驗看。復施棺或席殮埋。是歲頗旱。至庚辰四月初二午時。新局造火藥處。復響一聲。損人命房屋甚多。

西山陵墳各有掌府官一員。僉書十餘員。以供洒掃看守香火。凡有祭祀。卽本掌府官行禮。

京城內外寺廟。各有燒香內官十餘員。及東西捨飯寺。亦各有內官數十員。或年老有病。退居於此。止給柴米。冬衣靴料。以終殘年。此祖宗養之澤。周詳備至者也。

安樂堂在北安門裏。掌房官一員。掌司數十員。凡在裏內官及小火者。有病送此處醫治。痊可之日。重謝房主。消假供職。如不幸病故。則各有送終內官。啓銅符出北安門。內官監給棺木。惜薪司給焚化柴。抬至淨樂堂焚化。皆祖宗爲中官始終之大恩也。萬歷時。堂內有兩人養病。一人已死。身旁無所有。止有一銅盆。被未死者力疾下牀。將盆藏之。死者之家人徧尋盆不見。而藏盆者不久亦氣絕。比殮時。則盆覆於被內。蓋內臣性貪苟得。至死不二。遂傳爲笑柄云。纍臣曰。擊陋習。心甚不甘。因發三大願。一曰不串戲。實不忍將民間幼男買來。付南人教習。費財耗力。以供人耳目之樂。終至戲散流落。失所者多。二曰不蓋房。實不忍隨俗陋套。頻興土木。取片時之得意。失寒素之本色。三曰不受故官財產。是以先監坐化。常太監病故。李公永貞死後。纍臣所分遺念。堪付一笑。凡內臣稍富厚者。預先捐資擺酒。立老衣會。棺木會。壽地會。念經殯葬。以爲身後眼目之榮。

淨樂堂在西直門外。內官經營數人。凡宮女內官無親屬者。死後於此焚化。堂有東西二塔。塔有管井。皆貯骨灰之所。客氏答死於此焚尸。

內安樂堂在金甃玉竦橋西。羊房夾道。掌司其事者二三十人。凡宮人病老或有罪。先發此處。待年久再

發外之浣衣局也。成化年間，憲廟皇貴妃萬娘娘專寵，孝穆皇后紀娘娘有孕，曾托居此，生孝廟，爲中興聖帝云。

內贊禮官，巡街長隨。凡宮中祭祀禮儀，係贊禮官職掌，其官十餘員。自答應長隨，選其動作便利，聲音洪亮，儀表豐秀者爲之。得穿紅圓領，束金鑲帶。此外又有巡街長隨，亦自答應長隨內，歷俸實挨，戴平巾，穿青襖，牙牌輪流，巡歷地方。有旗尉數人跟隨。凡禁地有異言異服，及喧嚷犯禁者，得詰而責之。事大則開具連七紙手本，名曰事件，稟司禮監奏處。事小則責打逐出而已。

答應長隨，凡收入官人，先選身子偉壯有力者百餘人，分派大轎小轎，并傘扇等，演習步驟。凡遇謁廟朝講，以至聖駕出外，抬弓矢賞賜等箱，駕回各交原處，俱在元武門東西長庚門之外一帶廊下家住。尉司禮監轄，看守六科廊，報水巡街禮儀房等項，皆從此中陞補。凡夜間那方有光亮，便從宮中門縫傳出，急差長隨分尋，是何處失火，登時回話。凡召對宣官，及欽賜大臣銀兩羊酒等項，皆長隨齎送。天下文武官，各藩府進到表箋禮物，皆長隨接進，其爲首數員有官帽，曰答應牌子，卽司禮監奉御，然不敢穿襖，徹也。祖宗以來，凡雙月十六日，例有應答牌子，前往教場比試武職應襲，至逆賢時，欲令名下私人炫耀中外，遂改差文書或監官輪挨一人往，非舊制也。

官下官占，分兩班四撥。小火者，烏木牌，平巾。遇陞一級，則內使烏木牌，管宮中洒掃之事，有力者免之。當差聽事，兩班四撥。內使小火者，烏木牌，平巾。有總牌一名，二三四牌各一名，每撥餘者各數十名，專答

應司禮監官典簿人數。凡出票拿人。馬房動刑。裏外看守。鑿鎖淨軍。皆其職管。夜則輪流叫火巡風。隔門  
聽傳使令。忙苦可憐。然間多騙詐嫖賭。答應宮人。貪忍無恥。與外廷厮役相似者。大抵習俗移人。不能  
特立。或爲饑寒迫耳。悲夫。

京城內外十六門。正陽門。掌門官一員。管事官數十員。帶管外羅城。南面居中。永定門。凡冬至聖駕躬詣  
園丘郊天。并耕藉田。崇禎辛未年五月初一日。今上因旱。詣園丘步禱。咸由正陽門出也。

崇文門。掌門官一員。管事官數十員。帶管外羅城。東南左安門。正東廣渠門。東北之東使門。崇文門。俗稱  
海岱門。左安門。俗稱碾礮門。廣渠門。俗稱沙窩門也。

宣武門。掌門官一員。管事官百餘員。逆賢時。幾二百員。帶管外羅城。西南右安門。正西廣寧門。西北之西  
使門。宣武門。俗稱順成門。廣寧門。俗稱彰義門。此京城之南一面也。

東面則朝陽門。俗稱齊化門也。聖駕春分躬詣朝日壇。及藩王之國。則由朝陽門出。再北則東直門也。  
西面則阜成門。俗稱平則門也。聖駕秋分躬詣夕月壇。則由阜成門出。再北則西直門也。

北面居西者。得勝門也。聖駕謁陵。及大行帝后發引。則出此門。北面居東者。曰安定門。萬歷丙辰七月初  
六日晚。大風暴雨。將此門樓刮折。拔清河一帶大樹無算。而皇城之北中門。東上門。樓俱折。凡遇夏至聖  
駕躬詣方澤祭地。卽由安定門也。各掌門官一員。管事官十餘員不等。與前三門亦同。讖查出入。交納課  
程。以上聽正副提督掌司節制。而司禮監鈐轄之。凡在京大小喪柩。得於安定西直東直。阜成崇文門發

引餘四門不許喪柩出也。

在京府第王府每承奉正副二員典寶官數十員公主府每中使一員關者數十員。

聖駕御前凡每日親近內臣自司禮監掌印秉筆隨堂之次而名位尊顯者曰乾清宮管事其第一員或第二員則提督兩司房者也曰打卯牌子則隨朝捧劍者也其次曰御前牌子曰暖殿則朝夕在側者也次曰管櫃子曰人數司房管掌司房曰御藥房御茶房曰管庫又次曰管弓箭曰弩馬曰尙冠等四執事則并尙衣尙履管淨者也曰帶刀曰報時刻并大庖廚宮後苑班上吹響器及欽安殿隆德殿英華殿之陳設以上皆穿紅近侍也曰某宮近侍則答應皇后妃嬪皇子女等近侍各數十員不等總穿紅也。

御藥房提督太監正副二員分兩班餘曰近侍二三十員未進宮未穿紅者習醫官人三四十員職掌上用藥餌與太醫院相表裏凡選官人進內必撥年少者三五十人選醫教習讀藥性賦醫要集覽及素問脈訣等書祖宗以來無敢有閒人入藥房者防至密也逆賢用事則大不然可嘆也凡聖體違和傳放御醫至日四人或六人吉服入宮不論冬夏必於殿門之內設炭火一盆中焚蒼朮維香人人從盆上入叩頭畢第一員膝行跪診左手第二員跪診右手仍互更再診畢各將聖恙大略面奏數言出至聖濟殿計藥開方具本御藥房用金罐煎進之罐口以御藥謹封緘之。

御茶房秩視御藥房分兩班牌子四員常行近侍三四十員職司茶酒瓜果凡聖駕出朝經筵講筵御用茶及宮中三時進膳聖駕七箸中宮七箸係其職掌祖宗以來亦無一人敢擅入者逆賢時止伺候先帝



匕箸杯盤。將中宮張老娘娘合用器具。一概不管。而客氏逆賢王體乾等。御前每日賜吃之膳。顧奔趨供奉。不敢後焉。可慨也。神廟時。牌子魏學顏最有寵。自打卯牌子。王朝忠死後。無人解聖意者。惟學顏奏對便捷。嘗備顧問。日親信之。泰昌元年八月。光廟登極。憫其勤勞。陞秉筆。尋准辭閒住。學顏豐潤縣人。未甚讀書。而博聞強記。敬重士大夫。且癖好黃白之事。門多異流。雖屢爲丹客哄騙。而至老不厭也。萬曆丙辰科。第六名中式舉人。趙鳴陽遭第一名沈同和事敗吃累。雖鳴陽未得廷試。然文名籍甚。學顏深慕之。後以重聘延請至外郎。訓其姪魏廷獻。入豐潤縣庠。及學顏得以秉筆予告。而鳴陽在京師道大行。復遊山西。主鄭公崇周家。天啓甲子冬。河南獻寶璽。後魏相國廣徵等交通逆賢。大工興後。崔御史呈秀等。接續布弄。凡先帝一應長旨意。長聖諭。迴與癸亥以前文氣不同。人頗駭異。時通內導逆諸臣。大布謠言於外。曰。涂文輔是秀才出身。趙鳴陽入幕在內。南北傳播。人多信以爲實。是時。今上在朱邸。或亦聞之。至崇禎戊辰六月。內中府會審李永貞等。而永貞輒昧心妄扳鳴陽。蓋欲少除目前之死。誣陷人命。罔恤也。其年冬。臺臣陳公乾陽。偶有疏波及之。奉旨下鳴陽獄。時大司寇喬公允升。總憲會公于汴。咸心知其冤。而奈無據。乃于己巳七月內。提取若愚。并永貞姪男僕人。赴都城隍廟面質鳴陽。若愚曰。永貞若愚心本不同。各人自有本末。扳者自扳。不扳自不扳。此形可碎。此心難昧。必不忍以人之妄加己者。而今亦妄加諸人也。乃力爲鳴陽辨白。陽鳴並不曾入忠賢之幕下。中外之語。皆因鳴陽曾在秉筆魏學顏家教書。人遂誤作入忠賢之幕也。云云。其舉人曹泰然。生員魏廷獻等。可數百人。皆鳴陽門人。俱爲鳴陽申訴。時座中間

官董公羽宸等九位。盡感動首肯。鳴陽得擬杖。過堂覆允。案存刑部江西司。其長男趙玉成。至癸丑登劉同升榜進士。學顏至戊寅夏卒。年九十餘。人咸以爲得內養外丹力也。

篋頭房。近侍十餘員。專爲皇子女請髮留髮。入囊整容之事。凡誕生皇子女。彌月翦胎髮。百日命名後。按期請髮者。卽如外之。每次剃頭然。一莖不留。如佛子焉。皇子戴元青縐紗。六瓣。有頂圓帽。名曰爪拉帽。至十餘齡。留髮約年餘。又擇吉入囊。總束于後。冬用元色紵。夏用元色紗。作囊。潤三寸許。長尺餘。垂于後。至選婚有妃。始擇吉行冠禮。此皇子事也。皇女戴寸許闊小頭箍。至十餘歲留髮。至年餘。擇吉打扒角。至選婚有駙馬。始擇吉上頭。此皇女事也。凡奏文書。皆禮儀房職掌。凡收生婦醫婦。進宮出宮。或乳婦有疾。更換。皆禮儀房職掌事也。

貓兒房。近侍三四人。專飼御前有名分之貓。凡聖心所鍾愛者。亦加陞管事職銜。牡者曰某小廝。驅者曰某老爺。牝者曰某丫頭。候有名封。則曰某管事。或直曰貓管事。亦隨中官數內關賞。凡皇子女嬰孩時。多有被貓叫得驚風。薨夭者。有誰敢言。或只于所居近處。禁止幾年可也。說者曰。祖宗爲聖子神孫。長育深宮。阿保爲侶。或不知生育。繼嗣爲重。而寵注于一人。未能溥貫魚之澤。是以養貓養鴿。復以蠶斯百子千嬰。名其門者。無非藉此感動生機。廣允緒耳。其意良深遠哉。凡聖駕所喜乘之馬。亦各賜佳名。逆賢會進先帝之馬甚多。有曰飛元光等。或陞馬玉帶。賞馬抹布刀兒。如管事之秩。然總涉戲耳。不可以爲訓也。宮內教書。選二十四衙門多讀書。善楷書。有德行。無勢力者任之。三四員五六員不拘。穿襖。不妨原衙

門原職銜而隨御司房或管櫃子關賞亦泝陞玉帶騎馬仍命一乘筆提督之所教宮女讀百家姓千字文孝經女訓女誠內則詩大學中庸論語等書學規最嚴能通者者陞女秀才陞女史或陞宮正司六局掌印凡聖母及后妃禮儀等事則女秀才爲禮引禮贊禮官也凡宮人有罪者發落責處鑿鎖或罰提鈴等名色以苦之提鈴者每日申時正一刻并天晚宮門下鎖時及每夜起更至二更三更四更之交五更則自乾清宮門裏提至日精門回至月華殿門仍至乾清宮門裏其聲方止提者徐行正步大風大雨不敢避而令聲若四字一句天下太平云云神廟御居啓祥宮時則自咸和右門提至嘉德門仍回原處止焉。

寶和等店。經營各處商客販來襍貨。一年所徵之銀約數萬兩。除正額進御前外。餘者皆提督內臣公用。不係祖宗額設內府衙門之數也。店有六曰寶和曰和遠曰順寧曰福德曰福吉曰寶延。而提督太監之廳廡則在寶和店也。俱坐落戎政府街。凡奉旨提督者亦無勅書。傳云起自嘉靖年間。裕邸差官徵收神廟時。屬慈寧宮聖母李老娘娘宮中收用。管事張隆、齊棟等總其事。先帝登極。逆賢攘爲提督。委掌家王朝用經理之。朝用斤斤自守自愛。新其廡宇。寬其苛斂。惟恐病商。司房王惟善等至今稱之。按每年販來貂皮約一萬餘張。狐皮約六萬餘張。平機布約八十萬匹。麤布約四十萬匹。棉花約六千包。定汕河油約四萬五千簍。芝蔴約三萬石。草油約二千簍。燒酒約四萬簍。而都城內之燒香者不與也。荆油約三萬五千簍。南絲約五百駄。榆皮約二十駄。各省香館分用也。北絲約三萬觔。串布約十萬筒。江米約三萬五千

石。夏布約二十萬匹。瓜子約一萬石。醃肉約二百車。紹興茶約一萬箱。松蘿茶約二千駄。雜皮約三萬餘張。大麩約五十萬塊。中麩約三十萬塊。麪麩約六十萬塊。京城自造細麩約八十萬塊。而內臣勳戚自製之麩不與也。四直河油約五十簍。四直大麩約一十萬塊。玉約五千斤。豬約五十萬口。羊約三十萬隻。俱各有稅。而馬牛驢騾不與也。如滇粵之寶石金珠。鉛銅砂汞。犀象藥材。吳楚閩越山陝之幣帛絨貨。又不與也。天啓以前。大概如此。今又不知何項增多。何項減少。觀商民之通塞。販貨之豐耗。亦足以卜時考世云。

# 酌中志卷之十七

## 大內規制紀略

皇城外層向南者曰大明門。與正陽門永定門相對者也。稍東而北。過公生左門向東者曰長安左門。再東過玉河橋。自十王府西夾道往北向東者曰東安門。轉而過天師菴草場。再西向北曰北安門。卽俗稱厚載門。轉而過太平倉。迤南向西曰西安門。再南過靈濟宮灰廠。向西曰長安右門。紅柵之內門之北。則登聞鼓院在焉。此外圍之六門。牆外周圍紅鋪七十二處也。

紫禁城外向南第一重曰承天之門。每年霜降後。吏部等朝審刑部重囚。在門前中甬道西。東西甬道之南。五府等衙門坐東向西。吏部等衙門坐西向東。吏部主筆者第一座。刑部正堂第二座。都察院第三座。餘以次列。舊時犯人朝北跪。而刑部事宜亦明載各旗尉押本囚上前北面跪。則是有冤者。側面西向主筆者分訴。今侍從之人。大聲喝曰。朝上跪。而乃直朝西。豈以西爲上耶。主筆者思以上自居耶。無敢言非也。南二重曰端門。三重曰午門。魏闕兩分。曰左掖門。右掖門。轉而向東曰東華門。向西曰西華門。向北曰元武門。此內圍之八門也。牆外周圍紅鋪三十六處。每晚有勳臣一員。在闕左門內直宿。每更官軍提銅鈴巡之。而護城之河遠焉。

皇城内自北安門裏街東曰黃瓦東門。門東街南曰尙衣監街。北曰司設監。再東曰酒醋麵局。內織染局。

曰皮房紙房。曰針工局。巾帽局。曰火藥局。卽兵仗局之軍器庫也。再東稍南。曰內府供用庫。曰番經廠。漢經廠。曰司苑局。鐘鼓司。再南曰新房。曰都知監。司禮監。祖宗舊制。司禮監第一層門向西。與新房門一樣。門之內稍南。有松樹十餘株者。內書堂也。先師位供安向南。其楹聯曰。學未到孔聖門牆。須努力。趨行幾步。做不盡家庭事業。且開懷丟在一邊。聖人位之北一間。則教讀書詞林先生所憩之所也。內書堂稍北。曰崇聖堂。掌印公公。秉筆隨堂公。到任入門先禮之。再北向南。則二層門矣。入此門再東朝南者。本監公廳之大門也。門外有東西二井。西井之西一小門。東井之東一小門。其內皆提督監官。文書房掌司所居房屋也。古書名畫。筆墨硯綾紗紙。各有庫貯焉。新房之北。則司禮監。新房之南。則御馬監也。所謂新房。東西一街。南北一連二連三連等連連之。十字路口各有井。自逆賢專政。將司禮監外層拆毀。改爲大門向西。殊失次。第一層高如一層之義。無知妄作。此其一也。近年仍改復舊制焉。御馬監之南。向西者曰杆子房。北膳房。煖閣廠。廠之東門通河。而門最高大。啓閉不便。遂於大門上復開一小門。以便行走。河之兩岸。榆柳成行。花畦分列。如田家也。曰南膳房。再南曰明器廠。曰混堂司。內東廠。尙膳監。撥子斜對御馬監。向東曰北花房。亦辦膳之所也。曰印綬監。中書房。曰蹴圓亭。武廟恆臨幸之。曰內承運庫。此庫掌印僉書寫字諸人所住之署也。此路總名之東河邊。其餘尙有房八區。則司禮監印公秉筆等衆住。所謂河邊直房是也。過東上北門。東中門街北。則彈子房。曰學醫讀書處。曰光祿寺街。南曰篋頭房。再東則東安裏門。俗稱牆門者。過橋則東安門也。自東上南門之東。曰重華宮。前曰重華門。曰廣定門。咸熙門。肅雍門。康和

門。猶乾清宮之制。後有兩井。東西有兩長街。西長街則有曰興善門。麗景門。長春門。清華門。寧福宮。延福宮。嘉福宮。明德宮。永春宮。永寧宮。延禧宮。延春宮。凡妃嬪皇子女之喪。皆於此停靈。至發引時。出東上南門。東上北門。北中門。北安門。詣西山等處。墳林安厝。東長街則有廣順門。中和門。景華門。宣明門。洪慶門。洪慶殿。供番佛之所也。又有膳房。其門曰景和門。又東則內承運庫也。自東上南門。迤南街。東曰永泰門。門內街北。則重華宮之前門也。其東有一小臺。臺有一亭。再東南則崇質宮。俗云黑瓦殿。景泰年間。英廟自北狩回。所居永泰門。再南街東。則皇史宬。珍藏太祖以來御筆實錄。要緊典籍。石室金匱之書。此其處也。皇史宬每年六月初六日。奏知曬晾。司禮監第一員監官提督董其事。而稽核之。看守則監工也。左右小門。曰鑾歷左門。鑾歷右門。再東則追光殿。曰欽天閣。透玲碑在焉。世廟御製欽天頌勒於碑。碑石光潤。闊有鑿之二。近似臥碑。製也。再南則御前作也。皇史宬之西。過觀心殿。射箭處。稍南曰龍蒼門。其南則昭明門。其西南則嘉樂館。其北曰丹鳳門。列金獅二。內有龍德左殿。崇仁右殿。正中廣智殿。之後。則飛虹橋也。橋以白石爲之。鑿獅龍魚蝦海獸。水波洶湧。活躍如生。云是三寶太監鄭和自西域得之。非中國石工所能造也。橋前右邊缺一塊。中國補造。屢屢泐。亦古迹也。橋之南北有坊二。曰飛虹。戴鼉。姜立綱筆。橋之東西。有天光雲影二亭。又北壘石爲山。山下有洞。額曰秀巖。以磴道分而上之。其高高在上者。乾運殿也。左右各峙一亭。曰御風凌雲。隔以山石。藤蘿花卉。若牆壁焉。又外爲永明殿。最後爲圓殿。引流水繞之。曰碧環。再北曰玉芝館。卽睿宗獻皇帝廟也。後殿曰大德殿。外券門曰寶慶門。曰延祥門。佳麗門。其東牆

外則觀心殿也。自皇史宬東南有門通河。河上曰湧福宮。舊名澄輝閣。俗云騎馬樓也。迤東沿河再北。則呂梁洪。東安橋。北有亭曰涵碧。又北則回龍觀焉。其殿曰崇德是也。觀中多海棠。每至春深盛開時。聖駕多臨幸之。是河也。從北安門外文昌宮。東步糧橋。入經皮房。內織染局。巾帽局。御馬監之東。東安門橋下。至長安左門外。迤東之玉河橋出焉。北安門內街西曰安樂堂。凡內官有病者。送此調理。山陵及外廠九門官不送也。再南黃瓦西門之裏。則內官監也。過北中門迤西。則白石橋。萬法殿等處。至大高元殿。則習學道經內官之所居也。其北則裏冰窖也。北中門之南曰壽皇殿。右曰育秀亭。左曰毓秀館。後曰萬福閣。俱萬曆三十年春添蓋。曰北果園。殿之西門內有樹一株。掛一鐵雲板。年久樹長。遂銜雲板於樹幹之內。止露十之三。誠古跡也。殿之東曰永壽殿。觀花殿。植牡丹芍藥甚多。曰采芳亭。會景亭。曰玩春樓。其下曰壽安室。曰觀德殿。亦射箭處也。與御馬監西門相對者。壽皇殿之東門也。殿之南則萬歲山。俗所謂煤山者。此也。久向故老詢問。咸云土渣堆築而成。崇禎己巳冬。大京兆劉宗周疏。亦誤指爲真有煤。如果靠此一堆土。而妄指爲煤。豈不臨危誤事哉。我成祖建都之後。何等強盛。天下有道。守在四夷。豈肯區區以煤作山。爲禁中自全計。何其示聖子神孫以不廣耶。山上樹木葱鬱。神廟時鶴鹿成羣。而呦呦之鳴。與在陰之和。互相響答。聞於霄漢矣。山之上土成磴道。每重陽日。聖駕至山頂坐。眺望頗遠。前有萬歲山。門再南曰北上門。左曰北上東門。右曰北上西門。再南過北上門。則紫禁城之元武門也。北上西門之西。大高元殿也。其前門曰始青道境。左右有牌坊。二曰先天明境。太極仙林。曰孔綏皇祚。宏祐天民。又有二關。左曰



吳明閣。右曰胡靈軒。內曰福靜門。曰康生門。曰高元門。蒼精門。黃華門。殿之東北曰無上閣。其下曰龍章。鳳篆。曰始陽齋。曰象一宮。所供象一帝君。範金爲之。高尺許。乃世廟元修之御容也。稍西曰石作。曰圓明閣。又西曰乾明門。門裏迤南曰兵仗局。曰西直房。卽尙衣監之袍房也。曰舊監庫。內官監地方。曰尙膳外監。曰憩食房。曰西上北門。其東向北者。則西下馬門矣。紫禁城護城河一帶。其在東而者。原有祖宗所設內承運庫衙門起。至北花房止。有房地。而西面城河兩岸止。有矮河牆。羅列石作物料而已。逆賢擅政。乘興大工之際。輒自西下馬門迤北。乾明門迤南。於兵仗局對門一帶。造作房屋數區。以爲秉筆直房。於風水頗失宜。又河之東北角。西北角。本有澡馬河石柵。逆賢皆毀之。改成兩方角。後又悔其誤。復改如故。此無知紛更之明驗也。說者曰。改此河後。先帝聖嗣不育。靈臺掌印張得禮者。密向客氏言之。客氏向逆賢言之。乃方復舊。先帝皇子女。雖經數產。竟無一存。惜哉。自西上北門。過西上南門。向東。則御用監也。又南向西。則銀作局也。再南過橋。曰靈臺。亦有觀象臺。銅鑄渾天儀。以測星度。占雲氣焉。沿河西岸而南者。曰寶鈔司。自西中門之西。則尙寶監也。再西出西苑門。迤南向東。曰灰池。曰水碓。水磨河之西。土坡之上。曰昭和殿。擁翠宮。曰趨臺。陂澄淵亭。又北曰紫光閣。再西曰萬壽宮。壽源宮。嘉靖四十四年春。更曰百祿宮。曰五福殿。承佑殿。左祐祥殿。右祐寧殿。曰龍吉齋。鳳祥館。昭祥閣。朗瑞居。曰曜曦門。耀朗門。含祥門。成瑞門。曰永和門。永順門。永綏門。永祉門。曰納康門。長寧門。凝一殿。其東曰萬春宮。含春殿。萬和宮。萬華宮。萬寧宮。御饌庖。曰體仁門。履康門。啓泰門。納祉門。泰安門。其西曰僊禧宮。仙樂宮。仙安宮。仙明宮。其朝東。

南起有門廿一。曰長寧、長和、長善、長耀、令寧、攸順、攸利、金靜、金瑞、宣惠、靜安、康寧、金寧、常靜、壽安、廣成、東和。其南曰陽德、永光、嘉安。其東曰柏木殿。曰旋坡臺。卽兔兒山顯陽殿也。曰迎仙亭。牌坊二。南曰福巒。北曰祿渚。臺上有七層牌額。曰玉光、光華、華耀、耀真、真境、境仙、仙臺。曰朝元館。曰景德殿。大光明殿。曰登豐門。廣福門。曰太始殿。太初殿。曰宣恩亭。嚮社亭。一陽亭。萬仙亭。後曰永吉門。左安門。右安門。曰太極殿。統宗殿。總道殿。曰天元閣。下曰闡元保祚。朝東外二門。曰天平、豐和。曰無逸殿。豳風亭。落成殿。金海石橋之北。河之西岸向南。曰玉熙殿。承華殿。曰寶月亭。芙蓉亭。曰清馥殿。丹馨殿。曰錦芳亭。翠芬亭。曰長春門。昭馨門。瑞芬門。馥景門。仙芳門。馥東門。馥西門。曰澄碧亭。騰波亭。飛藹亭。曰騰禧殿。卽黑老婆殿也。曰王媽媽井。河之上游倒影入水。如龍宮。曰乾德閣。俗所云北臺是也。高八丈一尺。廣十七丈。磴道三分三合而上之。萬曆二十九年夏。建乾清宮。牌子王朝忠。內官監總理陳永壽董其役。至天啓元年十一月十四日。奉旨拆毀平之。蓋猶春秋泉臺之毀矣。至四年夏。就其處作嘉樂殿。其門曰延景門。牌坊南曰福渚。北曰壽岳。河干有亭五。中曰龍澤。左曰澄祥。右曰湧瑞。又左曰滋香。右曰浮翠。總謂之五龍亭也。又洞三。上曰龍壽。中曰玉華。下曰遊仙。已上俱萬曆三十年秋。添其三洞。至天啓元年冬拆。再西則內教場也。曰振武殿。曰恆裕倉。省斂亭。稍南臨河有坊。曰衆祥橋。其東則北閘口。曰洪應殿。曰壇城。曰轟雷軒。嘯風室。嘯雪室。雲雨室。耀電室。曰清一齋。寶淵門。曰靈安堂。精馨堂。馭仙堂。輔國堂。演妙堂。入聖居也。自北閘口迤南東岸。曰船屋。乃冬日藏龍舟之所。有宏濟神祠。橋之南。亦有船屋焉。直南曰元熙殿。有馬頭。左擁翠亭。右

飛香亭後更名曰元潤亭再南曰陟山門通裏冰窖者也又西馬頭有龍淵亭念善館又有亭曰龍湫有殿曰壽源殿卽太素殿曰正心齋博敬齋曰素左門素右門隆治門曰騰波亭滋祥亭又再南巍然若山者曰廣寒殿卽俗所云蕭后梳妝樓也萬歷七年傾頽其脊中錢元至元錢也神廟曾分賜輔臣張居正數枚曰太液橋其坊曰堆雲積翠今止存山石基逆賢又拆毀焉再南曰圓殿卽承光殿也磚砌如城牆亦有雉堞以磴道分上之上有樓閣古松松乃數百年物霜翰虬枝紛披偃蓋凡枝之垂者皆以杉木撐之至崇禎五年因枯木難存始連根剷除此乾明門之西也其石梁如虹直跨金海通東西往來者曰玉河橋有坊二曰金籠玉鍊萬曆年間凡遇七月十五日道經廠漢經廠做法事放河燈於此橋之中空約丈餘以木坊代石亦用木闌杆橋之東岸再南曰五雷殿卽椒園也凡修實錄成於此焚草左迎祥館右集瑞館曰太元亭聞法所曰臨漪亭水雲榭再南則至西苑門矣由玉河橋玉熙宮迤西曰樞星門迤北曰羊房牲口房虎城在焉內安樂堂在焉樞星門迤西曰西酒房西花房曰大藏經廠卽司禮監經廠也又西曰洗帛處園菓廠曰西安裏門甲字等十庫曰司鑰庫鴿子房街南曰惜薪司正西則西安門也樞星門迤西街南賊罰別庫之門也門之東迤南曰蠶池曰陽德門又西曰迎和門則萬壽宮之門也曰大光明殿自陽德門外皆可以至河是河也由北安門外藥王廟西橋下入蔡廻泚漾蓄洩惟謹蓮藕魚蝦味最鮮美且萑葦茂密水禽上下儼若江南風景云至冬冰凍可拖牀以木板上加交牀或蘘薦一人前引繩可拉二三人行冰如飛積雲殘雪點綴如畫世廟晚年尙元修多居西內嘉靖壬寅正月十六日皇

太子自宮中往見絕河冰而過。時閣臣夏言詞云：胡牀穩坐度層冰。正咏此也。神廟臨御久稀，禁網疎闊。每於河冰凍後，近京貧民於皇城內外，凡有冰處，拉拖牀以餬口。遇雪滿林皋，坐拖牀者，黯素雜還，交拉如織。亦有興豪乘醉而頻往來者。至春冰將泮，間有沉溺損生，愍不畏也。其河自寶鈔司東，與護城河之西派合流。過長安右門之北，經承天門前，再東過長安左門之北，自湧福閣會歸於皇城之巽城，而總出焉。護城河者，自北開口分流，經內官監白石橋、大高元殿之東北，上西門外，半邊石半邊磚橋入。此橋半石者，防車輪耳。大高元殿前，豎石二，曰宮眷人等至此俱下馬。世廟尊崇元教，無往而不敬恪也。水由橋下至紫禁城牆下，護城河而東而南，經太廟之東，玉芝宮、飛虹橋之西，而西脈自大社、大稷壇之西，至靈臺寶鈔司之東，總合流於湧福閣之河焉。紫禁城內之河，自元武之西，從地溝入，至廊下家，由懷公橋以南，過長庚橋、裏馬房橋，由仁智殿西御酒房，東武英殿前，思善門外，歸極門北，皇極門前，會極門北，文華殿西，而北而東，自慈慶宮前，徽音門外，蜿蜒而南，過東華門，古今通集庫南，從紫禁成牆下地溝，亦自巽方出，歸護城河，或隱或見，總一脈也。神廟久不臨御河，遂壅塞不通。熈石圯泐者多，逆賢時勒令疏通。至今清流可鑿，雖魚鼈蛙黽之微，亦得沐天波之澤。但恐事久禁弛，仍復阻閉龍脈耳。是河也，非爲魚泳在藻，以資游賞，亦非故爲曲折，以耗物料，恐意外回祿之變。此水實可賴。天啓四年六科廊災，六年武英殿西油漆作災，皆得此水之力，而鼎建皇極等殿大工，凡泥灰等項，皆用此水。回想祖宗設立，良有深意。惟在後之人遵守何如耳。况坤寧宮後苑魚池之水，慈寧宮魚池之水，各立有水車房，用驢拽水，車由地琯

以運輸成賴此河。又如天啓年一號殿。賊驚宮被災者二次。如只靠井中汲水。能救幾何耶。疏通此河脈。誠急務也。大明門內承天門。其門裏之東一門內則太廟也。西一門內則大社大稷也。曰端門內則六科也。東曰闕左門。再東則松林會堆處也。西曰闕右門。其中巍然而向明者午門也。鐘鼓在焉。旗纛在焉。曰左掖門。右掖門。門內居中向南者曰皇極門。即奉天門也。俗所云鑼兒天。銅甕滴漏在此。其左曰宏政門。即東角門。考選通政司參議及鴻臚寺官皆在此也。右曰宣治門。即西角門也。居西向東曰歸極門。即右順門。居東向西曰會極門。即左順門也。皇極門內居中向南者曰皇極殿。即奉天殿也。金磚玉瓦。在殿額兩傍。左向西者曰昭文閣。即文樓。右向東者曰武成閣。即武樓也。南北連屬。穿堂上有滲金圓頂者曰中極殿。即華蓋殿也。殿兩旁東曰中左門。西曰中右門。正北曰建極殿。即謹身殿也。俱嘉靖四十年重修。所改今名也。殿後居中。高踞三纒。白玉石闌杆之上。與乾清門相對者。雲臺門也。兩旁向後者。東曰後左門。西曰後右門。即雲臺左右門。亦曰平臺。凡召對閣臣等官。或於平臺。即後左門也。又東則景運門。西則隆宗門。西向南者則仁德門也。乾清門外。左右金獅二。入門丹陛。至乾清宮大殿。其扁曰敬天法祖四字。崇禎元年八月初四日。懸安。係高太監時明筆也。殿左曰日精門。右曰月華門。左小門曰龍光。右小門曰川彩。殿東西有廊。廊後左曰昭仁殿。右曰宏德殿。東西各有角門。宮後披簷。東曰思政軒。西曰養德軒。再北則穿堂。居中圓殿曰交泰殿。其滲金圓頂。亦猶中極殿之制也。再北曰坤寧宮。皇后所居也。曰永祥門。增瑞門。萬曆二十五年二月。添額。宮之東披簷。曰清暇居。北迴廊曰游藝齋。崇禎五年十月廿三日。懸安者。

也。宮後左曰景和門，右曰龍德門。再北左曰端則門，右曰基化門，便接瓊苑東西門矣。坤寧宮有中門曰廣運門。嘉靖十四年七月初二日，改曰坤寧門。萬曆三十三年，乾清坤寧俱鼎建告成。至四十年後，始御居乾清宮西暖閣。乾清宮大殿之左，向西者曰端寧殿，尙冠等近侍所司御服袞冕圭玉冠帶錢糧貯此。右向東曰懋勤殿，先帝創造地炕於此，恆臨御之。王體乾等直房，并乾清管事王朝忠等直房，不概敘也。此薇垣深遠之地，中一路之大略也。過日精門之東曰崇仁門，稍南曰內東裕庫，曰宏孝殿，神霄殿，卽崇光殿也。日精門往北向南者，曰景明門，今日順德左門，則東一長街也。再北向南，與龍光門斜對者，曰咸和左門，向南者景仁宮，其東則東二長街也。南首曰麟趾門，北首曰千嬰門，麟趾門之東，延祺宮，怡神殿。再東曰嘉德左門，再東則蒼震門也。此門恆閉，遇掃雪修造則開。孝靖皇后王老娘娘疾革時，光廟每日來問安，入此門，至薨逝後，於慈慶宮恭設靈位，哭臨供安。大祥禫祭後，始不尙白衣冠矣。咸和左門之北，向西與景和門相對者，曰廣和左門，向南曰承乾宮，東宮娘娘所居也。東二長街之東，曰永和宮，廣和左門之北，向西與基化門相對者，曰大成左門，向南者曰鍾粹宮，今皇太子所居，改曰興龍宮者是也。東二長街之東，曰景陽宮者，孝靖皇后曾居之。千嬰門之北並列者，則乾清宮東之房五所，其東後小門，每月初四十四廿四打掃，凡有事則開也。宮正司六尙局，皆在乾清宮之東，以上則東一路之大略也。過月華門之西，曰膳廚門，卽遵義門，向南者曰養心殿也。前東配殿曰履仁齋，前西配殿曰一德軒，後殿曰涵春室，東曰隆禧館，西曰臻祥館，殿門內向北者，則司禮監掌印秉筆之直房也。其後尙有大房一連，緊靠隆

德閣後。祖制宮中膳房也。逆賢移膳房於怡神殿。而將此房改爲秉筆直房。養心殿之西南。曰祥寧宮。宮前向北者。曰無梁殿。係世廟煉丹藥之處也。其制不用一木。皆磚石砌成者。月華門之西南。巍然者。曰隆道閣。原名皇極閣。後更道心閣。左曰仁蕩門。右曰義平門。此二門原名歸極會極。世廟時改之。閣之下。曰仁德堂。卽舊精一堂。亦隆慶四年所更。前曰仁德門。萬曆二十四年。兩宮災後。開此門出入。至神廟晚年。移居乾清宮。始閉不恆開。先年慈聖娘娘。亦曾陞此閣。召李成暉。至仁德門。跪於地。而宣諭切責之。閣之東。曰忠義室。馮太監保。李太監受。魏太監伸。曾以室東小屋。做直房。至李永貞。則憐然。據忠義室而居之矣。室三間。黃琉璃瓦。綠琉璃龜背腰牆。其藻井椽葉。皆龍鳳文。永貞遇有內官監巾帽局。呈稟公事。南面而坐。干天之位。恬不知怪。於臣子之義安乎。欲逃誅得耶。說者曰。子爲左右。而不切諫。何也。彙臣曰。難言之矣。一博衆咻。轉喉觸諱。豈止此哉。如大工。關給銀兩。自有司存。乃必勒取領單。親加磨算。用掛印號。以恣侵刻。當時工部工科等衙門。皆以墨筆標日月。在京各官體自應爾。惟永貞獨用硃筆焉。可乎。原案在庫。後人見之。不知何如冷笑也。此永貞之所以爲永貞也。閣之西南。過義平門。則慈慶宮矣。萬曆時。慈聖李老娘娘所居。泰昌元年八月。皇貴妃鄭娘娘亦曾居之。光廟聖孝。凡朝謁尊禮。一如神廟時。見仁聖陳老娘娘。慈聖李老娘娘故事。中外毫無間言。從來疑端訛語。一時冰釋。王太監安調劑力也。先帝登極。復遷鄭老娘娘於一號殿之仁壽宮。請神廟東宮。昭妃劉老娘娘於慈寧宮居住。天啓七年八月後。熹廟皇貴妃范娘娘亦共居此宮。非制也。此王體乾之誤也。月華門往北。曰順德右門。則西一長街也。再北向東。

與鳳彩門斜對者曰咸和右門。卽廣安門。向南者曰毓德宮。卽長樂宮。萬曆四十四年冬。更曰永壽宮。逆賢曾以此爲蹴鞠處。其西則西二長街也。南首曰蠡斯門。北首曰百子門。蠡斯門西曰啓祥宮。神廟自兩宮災。初移居於毓德宮。後復移此。萬曆三十年春。聖體不豫。召輔臣沈一貫至此宮。此乃獻皇帝發祥之所。原名未央宮。世廟入繼大統。至四十年夏。更曰啓祥宮。宮門內石坊向北。扁石青地金字四。曰貞源茂始。後更曰聖本肇初。向南四字曰慶澤無終。後更曰元德永衍。凡舊隸與邸錢糧。至今曰未央宮。改進乾清宮也。再西則嘉德右門。卽景福門也。其兩旂竿插雲。向南建者隆德殿也。舊名立極寶殿。隆慶元年改今名。供安三清上帝諸尊神。萬曆四十四年冬被災。天啓七年三月修蓋。崇禎五年九月內。將諸像移送朝天等宮安藏。六年四月十五日。更名中正殿。東配殿曰春仁。西配殿曰秋義。東順山曰有容軒。西順山曰無逸齋。再西北曰英華殿。卽降禧殿。供安西番佛像。殿前有菩提樹二株。婆娑可愛。結子堪作念珠。又有古松翠柏。幽靜如山林。十三年秋。殿復供安聖像如前。蓋體祖宗以來神道設教之意也。自嘉德右門之西向南者曰二南門。門之北則八角井也。水不堪汲。天啓六年。亦曾修濬。而味不改。眞廢井矣。正北曰四德門。再西曰咸安宮。穆廟繼選皇后陳老娘娘居此。天啓年間。客氏移住者。咸和右門之北。向東。與隆福門相對者曰廣和右門。向南者曰翊坤宮。西宮李娘娘之所居也。西二長街之西曰永寧宮。先帝改曰長春宮。成妃李老娘娘曾居之。及遭革封之後。移於乾西某所居焉。廣和門向東。與端則門相對者曰大成右門。向南者曰儲秀宮。西二長街之西曰咸福宮。神廟時惠王桂王共居之。百子門之北並列者。則乾



清宮西之房五所。其西後小門。凡有事則開。如東後小門。總乾清門官經管啓閉也。以上則西一路之大略也。東西後小門之外。皆有惜薪司貯柴炭之園。備宮中進用。坤寧之後。則宮後苑也。欽安殿在焉。供安元天上帝之所也。有門曰天一之門。殿之東西。有足跡二。相傳世廟時。兩宮回祿之變。元帝曾立此。默爲救火。其靈跡顯佑云。崇禎五年秋。隆德殿、英華殿諸像俱送至朝天等宮。大隆善等寺安藏。惟此殿聖像不動也。曰承光門、集福門、延和門。苑內曰萬春亭、千秋亭。曰對育軒、清望閣。曰金香亭、玉翠亭。曰樂志齋、出池館。曰四神祠、觀花殿。萬曆十一年拆去。壘塚石山。子券門石扁。名曰堆秀。上蓋亭一座。名曰御景亭。東西兩處魚池二。其東曰遊碧亭。西曰澄瑞亭。奇花異卉。禽聲上下。春花秋月。景色可人。東南曰瓊苑東門。西南曰瓊苑西門。卽東一長街。西一長街之北首也。其南首則東西夾牆也。欽安殿後坤寧門。嘉靖十四年秋。更名曰順貞門。其宮牆外則紫禁城之元武門。報夜更鼓在焉。逆賢時。更鼓房牌子侯得用。慘毒無比。較外之許顯純爲更甚。凡需索不遂。而心欲斃之。則用連七紙寫病重手本一件。藏於身邊。叩見逆賢。探其口氣。可以斃。卽將手本呈稱病故。回至更鼓房。卽絕其命。如逆賢口氣寬。卽不呈手本。計三四年間。所害內官可百餘人。初天啓元年秋。正監名下曹化淳等數人。發更鼓房打更。得用心憐其冤。設法解救。尋改謫南京。如同再世。亦難泯其一節之善也。四年七月內。得用欲殺打更淨軍梁暹。趙進忠二命。閉之幽室。刻期必死。不意趙進忠家人。迫急無策。遂於禁地用繩自縊。衆人解救未死。致巡視長隨得知。具稟到官。逆賢始知得用從來臆懼害人。貪殘狠惡狀。奏聞先帝。卽陞梁暹爲更鼓房牌子。將得用就付暹。

登時捶死。哀慘萬狀。肢體離折。人甚快之。崇禎年間。曹太監化淳追念得用。欲圖報之。絕無親屬矣。元武門裏迤東。有廊下家可十一門。而更鼓房則儘東首。爲紫禁城之良隅也。乾清宮門圍牆之內。左右廊房之朝南半間者。曰東夾牆。西夾牆。又慈寧宮西第等處。皆宮眷內官便溺之所。宮牆之外。磚砌券門。安大石於上。鑿懸孔垂之。各有淨軍在下接盛。於每月初四十四廿四日。開元武門及各小門打掃。自嘉德右門之西。曰太安門。其外向西曰長庚門。凡放夫匠淘溝及修造。或年老有勞宮人病故。皆奏開此門。以便出入。其外自元武門迤西。可九門。自北而南。過長庚橋。至御酒房後牆曰長連。可三十一門。再前曰短連。可三門。并元武門東計之。通共五十四門。總曰廊下家。俱答應長隨所住。各有佛堂以供香火。三時鐘磬。宛如梵宮。凡遇有風之日。卽輪一人大聲巡警。曰謹慎燈燭。牢插線香。嚴慎如此。各門所栽棗樹森鬱。其實甘脆異常。衆長隨各以麪做酒。貨賣爲生。都人所謂廊下內酒是也。長庚橋南有柿一株高二丈餘。每至霜後實懸樹杪。丹色可愛。凡文書房司禮監官典簿。各占過宿直房。萬曆時李永貞鑿鎖十八年。曾於懷公門住。懷公者憲廟時賢監。國史所稱懷恩者也。此門之南井之北。神廟時災。久缺未補。逆賢專政。委永貞等修補一新。勒碑之文。崑山相國所撰。其訣賢語明載。居停主人字樣。今此碑或仆埋。不敢存矣。自隆宗門外朝東者。曰司禮監經廠直房。日用紙劄書籍皆貯於此。候御前取討。過慈寧宮外層。向東小門之南。曰北司房。卽文書房也。再南曰司禮監管掌處。卽兩班四撥寫所居也。亦有茅房木桶。爲便溺之所。再東曰外膳房。萬曆時每五更撥點後。河邊擡來先到此。後送入宮。今不然也。再南曰南司房。卽監官

典簿直房也。隆宗門外朝南者，亦監官典簿直房也。有井存焉。再南則寶寧門，門外偏西大殿曰仁智殿，俗所謂白虎殿也。凡大行帝后梓宮靈位，在此停供。其西南曰御酒房，西北曰馬房，監官典簿奉旨開刑拷打內犯之所。門外有二大橋，俗云裏馬房是也。東南曰思善門，門外橋西曰武英殿，命婦朝皇后於此。再西曰大庖廚，尙膳監乃第一員總理，及管理僉書所居也。武英殿西南曰御用裏監，乃把總等官所居。再東曰南薰殿，凡遇徵號冊封大典，閣臣率領中書篆寫金寶金冊在此。例有司禮監印公奉欽遣臨視，管待該御用監裏監把總官，置辦盛席伺候，必殺鹿一隻，蒸魚作羹，以明豐侈。此盛典也。又神廟靜攝久，凡冬年聖節，閣臣詣仁德門外行禮畢，先監矩卽奉旨於文書房置酒飯管待畢，必密具說帖回奏。如有應行事件，必借此轉達。有十得四五，誠納約自牖之義也。再東曰歸極門，所謂逍遙城者，在六科廊後。此門之西南，礎礫之下，宣德中置漢王高煦於銅缸，炙死於此。至天啓年間，鼎建大工時，官匠亦計及此。逆賢曰：這是國家甚慶吉祥好勾當，存之何爲？遂泯其迹。從歸極門裏向西南入，曰六科廊，東西兩房掌司所居。精微科及章疏在焉。過皇極門再東，曰會極門。凡京官上本接本俱於此。各項本奉旨發抄，亦必由此處。會極門裏向東南入，曰內閣。輔臣票本清禁處也。宣廟賜有文淵閣印一顆，玉筋篆文。凡進封票本揭帖，聖諭勅禱，用此印鈐封。萬曆十四年五月廿二日，不知何人開內閣鎖，將印盜去。六月朔，神廟准補鑄賜之。出會極門之東礎礫下，曰佑國殿，供安元帝聖像。籤最靈，像金鑄者，曾經盜去，鎔使。惟像首屢銷不化，盜藏之肚兜，日夜隨身。由此發露正法。至如寶善門、思善門、乾清門、仁德門、平臺之西室，及皇城各

門皆帝像也。佑國殿之東，則內承運庫銀兩表裏等錢糧貯藏之所也。兩庫之間有槐一株，自徽音門南望，枝幹扶疎，翠茂可愛，有井一，甘冽可用。再東過小石橋曰香庫，乃內府供用庫，答應錢糧之所。又稍北有庫一連，坐東向西，有石碑曰古今通集庫，係印綬監所掌。古今君臣畫像符券典簿貯此。每年六月初六日，晒晾如皇史宬例。再北曰東華門，門內有石橋，橋北有樹二株，曰馬櫻花。再北曰馬神廟，御馬監該班官及良馬十餘匹在此，有飛龍二大字，太監蕭敬筆也。會極門東向南者，文華殿也。後殿匾曰學二帝三王治天下大經大法，乃慈聖老娘娘御書。後人以爲神廟御書也。分六行，每行二字。前殿匾曰繩愆糾謬，亦慈聖因世廟時建有省愆居，是以特命小臣杜詩寫此四字爲扁，以垂戒萬世。殿內圍屏中數扇畫輿地圖，左數扇貼文官職名，右數扇貼武官職名。遇陞遷則易之。此係萬曆初年輔臣張文忠公居正所創造者。至二十四年後，神廟御居啓祥宮，復另置一小圍屏，高二尺餘，中左右亦如之。於啓祥宮前殿安設，凡文華殿前後柱上對聯，亦張文忠進獻。王庭策等所書寫，其文曰：念終始，典於學，期邁殷宗，於緝熙。殫厥心，若稽周后。又曰：披皇圖，考帝文，九寓化成於几席，游禮闕，翔藝圃，六經道顯於羹牆。又曰：四海昇平，翠幄雍容，探六籍，萬幾清暇，瑤編披覽，惜三餘。又曰：縱橫圖史，發天經地緯之藏，俯仰古今，期日就月將之益。又曰：西崑峙羣玉之峯，寶氣高騰，冊府東壁，耿雙星之耀，祥輝遙接書林。殿之側有九五齋，臨保室，精一堂，恭默室。殿之後曰玉食館，端敬殿，理辦房。過小門而北曰省愆居，其制度用木爲通透之基，高三尺餘，下不令牆壁至地，其四圍亦不與別處接連。凡遇天變災眚，聖駕居此，以示修省之意。先帝時，慶

封久矣。萬曆中年後，凡天下藩府差來進表，內官尙膳監備辦筵宴，司禮監掌印秉筆於文華殿門之西，奉旨管待，以昭九重親親之誼焉。自天啓七年，皇極殿工完以後，管待藩府官人始不在文華殿門西也。殿之東曰神祠，內有一井，每年祭司井之神於此。殿之西曰崇本門，殿之後爲刻漏房，凡八刻水則交一時。直殿監官抱時辰牌，赴乾清門裏換之，牌長尺餘，石青地金字。某時路遇者，必側立讓行，坐者起立，蓋敬天時之義。殿之東北向後者，曰聖濟殿，供三皇，歷代名醫御服藥餌之處。徽音門裏，亦曰麟趾門，內則慈慶宮，神廟時仁聖陳老娘娘居之，內有宮四，曰奉宸宮、勗勤宮、承華宮、昭儉宮。其園之門曰韶舞門，麗園門，曰攝芳殿、薦香亭、麟趾門之東，曰關雎左門，其內則掌印秉筆直房，所云梨園是也。西曰關雎右門，再西而轉角向西者，元輝殿，光廟元妃郭娘娘選中時，在南配殿住，其總理婚典者，田太監義也。後福王妃鄭娘娘選中，在正殿北一間住，其總理婚典者，先太監陳矩也。凡三五日，卽詣妃寢殿門外，問貴人起居。時萬曆三十一年也。其年冬，續憂危竝議之獄興，凡諸王館選中淑女，候欽差某封某位娘娘，親到元暉殿，選不中者送出，凡選中者，或后或妃或王妃，皆先居於此，以便次第奏舉行吉禮也。再北曰御馬監直房，每日伺候御乘，良馬十餘匹在此。神廟時有進到大黑牛二隻，無角大黑牛一隻，亦餵於此。再北曰御用等監庫，再北朝南者，曰寶善門，門之西舊有核桃棗樹數株，乃二百餘年所培植者。逆賢因天啓二年夏風變伐去，以便跑馬耳。十庫之後，亦有隙地堪跑馬者，逆賢從臾先帝，薙其蒿萊而馳騁焉。寶善門內，迤東曰慈慶宮後門，門之外，神廟末年開一井，味極甘冽，北曰奉先殿，卽內太廟也。祖宗舊制，宮外膳

房。原在寶寧門裏。每日五更攢點。後膳房牲匣約十餘楨。自河邊經東華門。會極歸極思善寶寧門。逆賢攢改於寶善門內矣。街東曰隆祀門。其內則外東裕庫也。街西再北曰蒼震門。又街東再北。並列二門向西者。曰履順。曰蹈和。則一號殿仁壽宮之外層小門也。內有噉鸞宮。嗜鳳宮。凡先朝有名封之妃嬪。無名封之宮眷。養老處也。各有應答養膳銀。吃用至病終之後。該號殿看門官稟知司禮監。監官典簿題知。奉旨著照某封某氏例發送。此巷自寶善門。亦可通元武門。俗稱狗兒灣。其居中門曰蓮花門也。景運門南朝西者。都知監之直房也。隆宗門北朝東者。司禮監人數之直房也。五更攢點後。至曉報九刻水者。刻漏房官及答應長隨也。隆宗門南朝東者。曰協恭堂。印公等過司房之處也。慈寧宮。慈慶宮。皆有花園。有井。有庫藏。而乾清宮兩旁各有井。無花園。惟鍾粹宮有松數株耳。其餘宮名殿名門名。或有記憶未真。銓次失敘。未能備載者。敬俟後之博覽君子。續補訂正是幸。

京北沙河鞏華城有門四。南曰拱京。北曰鎮遼。西曰威漢。東曰展思。內有駐鑾宮曰龍蹕門。龍蹕殿。曰廣載宮。東曰凝禧之殿。曰華鸞宮。集祥宮。西曰景惠之殿。曰翠鳳宮。會祉宮。東曰麗春門。步和門。西曰延秋門。宣澤門。北曰寧遠門。

天壽山紅門裏曰時陟門。時陟殿。曰松露殿。曰肅敬殿。曰修儀館。飾容館。曰聖蹟亭。曰感思門。感思殿。曰九龍池。粹澤亭。曰老君堂。曰長生蹟。長生亭。

湖廣承天府。舊名安陸州。乃世祖發祥之所。卽興邸也。曰重明門。麗正門。曰龍飛門。龍飛殿。啓運殿。曰卿

雲門、卿雲宮、曰鳳祥宮、宏載宮、曰春暉門、秋朗門、曰純一門、純一殿、世子府曰泰禮門、泰禮殿、曰永配殿、曰保和門、太和門、曰啓祚門、曰受命御極之殿、曰春霽殿、曰福寧門、慶源殿、曰光熙門、曰元佑宮、門曰儲社門、曰元祐門、元祐寶殿、曰真宣殿、曰衍法殿、曰隆祥殿、曰三洞閣。

說者曰：史漢以來，有因漏禁中語而得罪者，又有不答溫室省中何樹者。今子侈言鋪張，罄懷羅列，得無非古人厚重不洩之意乎？曩臣曰：固也。然聞之道路，如張金吾懋忠所刻規制一書，止憑慈寧宮管事齊棟所言，中多舛誤，何以昭聖朝之盛美乎？我國家左右史之溺職久矣，自神廟靜攝多年，起居所記，尤不能詳，而內小臣獨能竊知一二，揄揚鴻烈，以昭一代之盛舉，垂之無窮，不亦可乎？況若愚不幸，遭罹奇冤，朝不保夕，筆此梗概，不拘體制，不循次第，不過古人之西京雜記、三輔黃圖類耳。世之君子，當不諱之朝，思采風之義，史失而求諸野，閒中一寓目焉，未必不興發其致君澤民之念也。曩臣所見如此，至於園丘方澤、謁陵視學、耕藉閱戎，一切慶典、朝典、經筵等儀，自有儀注，外廷備矣，茲不概及。





# 酌中志卷之十八

## 內板經書紀略

凡司禮監經廠庫內所藏祖宗累朝傳遺祕書籍典。皆提督總其事。而掌司監工分其細也。自神廟靜攝年久。講幄塵封。右文不終。官如傳舍。遂多被匠夫廚役偷出貨賣。柘黃之帖。公然羅列於市肆中。而有寶圖書。再無人敢詰其來自何處者。或占空地爲圃。以致板無曬處。溼損模糊。甚致劈毀以禦寒。去字以改作。卽庫中見貯之書。屋漏滲損。鼠嚙蟲巢。有蛀如玲瓏板者。有塵黴如泥板者。放失虧缺。日甚一日。若以萬曆初年較。蓋已什減六七矣。旣無多學博洽之官。綜核齊理。又無簿籍數目可考。以憑銷算。蓋內官發跡。本不由此。而貧富升沉。又全不關乎貪廉勤惰。是以居官經營者。多長於避事。而鮮諳大體。故無怪乎泥沙視之也。然旣屬內廷庫藏。在外之儒臣。又不敢越俎條陳。曾不思難得易失者。世間書籍爲最甚也。昔周武滅商。洪範訪自箕子。晉韓起聘魯。見易象春秋。曰周禮盡在魯矣。今將有用圖書。盡擲無用之地。豈我祖宗求遺書於天下。垂典則於萬世之至意乎。想在天之靈。不知如何其恫然。何如嘆息也。今上天縱英明。右文圖治。倘一旦清問祖宗歷來所存書籍幾何。或親臨庫際稽覽。不審當局者。作何置對。其亦未之深思耳。祖宗設內書堂。原欲於此陶鑄眞才。冀得實用。按古文眞寶。古文精粹二書。皆出於老學究所選。疊臣欲求大方於明白。上水頭古文選爲入門。再將宏肆上水頭古文選爲極則。起自檀弓左國史。

漢諸子共什七八。唐宋什二三為一種。再將洪武以來。程墨垂世之稿。亦選出一半為入門。一半為極則。亦為一種。四者同成二帙。以範後之內臣。奏知聖主。發司禮監刊行。用示永久。不知得遂志否也。皇城中內相學問。讀四書、書經、詩經。看性理、通鑑節要、千家詩、唐賢三體詩、習書東活套、習作對聯。再加以古文真寶、古文精粹盡之矣。十分聰明有志者。看大學衍義、貞觀政要、聖學心法綱目盡之矣。說苑、新序亦間及之。五經大全、文獻通考、涉獵者亦寡也。此皆內府有板之書也。先年有讀等韻海篇部頭。以便檢查難字。凡有不知典故難字。必自己搜查。不憚疲苦。至於周禮、左傳、國語、國策、史漢。一則內府無板。一則繩於陋習。概不好焉。蓋緣心氣驕滿。勉強拱高。而無虛己受善之風也。三國志通俗演義、韻府羣玉。皆樂看愛買者也。除古本抄本雜書不能開徧外。按現今有板者。譜列於後。即內府之經書則例也。

五倫書六十二本、詩傳大全十二本、九書經大全十本、七書周易大全十二本、一春秋大全十八本、九禮記大全百九十九葉、易傳六本、五書傳六本、詩傳六本、春秋傳四本、禮記八本、一四書大全百八十九葉、四書集註二十本、性理大全百六十九葉、資治通鑑綱目四百六十一葉、續資治通鑑綱目百二十四本、一少微通鑑節要百廿八葉、通鑑節要續編百八十三葉、晏宏通鑑綱目千二十本、文獻通考百三十六萬八千、歷代名臣奏議七百二十本、九千歷代通鑑纂要三千六百三葉、大明會典千五百九十葉、事文類聚千三百六十葉、大明一統志四百本、三千明倫大典百廿七葉、大明集禮四百七十二葉、大學衍義百八十二葉、大學衍義補千四百本、三對類七十二本、八百諸司職掌

三本四百 大明官制 七十本 三百 御製大誥 五十三本 二百 大明律 百七葉 洪武正韻 百五本 韻府羣玉 千四十  
 葉 御製文集 十三本 七百 經史海篇直音 十二本 五百 廣韻 五十五本 二百 玉篇 十五本 三百 御製詩集 十四本 八  
 音釋 百七葉 詩韻釋義 五十八本 一百 四書白文 十二本 三百 詩學大成 一千本 爾雅埤雅 九十七本 三百 許氏說文  
 八本 六百 呂真人文集 四十本 二百 孔子家語 四十四本 一百 通書大全 九百 列女傳 三十五本 一百 神課金口  
 訣 四十本 二百 仁孝皇后勸善書 七十本 八百 臙山肘後神樞 七十八本 一百 選擇歷書 二十六本 二百 雍熙樂府 本一  
 千七百九 三國志通俗演義 廿四本 一千 歷代臣鑒 六十本 五百 貞觀政要 八十本 三百 居家必用 八十本 八百  
 十三本 九 聖學心法 四本 三百 釋文三註 千九百 蒙求 一百 四十四本 九 飲膳正要 七十本 七百 唐賢三體詩 七十二本 一百  
 古文精粹 五十六本 二百 李白詩 百六本 三 選詩補註 十三本 三百 唐詩鼓吹 五十六本 二百 高皇后傳 十七本 四 女訓 本一  
 九葉 內訓 十本 五 尙書孝經大學中庸 三十六本 三百 周易占法 四十本 二百 草堂詩餘 九十本 一百 恩紀含春堂  
 詩 二十五本 一百 擊壤集 四十本 三百 勸忍百箴 百本 三 古文真寶 九十一本 三百 醫要集覽 八十本 二百 草韻辨體 六  
 二百七 增定華夷譯語 七十本 八葉 評史心見 六十本 三百 通鑑博論 九十本 二百 重刻證類本草 三十本 四百十  
 十葉 養生類纂 九十七本 一百 釋氏源流應化事蹟 四十本 四百 皇明祖訓 十本 五 洪武禮制 十二本 八 稽古定制 本一  
 八 葉 鄭氏女孝經 十二本 四 祖訓條章 二本 十 曹大家女訓 六本 十 女誠直解 十八本 四 劉向說苑 二十五本 三百  
 皇明典禮 十五本 九 內則詩 十二本 六 內令 二本 十 昭鑒錄 五十二本 一百 御製洪範篇序 十六本 三 勤政要典 七十  
 葉 外戚事鑒 十八本 六 山居四要 十三本 八 慈聖皇太后女鑒 十九本 六 女訓內訓 全 臙山肘後經 十二本 一百 玉

匣記。十二本。八葉。省躬錄。十二本。七葉。祥異賦。十一本。四葉。步天歌。八本。一葉。傳心妙訣。十五本。四葉。詳明算法。百十本。一葉。草字碎金。十一本。九葉。真字碎金。十二本。九葉。千家姓。十九本。五葉。孝順事實。九本。二葉。為善陰隲。七本。三葉。小學書解。百六本。一葉。經。十二本。四葉。孝經大義。十二本。四葉。歷代紀年。十六本。三葉。四時歌曲。二本。十葉。隨機應化錄。十本。六葉。高皇帝道德經註。十一本。六葉。達達字孝經。十二本。四葉。醫按書。十二本。三葉。蒙求白文。九本。十葉。山歌。四本。華夷譯語。八十本。八葉。古字便覽。十一本。五葉。八行遺事集。十八本。二葉。警世篇。十一本。二葉。忠經直解。六本。十葉。太上感應靈篇。十二本。五葉。憲綱。十本。五葉。姓。十一本。大學。十六本。三葉。千字文。七本。十葉。孝經。六本。十葉。中庸。十六本。五葉。千家詩。十四本。四葉。四書雜字。二本。十葉。七言雜字。三本。十三字經。十二本。二葉。啟蒙集。十本。四葉。草訣百韻。四本。十葉。草訣百韻歌。十本。四葉。八行圖書。十本。四葉。孝經直解。十六本。三葉。解夢書大全。十本。七葉。四書直解。二十五本。一葉。千書經直解。百二十本。八葉。通鑑直解。千四十二本。一葉。帝鑑圖說。五十六本。三百葉。劉向新序。四十二本。一百葉。洪武正韻玉鍵。三十本。一百葉。佛經一藏。計六百七十八函。十八萬八十二葉。共用白連紙四萬五千二十三張。藍絹二百五十三匹。七尺四寸。黃絹廿六匹。二丈四尺一寸。每匹長三丈二尺。黃毛邊紙五百七十張。藍毛邊紙四千九百十二張。黃連四紙。三百四十七張。白戶油紙一萬八千九十五張。黑墨二百八十六斤八兩。白麪一千二百二十五斤。白礬四十五斤。道經一藏。計五百十二函。十二萬二千五百八十九葉。共用白連四紙三萬八百九十七張。黃連四紙一百七十六張。藍毛邊紙三千十八張。黃毛邊紙五百二張。藍絹一百八十二匹。一丈八尺六寸。黃絹二十

四一丈六尺。白戶油紙八千三百七張。黑墨一百六十斤八兩。白麪七百五十斤。明礬二十五斤。

番經一藏。計一百四十七函。十五萬七十四葉。共用腰子白鹿紙一萬三千六百四十張。

大五大部經。華嚴經。八十本。大涅槃經。四十本。報恩經。七本。金剛明經。十本。心地觀經。八本。

小五大部經。法華經。七本。楞嚴經。十本。佛母大孔雀經。三本。梁皇懺。十本。

又五般經。圓覺經。二本。彌陀經。一本。諸品經咒。

金剛經註解。一本。華嚴小鈔。七本。諸真寶懺。十二本。小道經。一本。

纒臣若愚。曾聞成祖勅儒臣纂修永樂大典一部。係湖廣王洪等編輯。時號召四方文墨之士。累十餘年。而就計二萬二千八百七十卷。一萬一千九十五本。因卷帙浩繁。未遑刻板。正寫冊原本。至孝廟宏治年。以大典金匱祕方。外人所未見者。乃親灑宸翰。識以御寶。賜太醫院使臣王聖濟。殿內臣龍。蓋欲推之以福海內也。閣臣王文恪。整恭撰頌。以揄揚盛美。相傳至嘉靖年間。於文樓安置。偶遭回祿之變。世廟亟命擲救。幸未至焚。遂勅閣臣徐文貞。階復。令儒臣照式摹抄一部。當時供騰寫官生一百八名。每人日抄三葉。自嘉靖四十一年起。至隆慶元年始克告完。及萬曆年間。兩宮三殿。復遭回祿。不知此新舊永樂大典二部。今又見貯藏於何處也。又纒臣曾見車駕幸地錄所載。正德十五年閏八月內。武廟南征。回如鎮江。幸大學士楊一清第。曾進抄本冊府元龜一部。共一千卷。計二百二本。纒臣曾向韓提督世祿言及。幸有一部。然舛錯頗多。至不能句。似非楊宅所獻之書。李永貞遂僱人借抄一部。仍將原本交還。而抄本一部。

聞丁卯冬已有人獻於王體乾矣。至崇禎己卯夏。體乾沒產。又不知落何人手也。又江陵張文忠公在閣時。曾具書與張中翰。後湖曰。先年張文簡公會得內閣所藏冊府元龜一部。其後文簡公卒於京邸。其僕卽將此書於邸前貨賣。令先翁識其爲閣本也。贖而藏之於家。嘗語區區曰。吾欲將此書仍送歸內閣。以完先代之寶。何如。僕時起賀曰。幸甚。此義舉也。無何而令先翁亦逝。竟勿克踐其言。今憶此書必無恙也。僕欲倍價奉贖。仍歸閣中。以卒令先翁之志。惟執事其幸許之。夫此一書也。文簡得之。令先翁贖之。至僕而還之。三更張氏皆楚人也。將以媿於古之左史倚相。能讀墳典。邱索不亦美乎。云云。然詳味江陵此舉。則必實踐其言者。但未知後湖果會割付此書否。又不知今尙存內閣否也。承平日久。處處光景與先年不同。則此書之存與不存。與永樂大典之存貯何庫。又有誰敢饒舌問及也哉。嗟嗟。難言矣。

# 酌中志卷之十九

## 內臣佩服紀略

祖宗設立內官。其中帽服佩。自有一定制度。其名色多非外廷所曉。而舊制醇雅。每寓等威節省之誼。自逆賢擅政。創古今未有之制服。之不衷。身之災也。以今驗昔。良然。

貼裏。其製如外廷之襪褶。司禮監掌印秉筆隨堂。乾清宮管事牌子。各執事近侍。都許穿紅帖裏。綴本等補。以便侍從御前。凡二十四衙門山陵等處官。長隨。內使。小火者。俱穿青貼裏。自逆賢擅政。改蟒貼裏。膝襪之下。又加一襪。名曰三襪。貼裏最貴。近者方蒙欽賞服之。又有雙袖襪。蟒衣。凡左右袖上。裏外有蟒二條。自正旦燈景。以至冬至陽生。萬壽聖節。各有應景蟒紵。自清明鞦韆。與九月重陽菊花。俱有應景蟒紗。逆賢又創造滿身金虎金兔之紗。又滿身金葫蘆燈籠。金壽字喜字紵。或貼裏。每褶有朝天小蟒者。然圓領亦有金壽字喜字。遇聖壽及千秋或國喜。或印公等生日。搬移則穿之。惟逆賢之服。奢僭更甚。及籍沒。皆賞給鐘鼓司。凡承應則穿之。光焰耀目。今上聖主天性素儉。每爲切齒。或笑其越分折福。終何用也。祖宗以來。青貼裏原不綴補。惟紅貼裏有補。逆賢偶欲異其親信者。遂自印公起。請小轎止。俱於青貼裏綴補。紛更多事。人咸不便。又按舊制。自十月初四日。至次年三月初三日。穿紵絲。自三月初四日。至四月初三日。穿羅。該司禮監預先題奏傳行。凡婚慶吉典。則雖遇夏秋。亦必穿紵絲供事。若羊絨衣服。則每歲小

雪之後。立春之前。隨紵絲穿之。凡大忌辰穿青素。祧廟者穿青綠花樣。遇修省則穿青素。祖宗時夏穿青素。則屯絹也。冬穿青素。則元色之紵絲也。逆賢擅政。則王體乾等夏穿真青油綠懷素紗。內以玉色素紗襯之。滿身活文如水之波。如木之理。而冬則天青竹綠油綠懷素紗。光耀射目。爭相誇尙。以豔麗爲美。然於忌辰之義何居。於臣子之心何安乎。

襖襖其制後襟不斷。而兩傍有擺。前襟兩截而下。有馬面褶。往兩旁起。惟自司禮監寫字。以至提督止。并各衙門總理管理。方敢服之。紅者綴本等補。青者否。

圓領襯襖。與外廷同。各按品級。凡司禮監掌印秉筆。及乾清宮管事之耆舊。有勞者皆得賜坐蟒補。次則斗牛補。又次俱麒麟補。凡請大轎長隨。及都知監戴平巾。有牙牌者。穿獅子鸚哥雜禽補。逆賢名下。凡掌印提督者。皆濫穿坐蟒。可嘆也。

官帽以竹絲作胎。真青縐紗蒙之。自奉御至太監皆戴之。俗所謂剛叉帽也。

平巾以竹絲作胎。真青羅蒙之。長隨內使小火者戴之。制如官帽。而無後山。然有羅一幅垂於後。長尺餘。俗所謂紗鍋片也。

牙牌內官監題本於內承應庫。領討象牙製造。每陞奉御或長隨。卽給一面。將原帶烏木牌換收。按御用監等衙門。各有號數。一邊刻忠字若干號。一邊刻某監某銜。亦間有私買者。私造者。從來不禁。其製有雲尖下方。微闊而上圓。可重六七兩不等。近將舊牙牌不用。另換給新製牙牌。一面橫用篆文。其衙門下書



銜。一面載不許借失等字。爲官物也。無私造者。

烏木牌。其製荷葉頭。圓徑二寸許。一面刻內使。或小火者字樣。一面用長方火印於中。其篆文四字曰關防。出入而火印兩旁分刻小字。或內字若干號。此係官物。無敢私造者。凡遇失落。必題知懲處。另給

牌。總其製用象牙。或牛骨作管。青綠線結寶蓋三層。圓可徑二寸。下垂紅線。長八寸許。內懸牙牌。或烏木牌。上有提繫青緋。凡穿圓領隨侍。及有公差私假出入本等。帶之左。卽懸此牌。總如平居在官。穿襪襪者。貼裏者。俱帶牌。總有緋。逆賢時。將牌。總紅線。長至尺餘。而懸。總之提繫。舊制大可二寸許。不過銅銀玉等爲之。上有鈎。逆賢時。改造大樣。提繫長六寸五寸。闊三寸。或二寸半。鑲嵌絕好。珠石睛綠之類。有一件可值千金六七百金者。各按節令巧樣。將見帶者。懸挂滿壁。不帶而聚蓄者。盈箱充櫃。亦賞及名下諸人。又令緋作織五色。五毒緋子。創造珍珠牌。總以玉作管。去牙牌而懸白玉。或碧玉玲瓏牌。五毒緋。徧綴小珍珠。其色疑近喪間服飾。又加青紅寶石。珊瑚黃綠瑠璃珠以間之。其實不雅。皆逆賢掌家王朝用。逢迎造辦。有識者竊嘆曰。帶珠者。待誅也。謂非服妖而何。又創造玉管天青線印。綬如外廷印。綬夏則內懸玉牌。冬則金牌。或金魚二尾。中外鑰焉。凡掌一印者。帶一綬。如王體乾三綬。李永貞則二綬矣。雖不掌印者。凡出禁城有事。則亦帶一綬於玉帶之左焉。冒濫可笑極矣。

帶。凡內使小火者。烏木牌。平巾者。無穿圓領束帶之理。惟請轎長隨。并都知監長隨。各獅子等補。束角帶。其陸有牙牌官帽。便謂之奉御正六品。得服麟補。束金鑲玳瑁。或犀帶。自奉御而上。左右監丞五品左右。

少監從四品。太監正四品。自太監而上。方敢穿斗牛補。再加陞則膝襪之飛魚也。斗牛也。蟒服也。再陞則受賞也。特陞方賜玉帶。冬則光素。夏則玲瓏。三月九月。則頂粧玉帶也。再陞內府騎馬。再陞每歲祿米十二石。如再陞。但凡一級止。歲加祿米十二石耳。逆賢時。有孩孺而至祿米若干者。有陞賞一次。曾頓加祿米至一千二百石不一也。

騎馬。凡內府有名騎馬者。自東西下馬門起。至北安西安門柵欄東。上北門止。又東上南門起。至南內西。上南門及寶鈔司止。凡遇萬壽聖節。正旦節。內府騎馬者各進馬一匹。若遇大婚禮。誕生慶典。亦然。凡進馬有例。司禮監管掌寫字。預先於思善等門曉示一帖曰。某日進馬。各家將馬之毛色。并己之官銜姓名。開送司禮監總辦黃本處。各酬銀二錢或三錢不等。以爲買筆之用。此舊規也。臨期請旨。如聖駕親覽所進之馬。便都於乾清宮門裏伺候覽過。交御馬監。不堪者該監不收。換補之。逆賢擅政時。因山海關等處缺馬。遂將皇城內官人稍堪辦進者。躡陞數百人騎馬。每次各進一匹。又派各監局司場庫。進十四匹至五十四匹者。每歲傳進十餘次。每次不下數百匹。驗收之日。黎明時。逆賢於北上門中一間。朝北正坐。盛服示威。內外侍衛者數百十人。列於兩旁。按職名牽馬魚貫而過。或有不係夷產。及瘤瘦老病者。必重責其人。如牌子王心悅。幾斃杖下。所以馬價踊貴焉。及解馬到於本處。聽其瓜分。又苦無應時芻豆。隨至倒死者。相望。軍士啖馬者比比也。按舊制。禁門中間係御路。無臣子敢正坐者。曾記萬曆二十九年。纍臣同選入者四十餘人。於七月內。先監矩奉神廟聖旨於北上門撥散於各衙門。先監在北上門東一空門限之北。

坐東朝西。可謂得宜。至天啓二年六月內。王體乾、史賓、張文元奉先帝聖旨。選內操官人時。便已在北上門居中朝北正坐者。體乾也。左右並列坐者。賓與文元也。孔子立不中門。况坐以臨下乎。是干天之位。儻然可笑者。又不止驕橫逆惡之魏忠賢矣。凡賞過祿米者。遇萬壽聖節及各節。隨進鹿一隻。交南海子。未賞祿米者則否。又冬至之前。印公公乘筆隨堂管事牌子。各進子母羊四角六角羊。交牲口房。凡藩府所進之羊。亦交牲口房。所進之馬。則交御馬監也。

欂栳。凡司禮監掌印秉筆之年高最有寵眷者。方能得此。其製如靠背椅。而加兩桿於旁。用皮纏如轎。前後各用一橫槓。然抬者不在轅內。只在桿外斜插槓。擡而正行之。所以曰杙者。禁地不敢乘轎之意也。板。其製如牀。面高五尺許。於偏後些安一椅圈。前後以粗絨繩拴。用槓二條斜插抬走。離地尺許。凡司禮監掌印秉筆年老者。方私置坐之。不係欽賞。亦不係正經品級。自乾清門外至西華門東華門裏止。自逆賢擅政。乃徑自由門擡出了。無畏懼。又曾於寶月亭戴巾穿褻衣坐板擡走。殊可恨也。自古以來。禁地無戴巾之理。神廟時。司禮掌印田義老病。先監矩清弱。亦曾間於宮中坐板。然出於不得已。非驕矜賣貴也。邇來年少如李永貞、石元雅、涂文輔皆坐之。可不謂濫褻之極耶。

朝服。朝冠帶履。與外廷同。冠七梁或五梁。舊制。只有司禮監掌印。於祭中霽之神之夜。服此祭之。自逆賢擅政。加至九梁。凡遇先帝聖節。年節冬至節。王體乾起至牌子止。俱朝服朝冠。於乾清宮大殿。或丹陛上服之。照外廷儀注。行慶賀山呼禮贊禮官。大聲鳴贊。如鴻臚寺焉。班首亦致詞焉。自魏良卿晉封後。逆賢

卽改戴公侯伯爵簪纓。出班行禮致詞。位在體乾上。至今上初登大寶。舊例宮中內外各執事印公行禮。磕頭慶賀。逆賢欲仍戴簪纓。照先帝時朝服行禮。憚聖主英明未果。止本等服色磕頭呼萬歲禮也。

笏以象牙爲之。與外廷同。抹布非布也。是素紵絲或綾染黃。長五寸。闊三尺。雙層方角。如大帶子之式。而無總。凡乾清宮管事牌子。暖閣。御藥房。管櫃子。御司房。管庫。管弓箭。請小轎。四執事牌子。欽安殿。隆德殿。英華殿。陳設近侍。須蒙賜過者。乃敢佩於貼裏之右。而蟠結縷上。雙垂之。露半條於外。垂與衣齊。

刀兒。小牙筋一雙。小尖刀一把。長六七寸不等。銀鑲鯊魚皮等鞘。以紅絨辦繫束於衣左牌總之上。以昭近臣殊寵。非外衙門之所敢望也。惟司禮監。是禮儀衙門。斯不屑抹布刀兒也。

鐸針。金銀珠翠珊瑚皆可爲之。年節則大吉葫蘆。萬年吉慶。元宵則燈籠。端午則天師。中秋則月兔。頒曆則寶曆萬年。其製則八寶荔枝。卍字鮎魚也。冬至則陽生綿羊。引子梅花。重陽則菊花。遇萬壽聖節則萬萬壽。洪福齊天之類。洪福者。於齊天字之傍左右。各有紅蝙蝠一枚。以取意耳。凡遇誕生婚禮。及尊上徽號。冊封大典。皆萬萬喜。此所謂鐸針者。單一枚有鐸。居官帽中央者是也。按蟒衣貼裏之內。亦有喜相逢。色名。比尋常樣式不同。前織一黃色蟒。在大襟向左。後有一藍色蟒。由左背而向前。兩蟒恰如偶遇相望。戲珠之意。此萬曆年間新式。非逆賢創造。凡婚禮時。惟宮中貴近者穿此衣也。

枝筒。其製隨景如鐸針。但減小偏向成對耳。

桃杖亦隨景如前。而珍珠珊瑚自罇端下垂。或間以寶石金方勝卍字耳。下有垂脚。世廟時亦間以三種。賜輔臣大臣。神廟初年亦間賜江陵相公云。

披肩貂鼠製一圓圈。高六七寸不等。大如帽。兩傍各製貂皮二長方。毛向裏至耳。卽用鉤帶斜挂於官帽之後。山子上。舊制自印公公等。至牌子煖殿方敢戴。其餘常行近侍。只戴煖耳。其製用元色素紵。作一圓箍二寸高。兩傍綴貂皮長方如披肩。凡司禮監寫字起。至提督止。亦只戴煖耳。不甚戴披肩也。凡二十四衙門內官內使人等。則止許戴絨紵圍脖。似風領而緊小焉。凡聖上臨朝講。亦尙披肩。至於外廷如今所戴帽套。謂之曰雲字披肩。聞今上登極後。令左右漸次改戴雲字披肩。隨待。然古制似已頓易也。

直身製與道袍相同。惟有擺在外。綴本等補。聖上有大紅直身袍。凡印公公若過司房。或乘筆。私自下直房。始穿此。凡見尊長則不穿。其色止有天青黑綠元青。不敢做大紅者。或亦開擺如襯衣。而束本等帶者。道袍如外廷道袍之製。惟加子領耳。間有綴補。然逆賢時其袖有大至二尺七八寸者。可笑莫此爲甚。氅衣有如道袍袖者。近年陋製也。舊製原不縫袖。故名曰氅也。綵素不拘。

大褶前後或三十六。三十八不等。間有綴本等補。順褶如貼裏之製。而褶之上不穿細紋。俗爲馬牙褶。如外廷之襪褶也。間有綴本等補。世人所穿襪子如女褰之製者。神廟亦間尙之。曰襯褶袍。想卽古人下裳之義也。罩甲穿窄袖戎衣之上。加此束小帶。皆戎服也。有織就金甲者。有純繡纒繡透風紗不等。

束髮冠。其制如戲子所戴者。用金纒絲造。上嵌睛綠珠石。每一座值數百金。或千餘金。二千金者。四爪蟒龍在上。繙繞。下加額子一件。亦如戲子所戴。左右插長雉羽焉。凡遇出外遊幸。先帝聖駕尙此冠。則自王體乾起至煖殿牌子止。皆戴之。各穿窄袖束玉帶。佩茄袋刀。如唱咬臍郎打圍故事。惟涂文輔高永壽年少相稱。其年老如裴昇史賓等戴之。便不雅觀。

唐朝帽。此古制。如畫上綿羊太子所戴者。貂鼠皮爲之。凡冬月隨駕出獵。帶之。耳不寒。

烟蓆帽。亦古制也。冬則天鵝絨。或紵縐紗。夏則馬尾所結成者。上綴金蟒珠石。其式如大帽。眞簷而頂稍細。

二色衣。近御之人所穿之衣。自外第一層謂之蓋面。如襖。襖貼裏圓領之類。第二層謂之襯道袍。第三層曰襖領道袍。其白領以漿布爲之。如玉環在項。而缺其前。稍油垢卽換之。非入過皇城者不敢綴也。自此三層之內。或褂或襖。俱不許露白色袖口。凡脖領亦不許外露。亦不得綴鈕扣。只宮人脖領則綴鈕扣。是以切避忌之。凡外廷講幄。召對之臣。不可不曉二色衣之妙處者。如夏則以葛布爲上身。以深藍或玉色紗作下褶。并接兩袖各數寸。又緣子領寸許。一則露白色。一則省費惜福。以便拆澣。此從古制也。自逆賢專政。凡近御之人。概得穿白色生紗生羅葛布。及白綾絲綉領袖襟縫。公然顯露。不忌憚也。

一把蓮。宮壺中舊制。凡掌印秉筆管事牌子。在殿內直宿。其餘者候聖駕已安寢。磕頭安置過。寢殿門已闔。則始散歸各直房。或酒或茶。自己用過。便各安歇。絕無敢私相會飲者。其各家經管衣帽官人。卽將官

帽一頂貼裏道袍大襖。或掛其上。一條領者。一付總綴兩條帶子。將提繫縑牌總。亦挂得停當。名曰一把蓮。并硬抹口。絨襪靴護膝一雙。俱緊安於所歇牀傍伺候。暗燈及燭於桌上。立銅鐘頭撥竹五尺一根於桌傍。司房官人伺候筆袋一分。空紙數幅。本色紙花一袋。紙花者。卽白紙裁成。方葉如碗大。備寫字唾痰擦手之用。凡猝然夜間御前有事。忽有傳召。或值火災意外之警。便立可衣冠。手持五尺。速赴聖駕防衛。此從來貴近大臣之體。亦內臣小心敬慎分內事也。至逆賢時。此制盡廢。甚有沉醉解衣赤身而睡者。曾遇半夜有事。如先時逆賢王國臣之關於殿內。并一號殿兩次火災。寧遠兩次口警。及天啓六年六月初五日夜半地震。凡赴御前之人。多零星遲緩不濟事矣。又先是各直房飲食。都從河邊等處做成。擡入宮。以炭火熟食之。不敢煤竈也。至逆賢時。直房各具寬大茶廚房。雙煤竈。訪善烹調。內官答應。似麪店酒鋪。煤火烈焰。爆炒煎燥。互相請召。而上下因循。日甚一日。全不以火燭爲戒。非逆賢創始。衆亦不敢屑越至此也。

長者巾。製如東坡巾。而後垂兩方葉。如程子巾式。神廟恆尙之。曰長者冠。前縫綴一大西洋珠。兩傍金五爪龍戲之。而後垂兩葉之中。亦各蟠蒼龍。凡內臣高年之人。亦有戴者。或金線黑線綠線鑲。然不敢綴雲龍也。忠靖冠。六合巾。九華巾。晉巾等製。皆如外廷。先帝恆尙九華巾圓帽。皇城內內臣除官帽平巾之外。卽戴圓帽。冬則以羅或紵爲之。夏則馬尾牛尾人髮爲之。有極細者。一頂可值五六兩。或七八兩十餘兩。名曰爪拉或爪喇。絕不稱帽子。想有所避忌云。

櫻鞞巾帽局製造。每年大雪第一次。卽送司禮監掌印。掌東廠乘筆每二隻。管事牌子每一隻。冰雪穿之。以便趨走不滑跌也。

撒扇。其制用木柄。長尺餘。合竹作小骨二十餘根。用藍絹糊裱。兩面皆撒大塊金箔。放則遮日。收則入囊。自司禮監掌印至管事牌子。皆於宮中夏日用之。只可取陰。不能取風。其扇式如外之竹涼扇而不曲。長可二三尺。上闊下窄。損齋備忘錄載宣廟六言詩三首。其一詠撒扇者。曰湘浦烟霞交翠。剡溪花雨生香。掃却人間炎暑。招回天上清涼。以天地萬物爲一體。真聖帝之言也。

靴。皁皮爲之。似外廷之制。而底軟襪薄。其裏則布也。與聖上履全式。但前縫少菱角。各縫少金線耳。類加粉飾。敝則易之。凡常差內使小火者不敢穿。但單臉青布鞋。青布襪而已。或雨雪之日。油靴則不禁也。扁辮用不堪紫色絨。或青綠色。織如大帶子。微鬆軟耳。長可丈餘不等。闊可三四寸。凡遇雨雪。將衣搗束。離地八九寸。以防泥污。晴天不用。如冬寒之月。亦得穿皮氈衣。夏暑之夜。亦用折疊竹架。各支紗絹帳。以禦蚊蚋也。雨衣雨帽。用玉色深藍官綠杭紬。或好絹油爲之。先年亦有蠶繭紙爲之。今亡矣。斗鉢式有道袍式。加掛者。御前大臣直穿紅之日。有紅雨衣。彩畫蟒龍。方補爲貼裏式者。雨帽則如方巾。周圍加簷三寸許。亦有竹胎絹糊黑油漆。如高麗帽式者。惟御前大臣戴之。祖宗以來。凡帝后皇子女。晴天各用絹裏青紗窄簷傘。制不甚大也。以蔽下面之日色。宮中從來禁傘。自逆賢擅政。凡掌印乘筆管事牌子。如王體乾等。王朝用等。皆雨雪打傘。直至乾清宮大殿簷下。無復奴僕體矣。良可太息。又神廟時。凡宣召太監田



義等皆值指其名曰叫某人來。如值聖怒則曰採某人來。至逆賢則凡遇先帝傳召衆必接聲或數十人  
謹聲齊跪曰叫老公哩。蓋於君前臣名之義何居而乃恬不爲異可乎。



# 酌中志卷之二十

## 飲食好尚紀略

上古之時。茹毛飲血。自燧人氏作民始烹飪。不過苟塞饑餒已耳。是以鼎鑄饕餮之戒。書垂酒誥之文。然自古至今。猶有于口腹嗜好之故。起戈矛于匕箸。貽身家之大害者。不能枚舉。惟趙衰以壺饗得士。顧榮以一炙感恩。權其輕重。或亦有道存焉。其間不可不知也。嗟嗟。惟中官志安溫飽。耳自習染。效奢易。從儉難。按節令以相沿。非四方所能曉。謹將平日所稔知者。略次梗概于左。用識異聞。亦考世間俗之一端。倘披閱之。或亦興嘗禁樹之思耶。

正月初一日正旦節。自年前臘月廿四日。祭竈之後。宮眷內臣。卽穿葫蘆景補子及蟒衣。各家皆蒸點心。儲肉。將爲一二十日之費。三十日歲暮。卽互相拜祝。名曰辭舊歲也。大飲大嚼。鼓樂喧闐。爲慶賀焉。門旁植桃符板。將軍炭。貼門神。室內懸掛福神鬼判鍾馗等畫。牀上懸掛金銀八寶。西番經輪。或編結黃錢如龍。簷檯插芝蔴楷。院中焚柏枝柴。名曰爛歲。正月初一五更起。焚香放紙礮。將門擺或木槓。于院地上拋擲三度。名曰跌千金。飲椒柏酒。吃水點心。卽扁食也。或暗包銀錢一二于內。得之者。以下一年之吉。是日亦互相拜祝。名曰賀新年也。所食之物。如曰百事大吉盒兒者。柿餅。荔枝。圓眼。栗子。熟棗。共裝盛之。又驢頭肉。亦以小盒盛之。名曰嚼鬼。以俗稱驢爲鬼也。立春之前一日。順天府于東直門外迎春。凡勳戚內臣。

達官武士赴春場跑馬。以較優劣。至次日立春之時。無貴賤皆嚼蘿蔔。曰咬春。互相請宴。吃春餅和菜。以綿塞耳。取其聰也。自歲莫正旦。咸頭戴鬧蛾。乃烏金紙裁成。畫顏色裝就者。亦有用草虫蝴蝶者。或簪于首。以應節景。仍有真正小葫蘆。如碗荳大者。名曰草里金。二枚可值二三兩不等。皆貴尚焉。初七日。人日。吃春餅和菜。自初九日之後。卽有耍燈市買燈。吃元宵。其製法用糯米細麩。內用核桃仁白糖爲果餡。灑水滾成。如核桃大。卽江南所稱湯團者。十五日曰上元。亦曰元宵。內臣宮眷。皆穿燈景補子。蟒衣。燈市至十六更盛。天下繁華。咸萃于此。勳戚內眷。登樓玩看。了不畏人。斯時所尙珍味。則冬筍、銀魚、鵪鶉、麻辣、活兔。塞外之黃鼠、半翅、鷓鴣。江南之密羅柑、鳳尾橘、漳州橘、橄欖、小金橘、風菱、脆藕。西山之蘋果、軟子、石榴之屬。水下活蝦之類。不可勝計。本地則燒鷲雞鴨猪肉、冷片、羊尾、爆炒羊肚、豬灌腸、大小套腸、帶油腰子、羊雙腸、豬腎肉、黃額、管兒、脆團子、燒筍、鷲雞、煤魚、柳、蒸煎鱖魚、滷煮鷓鴣、鷲雞、醃湯、米爛湯、八寶攪湯、羊肉、豬肉包、棗泥餛、糊油蒸餅、乳餅、奶皮、素蔬。則滇南之鷲雞、五臺之天花、羊肚菜、鷲雞腿、銀盤等。蘇北之蘇、東海之石花、海白菜、龍鬚海帶、鹿角紫菜。江南蒿筍、糟筍、香蕈。遼東之松子。蘇北之黃花金針。都中之土藥、土荳。南都之苔菜。武當之鷹嘴筍、黃精、黑精。北山之榛、栗、梨、棗、核桃、黃連、茶、木蘭芽、蕨菜、蔓菁。不可勝數也。茶則六安、松蘿、天池、紹興、芥茶、徑山、虎邱茶也。凡遇雪。則暖室賞梅。吃炙羊肉、羊肉包、渾酒牛乳。先帝最喜用炙蛤蜊、炒鮮蝦、田鷲腿、及筍鷲脯。又海參、鮫魚、鯊魚筋、肥鷲豬蹄筋。共燴一處。恆喜用焉。十九日。名燕九是也。都城之西南。有白雲觀者。云是勝國時。邱真人成道處。此日僧道輻輳。凡聖瀾襍。勳戚內臣。凡好

黃白之術者。咸遊此訪丹訣焉。自十七日至十九日。御前安設各樣燈盞。盡撤之也。二十五日。曰填倉。亦醉飽酒肉之期也。

二月初二日。各宮門撤出所安彩粧。各家用黍麩棗糕。以油煎之。或曰麩和稀攤爲煎餅。名曰薰虫。是月分菊花牡丹。凡花木之窖藏者。開隙放風。清明之前。收藏貂鼠帽套。風領狐狸等皮衣。食河豚。飲蘆芽湯。以解其熱。各家煮過夏之酒。此時吃鮓。名曰桃花鮓也。

三月初四日。宮眷內臣。換穿羅衣。清明則鞦韆節也。帶楊枝于髻。坤寧宮後。及各宮皆安鞦韆一架。凡各宮之溝渠。俱于此疏濬之。竹篾排棚。大木桶。及天溝水管。俱于此時油給之。并銅缸亦刷換以新汲水。凡內臣院大者。卽製席箔爲涼棚。以繩收放取陰也。

聖駕幸回龍觀等處。賞海棠。窖中花樹。盡出園圃。臺榭藥欄等項。咸此月修飾。富貴人家。咸賞牡丹花。修涼棚。二十八日。東岳廟進香。吃燒筍鷺。吃涼餅糯米麩。蒸熟加糖碎芝蔴。卽糞巴也。吃雄鴨腰子。大者一對。可值五六分。傳云食之補虛損也。

四月初四日。宮眷內臣。換穿紗衣。欽賜京官扇柄。牡丹盛後。卽設席賞芍藥花也。初八日。進不落夾。用葦葉。方包糯米。長可三四寸。闊一寸。味與糗同也。是月也。嘗櫻桃。以爲此歲諸果新味之始。吃筍鷺。吃百煮豬肉。以爲冬不白煮。夏不燒也。又以各樣精肥肉。薑蒜剉如豆大。拌飯。以萵苣大葉裹食之。名曰包兒飯。造甜醬豆豉。初旬以至下旬。奕西山香山碧雲寺等奕。西直門外之高梁橋涿州娘娘。馬駒橋娘娘。西頂

娘娘進香。二十八日藥王廟進香。吃白酒。水水酪。取新麥穗煮熟。剝去芒殼。磨成細條食之。名曰稔轉。以嘗此歲五穀新味之始也。司禮監有一種扇。以墨竹爲骨。色淺箋紙面。兩面楷書。寫論語內六字一句成語。極易脆裂。不知費多少工價。方成一把。似此損耗無益。宜裁省可也。

五月初一日起。至十三日止。宮眷內臣。穿五毒艾虎補子蟒衣。門兩旁安菖蒲艾盆。門上懸挂。弔屏上畫天師。或仙子仙女。執劍降毒故事。如年節之門神焉。懸一月方撤也。初五日午時。飲硃砂雄黃菖蒲酒。吃櫻子。吃加蒜過水麪。賞石榴花。佩艾葉。合諸藥書治病符。聖駕幸西苑。闢龍舟划船。或幸萬歲山前插柳。看御馬監勇士跑馬走解。夏至伏日戴草蓆子葉。吃長命菜。卽馬齒莧也。

六月初六日。皇史宬古今通集庫曬晾。吃過水麪。嚼銀苗菜。卽藕之新嫩秧也。初伏日造麪。惟以白麪用菘豆黃加料。和成曬之。立秋之日戴楸葉。吃蓮蓬藕。曬伏蕙。賞茉莉梔子蘭芙蓉等花。先帝愛鮮蓮子湯。又好用鮮西瓜種。微加鹽焙用之。

七月初七日七夕節。宮眷穿鵲橋補子。宮中設乞巧山子。兵仗局伺候乞巧針。十五日中元。甜食房進供佛波羅蜜。西苑做法事。放河燈。京都寺院。咸做盂蘭盆。追薦道場。亦放河燈于臨河去處也。是月也。吃鱖魚爲盛會。賞桂花。闢促織。善闢者一枚。可值十餘兩不等。各有名色。以賭博求勝也。秉筆唐太監之徵。鄭太監之惠。最識促織。好蓄闢爲樂。

八月。宮中賞秋海棠玉簪花。自初一日起。卽有賣月餅者。加以西瓜藕。互相餽送。西苑躡藕。至十五日家。

家供月餅瓜菓。候月上焚香後。卽大肆飲啖。多竟夜始散席者。如有剩月餅。仍整收于乾燥風涼之處。至歲暮合家分用之。曰團圓餅也。始造新酒。蟹始肥。凡宮眷內臣吃蟹。活洗淨。蒸熟五六成。羣攢坐共食。嬉嬉笑笑。自揭臍蓋。細將指甲挑剔。蘸醋蒜以佐酒。或剔蟹胸骨八路完整如蝴蝶式者。以示巧焉。食畢飲蘇葉湯。用蘇葉等件洗手。爲盛會也。凡內臣多好花木。于院宇之中。擺設多盆。並養金魚于缸。羅列小盆細草。以示侈富。有紅白軟子大石榴。是時各剪離枝。甘甜大瑪瑙葡萄。亦于此月剪下。缸內着少許水。將葡萄枝懸封之。可留至正月尙鮮。

九月。御前進安菊花。自初一日起。吃花糕。宮眷內臣自初四自換穿羅。重陽景菊花補子。蟒衣。九日重陽節。駕幸萬歲山。或兔兒山。旋磨山登高。吃迎霜麻辣兔。飲菊花酒。是月也。糟瓜茄。糊房臄。製諸菜蔬。抖曬皮衣。製衣禦寒。

十月初一日。頒曆。初四日。宮眷內臣換穿紵絲。吃羊肉炮燭羊肚。麻辣兔虎眼等。各樣細糖。凡平時所擺玩石榴等花樹。俱連盆入窰。吃牛乳乳餅。奶皮。奶窩。酥糕。鮑螺。直至春二月方止。是月也。始調鷹。收獵。關雞。內臣貪婪成俗。是以性好賭博。既賴雞求勝。則必費重價。購好健鬪之雞。僱善養者。晝則調馴。夜則加食。名曰貼雞。須燃燈觀看。以計所啄之數。有三四百口者更妙也。是時夜已漸長。內臣始燒地炕。飽食逸居。無所事事。多寢寐不甘。又須三五成朋。飲酒擲骰。看紙牌。奕骨牌。下棋。打雙陸。至三四更始散。方睡得着。又有獨自吃酒肉不下者。亦如前約聚。輪流辦東。幫湊飲啖。所談笑概。鄙不堪。多有醉後忿爭。小則

罵打僮僕以遷怒。大則變臉揮拳。將祖宗父母互相喚罵。爲求勝之資。然易得和解。磕過幾箇頭。流下幾  
眼淚。卽軟暢如初也。凡攢坐飲食之際。其固獲揚飯流歡。共食求飽。吃食嚙骨。或膝上以哺弄兒。或棄肉  
以飼猫犬。真可笑也。如有吃素之人。修善念佛。亦必羅列菓品。飲茶久坐。或至求精爭勝。多不以簞食瓢  
飲爲美。亦可笑也。間有一二好看書習字者。樂聖賢之道。或杜門篝燈。草衣粗食。不苟且不濫。差足愉快。  
奈寥寥不多見也。大抵天啓年間。內臣性更奢侈爭勝。凡生前之桌椅牀櫳。乘轎馬鞍。以至日用盤盒器  
具。及身後之棺槨。皆不憚工費。務求美麗。甚至墳寺莊園第宅。更殫竭財力。以圖宏壯。且疊立名目科斂。  
求衙門屬僚。今日曰某老太太慶七十八。某太爺太太祭弔。明日曰某宅上梁慶賀。某壽地興工立碑。  
卽攘奪府怨。總不恤糜費工本。心所甘習。以成風。亦可鄙可笑也。內臣又好吃牛驢不典之物。曰挽口者。  
則牝具也。曰挽手者。則牡具也。又羊白腰者。則外腎卵也。至于白牡馬之卵。尤爲珍奇。曰龍卵焉。  
十一月是月也。百官傳帶煖耳。冬至節。宮眷內臣皆穿陽生補子。蟒衣。室中多畫綿羊引子畫貼。司禮監  
刷印九九消寒詩圖。每九詩四句。自一九初寒。纔是冬起。至日月星辰不住忙止。皆警詞俚語之類。非詞  
臣應制所作。又非御製。不知如何相傳耳。久遵而不改。近年多易以新式詩句之圖。二三種。傳尙未廣。此  
月糟醃豬蹄尾。鷺脆掌。羊肉包。扁食餛飩。以爲陽生之義。冬筭到則不惜重價買之。是月也。天已寒。每日  
清晨吃辣湯。吃生燻肉。渾酒以禦寒。  
十二月初一日起。便家家買豬醃肉。吃灌腸。吃油渣。瀹煮豬頭。燴羊頭。爆燻羊肚。煤鐵脚小雀。加鷄子清。



蒸牛白、酒糟蚶、糟鱉、煤銀魚等魚、醋溜鮮鯽魚、鯉魚、欽賞臘八雜果粥米是月也。進煖洞薰開牡丹等花。初八日吃臘八粥。先期數日將紅棗搗破泡湯。至初八早加粳米、白米、核桃仁、菱米煮粥供佛聖前。戶牖園樹井竈之上各分布之。舉家皆吃。或亦互相餽送。誇精美也。廿四日祭竈蒸點心。辦年競買時興綉緞製衣。以示侈美豪富。三十日歲暮守歲。乾清宮丹墀內自廿四日起。至次年正月十七日止。每日晝間放花炮。遇大風暫止半日。一日其安鼈山燈扎烟火。聖駕陞座。伺候花炮。聖駕回宮。亦放大花炮前導。皆內官監職掌。其前導擺對之滾燈。則御用監燈作所備者也。凡宮眷所飲食皆本人所關。賞賜置買。僮倩貧窮官人在內炊爨烹飪。其手段高者。每月工食可須數兩。而零星賞賜不與焉。凡煮飯之米必揀簸整潔。而香油甜醬豆豉醬油醋一應雜料俱不惜重價。自外置辦入也。凡宮眷內臣所用皆炙燻煎燥厚味。但遇有病服藥多自己任意調治不肯忌口。總之宮眷所重者善烹調之內官。而各衙門內臣所最喜者又手段高之廚役也。



# 酌中志卷之二十一

## 遼左棄地

鐵嶺李氏其先本朝鮮人萬曆年間成梁父子以斬級擴土功加封伯爵遂圖比照雲南例要將山海以東世據之永爲遼東鎮守如黔國故事凡當時仕於遼土者多遭其齟齬無不懼陰謀之叵測也至萬曆三十三年春成梁以寧遼伯總鎮遼東巡撫則趙公楫欲將鴉谷關外將其哈喇佃子等處地方居民招徠內徙以邀功賞時先將軍應祺正任遼陽副總兵曾具呈阻之曰爲遵祖制舊疆以保生民以固危邊事切照太祖高皇帝掃逐胡元開基未廣至憲宗朝韓斌爲東協始銳志展擴開陽明臺木關等嶺屯僅復以清河地方設立城堡置備禦官兵共六百餘員操練防守又建鴉鶻關限□□出入去□寨八九十里地界稍寬夷夏之防比前甚愼至萬曆十九年何權爲備禦武備漸弛邊防寢廢遂退地數十餘里山上立碑爲界嘉靖年間總太爺爲政開闢寬奠大奠長奠永奠新奠稍復舊境并論級功拜封伯爵今王兀堂張其店哈喇泊喇咧跪等處現有軍人屯種居住成家樂業原係開墾內地並非竄入夷巢今一旦遷徙別尋安插驚擾軍民號天慟地耳不忍聞目不忍見況邊方地土尺寸是寶□□貪狠漸不可長我退一步彼必進一步邊境捐耗國威陵替毋論拂人情抑且違祖制揆理度情大有未便卑職雖望輕才薄謬列貳帥職在擴土安邊不容棄地壞法萬一戎馬生郊小醜犯順卑職自甘捐軀報國寧敢望指承

風激切具呈云云。奈撫鎮貪功之謀已成。見呈大怒。遂多方布罪。其欲甘心先將軍矣。時疊臣若愚遇例。已選入內廷。獨兄茂芳以嫡長男隨任。目擊最確。先將軍由此憤鬱成疾。於本年夏告病回衛。七月三十日抵里。八月十一日病故。嗚呼痛哉。繼先將軍爲副將者。楊公如松也。其年冬。撫鎮果行文招徠。居民安土重遷。幾至激變。鎮撫必不肯中止。時已寒沍。乃復差廢弁韓宗功。率軍丁數千。粧塘馬驅逐之。焚其室廬。毀其器用。哭聲震野。有僵餒不支而死者。有渡河冰陷而死者。有不願徙而自經者。少壯強勇之人。亡入□□。什四五。僅得老弱孤貧者六萬餘人。都僉派於遼鎮二十五衛安插。奏聞神廟。督臣蹇公達并鎮撫。俱以招回功。各蒙恩賚。時四明沈相公一貫首揆也。遂將膏腴地數百里。盡爲□□所得。丙午夏。遼鎮廣寧管餉通判徐公應乾。浙江紹興人也。目擊遼鎮邊備大壞。條十五事。上於鎮撫。首列□□一款。而兩老不勝懷忌。至秋七月。奉按院蕭公淳檄。委徐公閱察河東十四衛于遼陽庫廩。見先將軍呈諫割地之案。不覺衝冠皆裂。爲賦二詩以志不平。其曉渡青石嶺一律曰。深秋于役未曾休。歷盡淒涼輾轉憂。絕貢稱王寧久服。媚□割地豈良籌。草頭垂露含民淚。山脚流泉咽戍愁。鄭俠丹青今若在。時艱早已達宸眸。其清河堡閱操一絕曰。曾聞關土得封侯。割地如何秩更優。可惜毆民分界處。膏腴多少屬東□。撫鎮聞之。遂將徐公捏陷革職爲民。□□既得膏腴之地數百里。遂陰懷叛心。隱憂日滋。自三十四五年後。兵科等衙門宋公一韓等。各疏劾棄地非是。內有云。劉副將一呈而輒死。徐通判二詩而去官。劉副將卽先將軍也。後宋公復有一疏。爲割地陷□等事。奉神廟聖旨。這所奏棄地界□。事情重大。着都察院選差巡按

御史勘明來說。欽此。奉差往勘者熊公廷弼。據石碑全遼地勘實。題覆未結。其後李公奇珍等又疏有云。□人居之則爲□地。華人居之則爲華地。今數十年生聚之民。上糧有倉。出人丁有徭役。何以謂之曰□地。何以謂之曰逃民云云。疏上不報。□既殷富。羣不逞之徒。復爲計畫。朝夕從與。四十六年春。□果陷撫順。以叛。鎮臣張公承允全師覆沒。巡撫李公維翰逮矣。四十七年春。楊公鎬爲經略。而四路之師。紐矣。天啓元年春。失遼瀋。二年春。失廣寧。全遼淪陷。十餘年來。竭天下之力。未能雪恥。河西一帶。已非我有。況河東之棄地乎。此遼左決裂根因。實以貪功貽患。真可切齒痛恨也。李氏墳墓在鐵嶺者。已盡爲□發。所封之爵。久懸難襲。韓宗功乃成梁嫡親女壻。于天啓二年冬。爲□奸細訪獲。正法。趙公楫。京師人也。久與稅監高淮契交。囊橐頗富。多置宅以居。縉紳其孫趙臺。於今上崇禎五年冬。具疏爲乃祖諉張。以求復己之恩。廕本年十月內。奉聖旨。遼鎮失事。釀變必非一朝。趙楫任撫有年。何無先見預籌。本內招回人口。是否功應廕敘。着吏兵二部查議奏奪。欽此。至六年冬。吏部竟坐名覆疏。奉命旨。趙臺准送國子監讀書。七年冬。大同總戎王公朴具疏。奉聖旨。戚司宗罪案已定。王業宏爭襲事情。已有旨了。其李成梁伊孫。該部查議具奏。欽此。司宗于九年恩審蒙釋。成梁之後。賴戚臣王梟。費盡心力。近已蒙准襲爵。梟臣竊痛。乙巳至今。時盈三紀。實歷四朝。在埜恐知此棄地根因者少。若非先將軍會由此招禍。宋掌科曾具疏入告。卽不孝如若愚。亦不能記憶之悉也。封疆大事。父子至情。義難緘默。謹書此以備采擇焉。



# 酌中志二十二

見聞瑣事雜記

洪武間臨海趙某者失其名卒業太學爲一中貴題蠶婦圖云蠶未成時葉已無髻雲撩亂粉痕枯宮中羅綺輕于布爭得王孫見此圖太祖偶幸中貴宅見之詰問誰作中貴以趙某對卽召除肇慶知府在郡大有廉聲見周海門先生汝登雜言

又閩人徐燭榕陰新簡所載城山鄭氏譜女官恩遇云江氏名全閩邑高惠里人少淑慧能記誦孝經列女傳及笄歸城山鄭瑀洪武癸亥瑀早世江守節癸酉詔選識字節婦任用內府常道以江爲薦赴內選中授女府內品欽賜名曰全委掌金銀各庫乙亥因憶男女幼穉爲奏太祖高皇帝推恩遣使來閩挈取家屬馳驛至京賜官房與居免稅課差役戊寅高廟遣內官李清送回壬午文皇帝登極復遣內官秦陪捧帛來宣助理內政陸尙寶局正賜月俸三石官房五間與男原籍居處永樂丁酉江以年老力弱請歸旨允重賜禮物遣內官尹子良復送回閩逾二年己亥以疾卒年六十有五云

世廟聖孝凡睿廟藩邸御筆不惜重賞購之恭鈐欽文之璽或新製睿宗獻皇帝御書之寶非親近大臣不賜也睿廟善書善篆文有恩紀含香堂詩行世光廟于講學之暇好揮灑大字扁額對聯以賜青宮左右雖祁寒大暑未之少懈或亦鈐東宮親筆圖書不載年月者卽光廟潛邸之御書也當軸亦宜奏請訪

購以備一代宸翰可也。

光廟喜射。又樂觀戲。于宮中教習戲曲者。近侍何明、鍾鼓司官鄭稽山等也。凡外面屬託事情。而營利肥己者。劉朝王輔等也。泰昌元年八月。撥置西李娘娘。招權納賄者。李進忠也。

先帝嬰年時。曾用右手小指。在殿門梭葉內剔土嬉戲。適光廟猝至。客氏急抱起。指甲被梭葉拗傷。痛哭不已。光廟撫之曰。不妨不妨。帶破些壽長。仍好語勉慰客氏。今後用心云。其寬仁如此。

先帝髫髻時。教習書倣者。光廟伴讀吳進忠也。宮中私自答應。誦書習字。劉良相也。良相。雒陽人。性樸直。不茹葷。人皆以劉道稱之。孝和皇后。卽才人王娘娘。臨崩時。託寫遺言。云與西李娘娘有讎者。良相執筆也。天啓元年。逆賢矯旨。發良相于鳳陽而殺之。今有誰肯代良相鳴冤枉耶。熹廟中宮張娘娘。今懿安皇后者。秉筆劉克敬。奉差選中二位中之一位。后性骨鯁。好看書習字。坤寧宮近侍陳德潤。逆賢名下也。伺后動靜。客氏逆賢憚焉。遂時于先帝前離間之。后時有賜與克敬。不過食物之類。逆賢知之。遂將克敬發鳳陽。尋矯旨害之。其後又忌克敬之照管老叔馬鑑。卽曩臣之同侍先監者。逆賢復嗾涂文輔題參。降發鳳陽。亦矯旨害之。旣殮復蘇。寺僧聞棺中急迫有聲。守尸押葬者。畏賢毒。不敢主持。遂生埋之。比至坑。棺之堵頭將開。而不敢不埋也。悲哉。今上登極。憐其冤。咸復職改殮。歸葬于北。今承天守備王太監允中。秉筆掌東廠王太監德化。隨堂王太監承恩。皆劉名下。天之報施忠裔。正未艾也。

神廟貴妃李娘娘有疾。鄭娘娘名下太監張明醫治不效。薨逝。神廟極爲悲悼。喪禮從厚。所生兩皇子。派



與中宮王老娘娘爲慈母。共育咸福宮。彼時積言有如淳于衍之事。自此鄭娘娘無有與分寵者矣。先帝御名。凡宮中所用油。皆更之曰芝蔴水。油漆作改曰漆作。神廟路藩入朝。至景運門卽下轎。步入乾清門之左。瑞惠桂藩之入朝光廟。及今上之入朝先帝。至宮門始下轎。禮駁殊矣。

神廟在宥之四十二年二月初九日。聖母慈聖皇太后崩。其傳行之旨曰。朕慈母皇太后。按慈母乃八母之一。非生母。不如直曰朕聖母爲安也。又曰。偶爾崩逝。按偶爾字樣。亦似未妥。是時司禮監掌印者李太監恩。掌東廠者盧太監受。若使先監矩尙在。定經潤正。必不草率如此。今上崇禎二年二月初四日巳時。中宮周娘娘誕生皇長子。其發外聖諭。應曰。某年月日時朕第一子生。某封某氏出。斯祖宗來體制也。時司禮監掌印高太監時明。秉筆沈太監蔭等。皆負人望。耆舊歷練人也。乃所頒聖諭。竟將某封所出一句遺落。又將生字置朕字第字之間。至閏四月十四日。百日命名。穿紅之旨。宜稱皇長子。而竟稱皇太子。夫未經册立。可作如是稱耶。又聞秦中巡撫岳和聲賀疏。亦稱皇太子。以上二宗。或抄傳差訛。尙可言也。若原發旨意如此。則高太監等不細心。不知體之咎。將誰諉乎。典禮之謂何。可笑也。曾記泰昌元年冬。高沈爲本官復職。討祭葬疏。竟將諭祭作御祭。切己之事。尙錯誤至此。況國之大典乎。無怪片紙冗辭也。天啓年間。高沈二太監閑住。時助大工。每捐進一萬兩。其助遼餉。又各進一萬兩。咸恐後也。至崇禎二年冬。薄都城。高止助五百兩。餘僅三四百兩而已。果先富後貧耶。亦別有肺腸耶。

憲廟好琴弈詩畫。司禮戴太監義。號竹樓。不知何許人。最精于琴。而楷書筆法。與沈度相埒。南中有一良家婦。善琴。遍遊兩京各省。未有居其右者。雅聞戴名。詣外邸通名求見。久之。訂期戴休沐之暇。至外邸。坐廳中。延南婦隔簾向上一揖。坐南婦簾外。不通寒溫。讓戴先操。曲甫終。南婦淚如雨下。色若死灰。將所攜善琴。卽下塔石上碎之。拂衣而去。終身再不言鼓琴事矣。戴之名下。王太監獻號梧桐者。廣西平樂人也。亦精于琴。有譜行世。司禮太監蕭敬字克恭。號東梅者。亦戴名下也。多讀書。其楷書筆法似沈度。而草書則從張顛懷素。間雜以篆籀邊旁。今之巾帽局外廠。云是蕭別業。惜基址不存。但寒泉數處。烟草冥迷已耳。

鮑太監忠者。不知何許人。多學善書。歷陞長陵神宮監僉書。每坐大石上拾樹葉而寫詩。清風徐起。飄揚山谷。以自娛樂。山中巨石如蝦蟇式者。鮑恆伏如几。今見存焉。世廟雅尙文學。久乏當意者。適有親近。以忠姓名學行奏薦。特蒙召陞秉筆掌印。壽躰八望九。尙耳目精明。以楷書寫論傳紅。世廟優賚特加。後允其予告令終云。其名下王太監本。不知何許人。爲穆廟時名臣。又田太監義。陝西人。亦鮑名下也。至萬曆二十四年。掌司禮監印。其楷書得鮑教爲多。見典禮之臣記中。此後留心學問之人。亦并及一二。識向往云。

司禮監隨堂李太監受者。京都人。西域苗裔。嘉靖四十一年選入。歷任司禮監。至萬曆二十九年夏。收選官人四十餘名。疊臣亦其一也。三十一年選福王妃時。皇貴妃鄭娘娘。引潞王例。欲選三人而擇之。先監

矩時總理婚典。受執往事。爭曰。潞王先選一位。未中。復選二位。雖三人。其實二也。如何敢比。先監甚服其亮。而密薦之。後陞隨堂。未竟厥施。而一疾令終。

秉筆史。太監賓者。嘉靖四十一年選入。多學能書。頗復歐陽率更筆法。先監最器之。歷陞文書房史。廣交遊。善琴弈。好寫扇。其詩字之扇。流布宮中。神廟思得好秉筆。覽至史姓名。皇貴妃鄭娘娘偶贊揚之。聖意疑其從宮闈中鑽營也。遂立謫南京。數年取回任事。是日值有要緊旨意發關。例該第一員親捧到關。而史名原前列也。及回奏。神廟益怒。復疑其夤緣往關中見輔臣也。復謫南京二十餘年。至泰昌元年八月。光廟登極。始取回。天啓元年。逆竇力於先帝前薦陞秉筆。後畏其廉介退出。閒住。史性儉素。曾與京宦米公萬鍾契厚。貸史銀七八百兩。米終身困頓。未償。史卽焚券。都人多稱爲義舉也。金太監忠。其照管姪也。金字敏恕。北直固安縣人也。萬曆六年選入。歷陞文書房。博學能書。善琴。守備鳳陽時。曾著御世仁風一書刻之。博極鑑史。繪畫周詳。彷彿如帝鑑圖說。其評語。凡稱迂拙子者。金之道號。其自跋親筆作也。先監在時。曾向金曰。公後來秉政時。我名下中。惟劉官人堪用。公善視之。其後彙臣被常太監雲註誤墩鎖。于萬曆癸丑冬。金曾折節賜顧。時存恤之。至天啓七年十一月。彙臣謫南。金已守備南京。崇禎元年夏。彙臣復被逮赴北。蒙金惠銀百兩爲途費。金尋蒙今上特陞秉筆。掌御用監印。予告林下。近已令終。秉筆車太監。應魁則金名下也。

紀綸者。北直人也。萬曆六年選入。陞司禮監。博學能文。善寫。歷陞文書房。未任秉筆。人多惜之。

凡內臣讀書。近有讀左國史漢古文者。如先帝伴讀湯太監盛。萬曆二十九年選入。于書無所不讀。善飲酒能詩。與鄭太監之惠契厚。爲同僚。先帝登極。轉典簿。不數月。卽以病請准。私宅閒住。湯益沉酣典籍。自號醉侯。雅歌篤學。最爲李永貞嫉妬。天啓四年十二月卒。

鄭太監之惠。號明淵。北直任邱人。亦二十九年選入。爲牌子王奉名下。王則大司禮田太監義名下。王率衆名下叩見。田徧熟視之。惟以手撫鄭頂。囑王曰。此子頂圓眼秀。人中端正。山根直接印堂。合伏犀貫頂法。宜令讀書。不數年。王與田相繼卒。卽派與管事田太監詔名下。始深心奮志。受業于廬山人龍節。山人杭州人。號九虬。博學能詩。於人落落寡合。聞彙臣名。便交如舊識者。贈彙臣詩云。栖遲數載誰曾記。我亦疎狂不記人。自接劉生杯酒語。常驚李白屋梁神。宮雲冉冉明千樹。玉漏迢迢隔九闈。祇令陽回春意早。羈鸞究竟出風塵。鄭自此愈專心經史古文。左國等書。詩習杜工部。字臨黃山谷帖。亦能作時藝古文。性好種植牡丹等花。嗜音善射。久爲永貞嫉妬。天啓五年夏。蒙先帝聖恩。起典簿。後陞監官。時兩眼上皮。各生黃斑。一如蟾蜍眉也。今上登極元年。奉使河南藩府。沿途廉介。驛遞感頌之。其年冬。御前親試。出事君能致其身題。考時藝中選。同文書房曹太監化淳陞隨堂。誠古今殊遇也。尋掌尙膳監印。二年春。告病。杜門絕客。究心學問。五年冬。王太監永祚密薦。起陸秉筆。總督南海子及寶和店。委用常國安以爲掌家。六年冬。總督東廠。委用王永壽爲管廠掌班。分寄耳目於羣小。且替名下官人何東鳳報二十一年夙讎。當道者多爲講解。竟膠執不息。大爲輿情所薄。七年冬。有病閒住。被參未結。鹽齏趙文淵具告。反噬公。止追

過銀八萬兩。尙有三萬兩免追。上震怒。下東廠理刑官耿良臣等於獄。逮王永壽。常國安於司禮監提問。革鄭職。下法司屢審未決。至十一年春。鄭患氣。盡證亡于獄。臨絕。屬其家屬。棺中多備紙筆。誓訟地下。享年四十有九。葬于阜成門外三里河。尙有八十餘歲母。在任邱也。凡所蓄書籍法帖。盡散佚一空。生前所作一冊。於十年夏。值常熟錢宗伯逮入。所居與鄭比鄰。見而稱賞。爲之序。初湯之卒也。鄭爲經理喪事。後天啓丁卯秋。復爲湯手勒墓碑。其辭曰。蓋聞世之君子沒而不朽者。非書績于旂常。則垂名于竹素。以至懿行隱逸之倫。詩酒曠達之士。咸得據光傳記。照映後先。是豈名譽盡屬士紳。而吾儕途乏傑俊哉。湯君諱盛。字銘新。號仲光。北直安肅人。體貌豐昂。顧眄神采。識度遠大。器宇宏深。直道正辭。率行己志。自弱冠通經史。而尤以聲詩振。常以古法出新意。人皆服焉。萬曆辛丑夏。掄選入內。久滯下僚。顯才名顯赫。如劉君若愚。亦折節與君定交。之惠曾與君同事。而兄事之。久蒙開益。故得少通今古。庚申秋。光廟登極。常憐才同之惠。擢司禮。遷東宮伴讀。蒙今上垂念潛邸勞。陞司禮監典簿。之惠又同列寮采之誼。斯時也。君自以爲居非常之地。必竭底蘊。以報國家。不知之惠之不才寡昧。每推挽相須。而軒輊罔計。豈期此志未伸。懇辭閒住之惠。亦隨而求退。君更涉獵經史。著作日繁。君嘗曰。吾有友乎。說心間之俗務。計衣食之瑣瑣。或啣杯月下。或緩轡郊坰。則范君常。君盧君是矣。如酌古准今。談經論史。探性命之原。圖不朽之業。樂聲應氣。求而不孤者。則劉君鄭君是矣。雖然。吾之學。可以攀劉而提鄭哉。君生平月旦。令人嘆服。其進修識見如此。乃暴疾初沾。一臥不起。痛哉。范君諱昇。常。君諱國安。盧君諱應選。于君皆同年也。無何之惠。荷恩

擢復原職。尋首監官。緬憶君容。宛然在目。恨不與君同事而終始之。嗚呼痛哉。墓草雖宿。情自不能渝也。嘗聞之先師曰。人之才情。本天授也。順之者明。悖之者暗。是則順必得天而壽而昌。悖必反性而夭而殃。而果報何未必若是耶。據情會理。以理律人。君乃明天人之際。洞善惡之歸。正擬遐壽期頤。逍遙笑傲。何祿壽如此之爽哉。君生於萬曆丁丑秋。卒于天啓甲子冬。葬于都城之西王河鄉之池水邨。于是樹石表行。爲九原之觀。湯復著有歷代年號考略。以爲我朝建元十六。而誤重前代者五六。實詞臣失于參考之過也。其餘遺文書籍各若干卷。咸散失未刻。君子惜焉。

王進德不知何許人。號樗仙。世廟時。職章聖獻皇后宮管事。有甲第在東華門外。清整雅潔。門無俗客。每休沐之暇。卽閉門焚香。彈琴讀書。或展古名人墨妙。臨寫不釋手。故書法逾麗。遂成名家。尤好接賢士大夫。宛然有儒者風。嘗與陸文裕公深善。所蓄七賢過關圖。陸公題跋也。其辭有曰。按七賢過關。事無可考。豈竹林之人耶。或曰卽作者七人爾。蓋畫家多尙興致。不屑屑形似。要在得其意于筆墨蹊徑之外可也。公遭遇聖明。參與帷幄。密勿之地。以其愛畫之心。而爲愛才之舉。則天下必不致有遺才。如此圖中望望而去也。予重以是望之云。曩臣于滇南諸公處。曾見此圖。竝古帖一種。咸識之以樗仙圖書。則樗仙賞鑑好古。當不凡也。

張太監維者。北直霸州人。號範吾。嘉靖三十八年選入。爲司禮監管印。張太監宏名下。幼博學好書。又最爲李太監芳器許。隆慶戊辰。遂薦陞神廟潛邸位下。萬曆初年。歷陞乾清宮管事。提督內忠勇營。掌兵仗。

局印而秉筆孫德秀張鯨諸人頗妬其才然維處之泰然慈聖老娘娘造有元帝金像特差維齋請往湖廣武當山供安維善詩能文且精于琴畫往返廉靜驛遞成德之凡詩賦翰牘人咸寶惜十二年三月二十七日夜侍神廟于乾清宮西廊上問曰爾本官三年事畢了維奏曰仰荷聖恩得予令終臣等存沒感戴上因從容曰我常想張宏好個老兒每見我譴罰一個諫官卽叩頭流涕善言寬解我亦爲他息怒何等忠愛維叩頭應曰此是聖德納諫非臣下所能挽回倘聖怒不息他亦豈能成功上曰爾以他三年除服畢作一首詩來我看維卽擬題榮哀慕感詩云薤露光陰何易晞三年夢逐白雲飛哀吟風木人終別悵絮烟霄鶴未歸墓草可憐滋聖澤祠旌深感照春暉仁皇夜半思耆舊重奉恩綸下紫薇至十六年九月駕幸山陵閱壽宮回維股爲車轢傷又見近侍小人張守義等怙寵生事而張鯨等耽耽未艾也遂求退著于思善門外直房調治半年餘始准私家調治遂益哀法書祕籍不釋手至晚年兩目爲盲尙能濡筆寫行草凡聞有新書必買來令左右念聽者數年至萬曆四十一年夏卒享年將八十著有皇華集歸來篇摸金山人集蒼雪齋集等書行于世維與先監爲同官先監之政事擔當維之文章恬退成彪炳于世云

王翺字鵬起號村東原籍南直句容人永樂時遷北直通州嘉靖壬寅選入時年十一歲撥司禮監內書房讀書受業于郭東塾趙太洲孫繼泉先生咸器重之且曰爾諸生係內史不必學舉業文章惟講明經史書鑑及本朝典制以備聖主顧問有餘力學作對與詩可也歷陞乾清宮牌子隨朝請劍因進封事賜

斗牛。八月陞太監。萬曆辛巳奉旨慈寧宮教書。遂遷居于西安門北。得從容與士大夫唱和吟詩。待母孝。待弟良翔友于之愛。爲內廷所少。翽爲人悲歌。儻博學自豪。視富貴若電光石火焉。其咏籠雀詩云。曾入皇家大網羅。樊籠久困柰愁何。徙于禁苑隨花柳。無復郊原伴黍禾。秋暮每驚歸夢遠。春深空送好音多。聖恩未遂銜環報。羽翽年來漸折磨。翽與維前後皆有詩名。而品秩榮顯。翽遠不及維。刊禁砌蛩吟稿。邨東集行於世。

李芳任乾清宮管事。掌內宮監印。隆慶年間。曾以上書直諫下獄。與海剛峯先生諱瑞諡忠介者同寓。事見泳化類編等書。茲不載也。

凡內臣姓朱者。皆改姓諸禮。公族無刑人之義也。諸升字晉父。號鎮南。浙江紹興人。嘉靖四十一年選入。于王太監安爲同官。按外廷所稱同官者。謂職掌名位相同也。內府所稱同官者。不過同支派項下已耳。猶前後同門之義。非指同僚而言。不可不知也。升曾任御用監。武英殿掌房。自萬曆十年降發南海子淨軍。多讀博識。通篆籀六書之學。樂與士紳交遊。泰昌元年秋。復原秩。天啓五年夏。沐浴正冠而逝。壽幾九十。升性豪俠。善書札。達大體。奢于交接。積書名人字畫古帖頗多。

毛成號似鶴。北直玉田縣人。萬曆六年選入。歷陞甲字僉庫書。甘貧篤志。潛心濂洛之學。薛文清王文成諸君子之書。更留心音韻六書之理。雅服鄭樵之六書略。楊桓之六書統。趙撝謙之本義。吳元滿之總要。晚年得崑山魏莊渠先生所著六書精蘊。玩索自娛。舉世俗之好無能奪也。成性剛介。菲飲食。敝衣履。通



禪學蓄書甚多。足未嘗至顯要之門。于纍臣有誼焉。壽七十餘卒。葬于玉泉山麓。生時自題其墓碣曰。於呼藍田耕夫之墓。神廟初年。先習趙孟頫字。外小臣中有杜詩號鯉廷。王廷策號哈仙。及中書楊大綸。劉綵等。備員筆墨之役。其後聖性篤好章草。戊申春。曾召纍臣至啓祥宮前殿。差宮人襲朝女出簾。問纍臣兄弟之名。令寫真草八分篆字詩。纍臣俯伏階下。次第奏對。如諭寫入。其後又令寫章草。纍臣對曰。原不會寫。未寫而止。此時纍臣二十五歲矣。亦最奇之遇也。聞皇貴妃鄭娘娘欲討做司房近侍。神廟以爲先監矩甫亡。已派與常雲名下。何可用。未遂許。而或有妬者阻之也。是時開雍順老師尙在京。聞之甚喜。俯仰今昔。不覺泪下沾襟。

孝廟時。皇親恣橫。太監何文鼎。掌乾清門。心不平。引祖宗家法。極言直諫。文鼎與鮑太監忠契厚。方草疏時。不令忠知。比燈下謄真之際。有一楨在門榜立者。忽一步一步行至案前。鼎怒罵曰。我爲國盡言。爾何物。么麼敢來嚇阻我耶。疏上。上大震怒。繫鼎詔獄。雜追治之。務究所主使者。文鼎寤。慘備嘗。曰。有兩人俱是山東籍貫。不可拘按。訊者曰。姑言之。對曰。孔子孟子也。鼎旣死。猶能于禁中拽銅缸作聲。若稱冤者。中外嘆息。上亦感悟憐之。特令勒石以祭焉。

中官最信因果。好佛者衆。其墳必僧寺也。惟晏太監名宏者。不知何許人。武廟時。曾鎮守陝西。與督臣王瓊同事。其墳在西山。不設佛像。止以石砌壁。而鐫刻古來賢孝典故。爲勸化計。俗所謂晏家廟者是也。今經廠所貯晏公綱目板一部。宏遺物也。內臣多愛重。刷印之。

世廟神廟。草國年久。鼓鑄嘉靖萬曆錢。流行甚廣。惟光廟在位。僅匝月。先帝仰思泰昌年號。尙未鑄錢。遂分鑄與天啓錢。並流通同使。民間有恭睹泰昌錢而墮淚者。疊臣藏有徽墨四大笏。可重二觔。劑料甚佳。上摹泰昌元年製。想是正人君子。曾蒙光廟召用。禮遇者。藉此墨以志不忘也。疊臣磨用。聞錢法侍郎劉君重慶好古喜墨。遂托一山東人轉賣。且藉此墨。滿望劉君據墨具疏。請將泰昌錢亦鑄若干。以廣行。奈劉君留墨付值。而泛泛然視爲沒要緊事也。惜哉。

神廟恭妃王娘娘。卽孝靖皇后。生皇長子。卽光廟。又生皇四女也。皇貴妃鄭娘娘。生皇二子。皇三子。卽福王。又生皇四子。生皇二女。皇二女。卽封壽陽公主。駙馬冉興讓所尙者也。端妃周娘娘。生皇五子。卽瑞王也。敬妃李娘娘。後封皇貴妃。生皇六子。卽惠王也。生皇七子。卽桂王也。順妃李娘娘。生皇八子。及皇十女。中宮王娘娘。卽孝端顯皇后。生皇長女。卽榮昌公主。駙馬楊春元所尙者也。榮妃王娘娘。生皇三女。德嬪李娘娘。生皇五女。皇八女。皇九女。光廟續承大統。福王封于河南河南府。瑞王封于陝西漢中府。惠王封于湖廣荊州府。桂王封于湖廣衡州府。

神廟時。御藥房提督張太監。明精于醫藥。最蒙寵。陸秉筆。掌內官監。內府供用庫印。明素不識字。只挂盧銜。不該正。不批文書。凡不識字而秉筆者。穆廟時孟冲。神廟時張明。先帝時魏忠賢。王朝輔。止四人耳。萬曆二十八年夏。明病故。京師人皆快之。曰張打鶴死了。先是神廟往朝慈聖老娘娘。明執藤條在前清道。值慈寧宮丹陛上。設有古銅仙鶴。高五六尺。明誤以爲人也。遂打而罵之。曰聖駕來。還不躲開。隨侍諸臣

陋之。所以有此綽號也。其掌家周臣，亦陞乾清宮管事，掌兵杖局印，而一家照舊，不許分散，專造上用酒，造辦金玉銅錫木鐵雕漆器物，名曰御覽。周臣病故，張宜伊進朝繼之。至泰昌元年八月始散，而逆賢掌家王朝用及伊進朝、池守爵皆明管上房之官人也。

福府承奉曹奉者，持佛氏戒，號丹巖居士，頗與士大夫交。然性嚴急少慈。迨之國時，與承奉鄭縉俱以病告留京師，惟徐進、劉顯等隨赴雒也。

慈聖皇太后李老娘娘患目疾，有醫婦劉氏奉旨進慈寧宮調治。有同來彭氏，匿孕入宮，貪戀節間賞賜，不肯明言。臨月遂于宮中封夫人彭金花女處夜產一子于便桶中，即淹死。宮人奏知神廟，欲將重處。幸聖母憐其勞，發彭氏于禮儀房，打三十逐出，棄死兒于北安門外。此亦宮中異事也。自後凡醫婦收生婦入宮，必再三驗焉，不逾年，李老娘娘崩，蓋亦非吉兆也。

壽陽公主者，神廟之第七女。皇貴妃鄭娘娘生也。選駙馬時，願姓者二人，冉姓者一人，冉固安人，願都人也。時正暑，御前親選之日，兩顧白玉大簪，極細亮，帽髮可以鑑，香氣襲人，衣服楚楚，鮮鞋淨襪，而冉則衣不求鮮，戴圓羅帽，兢兢叩拜，不敢仰視。神廟隔簾向鄭娘娘指而目之，卒選中冉氏之子興讓，實重其老成也。及完婚數年，與公主反目，逃回奉旨召來，罰演禮如楊春元故事，仍革其父職，奪教習部官買之，俸一年以懲之。

神廟時，生瑞王之端妃周娘娘，不甚有寵。瑞王二十五歲始完婚，福王十九歲完婚，即光廟二十一歲始

完婚。惠王桂王亦各二十歲以外始完婚。禮儀房各有底冊可考也。

中宮孝瑞王娘娘。其管家婆老宮人及小宮人多罹捶楚。死者不下百餘人。其近侍內官亦多墩鎖降謫。惟皇貴妃鄭娘娘近侍各于善衙門帶俸。其宮人有所謂斬大者。失其名。龐保曾答應也。曰吾讚女者。初宋保答應而後用張朝進答應。保慮熱鬧終有散場。苦海回頭是岸。于是棄職爲僧。常往不返。內臣中擺脫富貴。急流勇退。所希有也。曰林廷宦女者。馬謙曾答應之。曰于景科女者。張騏所答應也。凡答應者。爲之置辦服飾食物。卽掌家掌班。不可缺者也。

京師墨山會地方有贈司禮監太監剛公諱鐵之墓焉。寺中藏有遺像三軸。皆曰靖難時有功之太監。至今宛平縣有祭。凡掌司禮監印者。繼續修葺。又曰三義廟。蓋祠先主關張君臣也。其五虎將軍像。龐士元先生像。皆先監掌印時。令經營內官率塑匠往鍾鼓司。做漢時粧束服飾以塑之。非出自古本流傳也。按剛太監墳大塚一。其石碣差古。書燕府承奉正剛公諱鐵之墓。又一碑差大。稍新。則書贈司禮監太監某之墓。蓋似後人所立者。墳前左右各列石鼓四。以次漸矮。如爲坐杌。松亦茂盛甚古。其爲古蹟無疑。近年修墳。所勒碑文。皆曰公曾有靖難犁庭功。按碣稱承奉。正是成祖未正大位時。公先卒矣。若果有靖難犁庭等功。則自應有別銜。豈仍以承奉正勒碣乎。疊臣心久惑之。徧向熟于典故者訪問。亦卒無明證也。一日讀宋史列傳有云。某與遼將剛鐵大戰于某處。云云。則此墓得毋遼將塚耶。抑剛公亦是遼裔。而名偶同英猛同耶。今正史明載剛鐵姓名。因世之讀史者。概以斷爛朝報。泛泛視之。定多未詳。故耳食之人。遂

相沿無敢異議也。同僚趙君琦美字元度，南直常熟人。趙定字先生，長子，爲先將軍契友，博洽好古人也。爨臣以父執事之，亦曾問及，懵然無以對焉。夫此墳爲我朝大內官祭祀之所，享二百餘年血食，倘或原是一番將軍，能不令死者暗笑生者之謬談乎？是以慎祀典者，不可不詳核確蹟也。爨臣愚昧，謹次所聞，以俟知者。



# 酌中志卷之二十三

## 彙臣自敘略節

彙臣若愚。生于萬曆甲申二月。至戊戌七月。悖父兄之教。感異夢而自宮。廢儒業。讀醫書。習養生家言。辛丑六月。遇例選入皇城。隸先監陳公諱矩名下。派與掌家常太監雲照管。該班則供抄謄之役。下班則習字讀書。頗蒙先監器許。解衣推食。耳提面命。卽師生父子也。神廟功名頗寬。又得外受先師顧太史老先。生之教爲多。先師諱天峻。號開雍。南直崑山人。壬辰鼎甲。彙臣入七年。先監卒。又二年。始陞奉御。每竊嘆曰。我太祖時。胡惟庸之變。幸得雲奇諫阻。不然聖駕幾危。正統己巳之變。我景皇帝憊。騎披猖。徐理等倡南遷之議。若非金英興安主持。鎮定于內。恐于忠肅諸君子不能奏奠安宗社勳也。我孝廟青宮時。篤于學問。及紹大統十八年。堯舜之治。又皆自覃吉培養之功來也。我武廟在宥。逆瑾不臣。若非張永。從中併力密奏。祛除大慙。能如摧枯易乎。我神廟御極之三十一年冬。妖書獄興。九重震怒。重賞以購作書之人。廣緝捕以滋告密之寶。凡書內有名者。恐有後患。各猜生平素讐隙之人。而欲甘心。書內無名者。又自懷疑懼。恐被怨家誣害。身危家滅。幸當時先監掌東廠。委曲調救。中外始安。使從來內臣。若無雲金先監之儔。則逆相之毒必稔。南渡之議必興。歸德江夏諸君。寧免蜚語之中乎。嗚呼。危哉。彙臣曾記王振擅政時。欲害薛文清。其廚中老奴知之。痛哭不已。振聞之。謀遂中止。彙臣自辛亥冬。爲常太監。詿誤墩鎖。至光

廟登極始放陞司禮監寫字奉御先帝登極卽侍高太監時明後陞監丞天啓元年冬自司禮監被魏忠賢退于御馬監仍隨高公居住西直門街私宅日侍左右高所纂輯養生之書曰一化元宗彙臣曾効抄謄讐校之功三年始成卽被李永貞自高公宅內喚令答應不敢不應承趨赴不謂永貞自登樞要頓忘布衣設法羈防使人進退不得氣鬱痰火不食八九日瀕死者數次然寸心實不滅王家老奴也四年夏逆賢欲杖陳居恭幸王體乾素感先監舊恩向逆賢救免其年冬南樂魏相公密與賢一稿賢付永貞著謄奏施行其中有元兇已放四字彙臣問元兇指誰永貞曰你快寫罷今廠爺在御前立等要奏哩彙臣嘆曰人臣已去爲甚還派他這樣名色永貞曰你到大殿內替老趙解解一日因臺臣劉微張汝懋之疏欲逮房可杜樊尙燦游士任等適先帝偶患憎逆賢各僅得倖免一日少卿韓繼思告病永貞因同志錄上其名有三圈崔呈秀所欲害者又韓三之獄呈秀欲藉僕害主如吳養春吳懷賢故事逆賢亦有成心而體乾永貞等且倡言世廟夏桂洲故事幸韓三至死不肯妄招許顯純亦未敢代砌捏奏此實天啓末年詔獄詞臣僅見之一公道事也凡各項章疏及內閣票本所擬聖諭詔誥勅命各秉筆公公例應詳看然勅諭誥命稿多忽略不肯細看彙臣在永貞直房有經管責任偶值滿桂陞總兵內閣撰進勅稿付永貞看至爾可與樞輔計議而行是時孫閣部承宗撤回已久見任總督則王公之臣巡撫則喻公安性今尙曰樞輔實屬差誤如不奏請改正開讀之際令人能不暗笑乎永貞深以爲是次早同衆奏請御筆將樞輔二字改作督撫此稿珍藏內閣可考也今上登極之日體乾總辦禮儀文書有進封妃周娘娘爲皇



后紅掩面文書一本。該永貞寫傳紅。纍臣侍永貞。騰完問曰。此文書是那項辦理的。永貞曰。印公公曰。既已奏過。今卽奏覽。發行乎。永貞曰。然。纍臣曰。略早些了。如今萬歲爺還有本生聖母賢妃劉老娘娘墳。見在西山。尙未傳諭。徽號遷祔。今中宮娘娘若先行進封。恐非次第。永貞曰。有所考據否。纍臣曰。有。隨將皇明詔制書內。所載穆廟以裕藩入繼。所行次第。某日登極。某日傳諭聖母徽號遷祔。某日傳諭進封皇后。呈永貞。卽將前書袖至御前。據以告體乾。轉奏。今上萬歲爺。次第舉行。次日早。體乾笑問之。知爲纍臣簡舉。甚銜之。所以參若愚者曰。胸藏舊蹟。目無成法也。冤哉。永貞雖死。涂文輔等尙在。可而質此事也。萬歲爺聖孝性成。將順其美。亦臣子分內事。強如佐助逆賢。日在御前。替人報復。播無窮惡也。天啓七年九月。永貞辭任後。纍臣遂于德勝門內先監會館居住。十一月十七日。永貞逃後。至十二月十二日。楊維垣之捏參疏上矣。十四日。子司禮傳奉聖旨。御馬監外廠大監劉若愚。着降做淨軍。發去南京孝陵衛種菜。還寫帖子去。該衙門知道。欽此。時霍維華疏內。亦參及若愚。二疏所奉之旨。皆云。劉若愚已降。發處分了。十六日。南行。崇禎元年正月初十日。交孝陵西園收管。三月內。又被山西道劉御史重慶。捏參提解赴北。五月初一。逮入刑部獄。二十五日。禮垣陳君贊化。疏請着九卿科道廷鞠。如朝審例。奉聖旨。所奏鞠審李永貞等。委宜分別隔訊。務得真情。云云。至六月二十日。中府會審。乃不容分訊。各夾打一頓。李永貞若愚李實。俱引凡姦邪進讒言。主使殺人者。斬之律。仍于斬字上增一皆字。俱決不待時。志在滅活口。何嘗分別隔訊得真情哉。二十三日具題。二十七日平臺召對原會審大臣王太宰永光等。欽奉玉音。李實一案有

冤枉無冤枉。五虎五彪。如何不問。決不待時。空印本是李永貞填的。劉若愚次一等。李實又次一等。云云。至七月初二日會審之疏。奉有這本內犯人情罪不同。還着該部從公另擬之旨。初四日又召對。將李實原參周起元印信本。付閣臣細看。果是墨跡蓋殊。十三日刑部具題。十六日奉聖旨。是李永貞即會官處決。劉若愚秋後處決。李實充淨軍。送司禮監發落。孫昇依擬。欽此。彙臣罪案。其實不曾認明。其實無證據也。本年九月初審前。徧遞訴揭。云真正奸黨。巧卸欺天。被退小臣。無辜吃累。以力攻楊霍。時刑垣曹君師稷。疏請詳鞫。奉聖旨。劉若愚已有成案。不必再訊。該部知道。欽此。時首輔李公標。北直人。梓里情面。不得不爲也。按逆賢欲貴顯其名下。將在前礙路之人。殺者殺。退者退。彙臣所以被斥于御馬監。又被王體乾退于外廠。實係摧折之人。當時最爲耆貴重臣。無踰體乾者。親信掌家。無踰王朝用者。今乃苛責無辜。可謂有天日乎。涂文輔司御前文翰。總兩部事權。才名不在永貞下。罪止孽逆軍犯。近復蒙恩改爲民。是真正逆賢支派。輕者益得輕也。且楊左諸公。及七君子之死。自有逆謀主使。加功入告之人。而李實空印本。又的非若愚填寫。乃懸坐曰。主使不亦冤乎。會審時。少司寇閩中丁公啓睿。山西司郎中江右徐公士俊。首座則太宰長垣王公永光。王與楊霍又最厚者。夫旣成心。故入。即祖宗律條之內。不難增一緊關字樣。則招之湊砌。與海市蜃樓何異。至部覆第二疏。仍用前律監候。可謂次一等乎。次者次于死也。仍以死擬。死可謂從公另擬乎。按明例律云。二死三流。各同爲一減項。用此律者不一。何獨若愚明奉玉音。次一等。明明本條無皆字。而不用此律何耶。彙臣于逆賢之側。絕無站處說處。于永貞又久遭猜妬。旣不敢出宮。

門。何由而知外事。又不到先帝御前做官。從來恩廢。總未及若愚弟姪。工部錦衣衛之文案。歷歷可核也。內臣便覽。亦未刻若愚姓名。而楊左諸孤疏揭。血寫奏章。及李實孫昇疏揭。又何曾有一字及若愚之姓名。三年秋審。蒙註有詞。五年秋審之後。特奉聖諭云。法官不肯盡心詳核。主筆者又循套塞責。殊非肅國法。重民命之義。又云。種種情節。及招冊中事相類。而諭不能悉載者。通著三法司另審另擬。俱要明妥具奏。欽此。若愚冤苦異常。具狀申訴。蒙將姓名列應改數內。六年七年屢改未允。已不入朝審。招冊亦不隨上衙。凡屢次奏駁之旨。亦不曾詰責堂司。奈七年秋。爲缺太宰召對時。少宰張公捷薦呂純如。致滿朝鼎沸。八年春。鳳陽祖陵遭流寇之變。將有恩詔傳布。而楊與霍等。或有冷灰思然之念。被臺省抨彈。時大司寇馮公英。北直人也。甚懼。至五月內。遂將若愚改從而加功者。絞之律。覆結。將明例律二死三流。同爲一減之條。復革而不用。自若愚始。明借若愚性命。以息臺省之口。暗以傷楊霍等耳。則是答應永貞之人。重而仍改于重也。九年夏。值五年大審之期。其冬有總憲唐公世濟。薦霍維華邊才。上震怒。將唐革職下獄。提問。十年夏。恩審。曹大司禮化淳。雖兩奉簡命。到大理寺清理冤滯。亦不敢違爲若愚昭雪也。十四年春。奉特諭大赦中外。命內閣首員范公復粹。于三月初九日起至十二日止。到大理寺會審。蒙註若愚有詞。衆耳衆目。無不通曉。至四月十四日。覆奏有詞旨下。乃不與有詞二十四人數內。豈另俟機會耶。抑有所阻礙而沉擱耶。不可知。已有兔爰爰。雉離于羅。戴盆何時得見天日耶。愚臣平素苛謹。無城府。往上看是青天。往下思是地獄。明有王法。幽有鬼神。雖身處幽囚。顛險之地。此一點天理良心。必不肯昧。惟念在內。

之猜妬者多。外廷之說夢者衆。如江南所刻清明聖政頌。天臚筆斥奸等書。不一而足。蓋信耳者。膠執成心。原心者。百無一二。卽疊臣一介之生死。所關幾何。顧我神廟之聖慈。光廟之聖孝。先帝之聖度。凡爲臣子者。或無由曉。在當時。或膠一己之見。隨聲附和。若再數十年後。彼道路不根之口。又將何所底止。若愚世受國恩。深爲此懼。敬于席藁苟活之際。以桺楞代硯。以血淚和墨。謹將憂危竝議以來。及先帝甲乙丙丁四年之內。耳目所及。最真最確者。直吐肺肝。不加裝飾。心無乞米之嫌。傍無執燭之嗾。我朝九廟之靈。實式臨之。期沒者。不含恨于筆端。存者。不漏網于清議。後有弔古者。自笑彼葛藤非真。撫此編而太息矣。若愚之報楚籍者。昔在南京。聞旨被逮時。卽具書與兄茂芳云。必不可言與兄同母。亦不必露先人之仇。終未能報之意。心良苦已。果真襄陽縣人也耶。亦異夢冀少驗耳。疊臣始祖名大海。南直定遠人。元至正甲午。隨繆大亨起義團澗山。凡三千人。我太祖收伏之。以從軍勞。陞延慶左衛正千戶。大海之子觀。隨成祖靖難南征。大戰白溝河。陣亡。陞指揮僉事。並叨傳襲。至第八世。則先將軍應祺也。生嘉靖庚申。于萬曆丙申中武舉。爲盛公訥趙公用賢門生。推宣鎮西城守備。歷陞都司游擊參將。至京營左副將署都督僉事。癸卯冬。推遼陽協鎮副總兵。先將軍素爲寧遠伯李成梁所忌。至棄地一節。又具呈諫阻。益逢毒怒。百方圖害。延至乙巳夏。告病。八月十一日卒于正寢。年四十有六。先將軍捐世之冬。遼東果招徠流民。地果棄矣。見遼左棄地語中。嗟乎。疊臣于遼東李氏。有不共戴天之讐。當貴池丁相公等。于先帝講筵。袖出遼東傳害熊經略時。疊臣如能主使殺人。何不將楊鎬李如楨同熊並處。藉封疆爲名。雪先臣恨。不亦正乎。

又如楨在獄。于天啓五年冬。曾失火。僅將如楨責之。當時纍臣何不求永貞加功。置如楨死地乎。總之暗裏害人之事。必非遭斥逐猜防不同心之人所能辦者。世未有殺父之仇不能報。而乃殺沒相干之人。有是理乎。此最顯而易見者也。先將軍故長男茂芳。襲職歷陞昌平參將。崇禎元年夏。刑部杜君齊芳。參茂芳革任。二年冬。薄都城。茂芳協防居庸關。七年秋。犯山西大同宣鎮東路時。永寧參將張國威。率茂芳守城。不敢攻。九年夏。茂芳蒙山陵提督王太監希忠牌取赴昌鎮。聽候委用。夏杪秋初。猝自柳溝由皇陵深入。昌帥巢丕昌叛。昌平城陷。王太監及茂芳同死于昌平。身膏原野。門祚無嗣。又可痛哭也。先將軍一生清節。叨祀鄉賢。有子二人。所遭如此。豈非天哉。視天夢夢。我辰安在。纍臣與兄茂芳同母。母胡亦嘉靖庚申生。初產若愚時。夢一老僧云。是襄陽人。來借房住。故若愚。旬時。喜敝垢衣。母胡倚闥十載。加以悲痛。茂芳之死。遂于十年六月內去世。享年七十有八。嗚呼痛哉。若愚不孝不弟之罪。其通于天乎。其通于天乎。



# 酌中志卷之二十四

## 黑頭爰立紀略附

涿州去京師百餘里。其涿郡娘娘宮中咸敬之。中官進香者絡繹。馮相銓其里人也。少年詞林。美容公子。人多慕之。值神廟靜攝久。交通禁中。是以中官多請馮入皇城遊賞。自此內官皆知有小馮翰林矣。天啓甲子春。逆賢進香涿州時。銓被劾家居。跪謁路次。送迎供帳之盛。傾動一時。且涕泣陳盛明之冤。爲東林陷害。逆賢憐其姣媚。已心許之。後楊都憲有參賢二十四罪之疏。賢窘甚。內營救于客氏。王體乾、李永貞、石元雅、涂文輔。而復求助于外廷。馮因具書于賢姪良卿。言外廷不足慮。教之行廷杖。興大獄。以刼制之。又時時刺得外廷情事。密報逆賢。使爲之備。賢感之刺骨。及汪文言再入詔獄。馮與霍維華、李魯生、楊維垣、崔呈秀等朝夕計議。羅織多人。密封付良卿。轉送逆賢。皆李朝欽及永貞等拆念。賢聽畢。令朝欽付東廠。聽記者暗授許顯純。顯純一一請教後行。馮又與大金吾田爾畊最暱。每促膝夜語。卽親近僮僕。不得與聞。南樂通逆賢之後。思得後勁。念馮曲意承事。因屬意焉。而李魯生等又贊助之。馮亦將綸扉故事。一册。密托良卿。轉致逆賢。間在上前點綴。冷語曰。甘羅十二爲丞相。我朝卜相亦曾不次用人。不拘資俸云。蓋未入相之前。已久入逆賢幕矣。初在講幄時。日與良卿傳應星深談。或託爾畊通帖。機鋒顯露。南樂聞而忌之。馮入相後。漸聞其事。銜之。遂與呈秀爾畊等。譖南樂于逆賢。謂有二心。南樂從此謝政歸矣。馮之

大拜不盡由南樂者此也。馮喜修容止。凡入朝。衣箱內隨靴兩三雙。鮮衣數襲。沿途頻刷靴塵。行步自顧其影。鏡不離左右。官帽補服。極其奢麗。性愛古玩。而學識目力不逮。托心腹長班劉四。號次菴者。代爲聚斂。凡京城世家有名物。堪賞鑑者。必百計取之。凡出閣至寓。則古董玩好。奇書珍玉。羅列滿前。而嬖妾嬖童。清客狎友。殆無虛室。李永貞嘗嘆曰。內相有涂文輔。外相有馮振鷺。時事可知也。言其躡等起拜。內外同也。逆賢已出妻馮氏。雖流寧肅。稱自涿郡移來。疑馮疎族也。是以凡馮侍講。逆賢時時屬目。有微時故劍之思。暱馮之故。亦在此乎。馮素恨張我績。誓欲報復。屢書啓達賢。賢回啓云。宮府原無二致。忠孝出于一原。李永貞筆也。來啓用眷生南紅帖。內以白面開揭爲副啓。其寫如勅稿式。永貞文輔侍側者。耳目極確也。其害經略熊廷弼者。因書坊賣遼東傳。其四十八回內有馮布政父子奔逃一節。極耻而恨之。令妖弁蔣應陽發其事于講筵。以此傳出袖中而奏。致熊正法。其實與貴池相公無甚與也。彼時閣中擬入聖諭。歸乾斷于先帝。體乾永貞文輔會議曰。分明是小馮兒與熊家有隙。在講筵害他。與聖上何干。遂以原稿上奏。請御筆增入卿等而奏。出之袖中字樣。其後御史趙允昌。吳裕中。皆有疏參貴池。而馮先使私人田景新。嗾吳曰。內意薄丁矣。可亟參之。又布線索于逆賢云。吳是熊至親。志爲熊報仇。不可放。逆賢遂矯旨杖殺之。批本者李永貞。喝令重打者王體乾。然造謀者實馮也。馮與田爾畊。魏良卿。傅應星等。恆醉舞酣歌。往來無忌。呈秀與逆賢看工之際。屏人譖之。馮知之。謀于李魯生。霍維華。楊維垣等。乃造三案以錮諸賢。書成。逆賢見有呈秀姓名無已。稱美。心逾恨之。而從來愛緣盡釋矣。馮遂不能立朝。張我績始駸駸



乎起用矣。揚州知府劉鐸，素嗜酒，丙辰廷對日，因過醉對策失格，致失鼎甲。雖能文善畫，識者已知其疏放難令終矣。適矮僧所黏壁上五七言律詩，俱歐陽暉所作所寫，不過借鐸圖書私用耳。奈馮私人魯生，維華輩視爲奇貨，嗾爾畊借緝事人告鐸，遂不免于禍矣。人知事由張體乾、谷應選、田爾畊、薛貞等孰知造謀弄江右人者，亦從馮發端乎。馮母之迎養于都中也。良卿應星皆如子姪禮，惟爾畊更密如嬌婿焉。及冬相母自京旋涿，沿途公館鋪設，如候逆賢例。豪奴武僕，都穿紵絲蟒衣，大紅天青官綠月白醬色元色等色，各四人或六人或十人，執棍乘馬，屬囊韉焉。頭戴貂鼠帽，或擺對于前，或擁衛于後，旗旛蔽日，金鼓震天，威若天神，相母轎左，所懸刀劍，并所列瑯戈，半爲逆賢良卿等各贈物也。其姬妾美婢乘軒者二三十人，靚粧彩服，燦若雲霞，遠近奔看者雜遝，募化者如蟻。凡途遇者，雖皇華欽使進貢之臣，無不停驂讓行。然長年曉事者，竊笑其非復中州逃難狼狽狀矣。凡馮京中多蓄古玩，皆修三案時，或載某一疏，除某一疏，及或增損姓名，皆以賄成，其積貲財，類從入京買米之車載去，而母歸所隨箱積不與焉。其家所置田園，盡是膏腴，而花木之奇，遠踰禁內，蓋多藏寶鑑，爲畿甸第一家也。崇禎二年，科臣李遇知于賊窟，庫得馮丁卯送逆賢祝壽詩百韻，具疏入告，其在家之効款如此，則在京之行媚，又當何如。是年冬，口薄都城，涿爲附郡，馮捐資守備，時差取紅夷礮抵涿，馮恐爲口奪，倡首挺身同衆護礮至郡，有疏奏聞，又一疏力救郭鞏，或有嘉其義俠者，然其意實欲藉此爲燃灰計耳。識者已窺其眈眈之謀矣。洪惟涿郡娘娘極爲靈應，何以生此禍水，貽害朝野，豈天行劫數使然乎。異物志云：靈狸一體，自爲陰陽，故能媚人，皆天

地不正之氣。又癸辛雜識。青藤山人路史。咸可證也。吁。以如此之人而處揆席。又何怪乎舉國若狂也哉。

編主五雲王

編初成集書叢

志 中 酌  
册 二

中華民國二十四年十二月初版

撰 者 劉 若 愚

發 行 人 王 雲 五  
上海河南路

印 刷 所 商 務 印 書 館  
上海河南路

發 行 所 商 務 印 書 館  
上海及各埠

編

六二九一上

(本書校對者經巨卿)

